

DXUS YUWE SAN MATEO FXI'JNI

Jesukristo ji'j nyafxiiiteywe'sxtxi pta'sxni
(Lk 3.23-38)

1 ¹Jesukristo ji'j nyafxiiiteywe'sx kimtewa txāatxku pta'sxi' ayte'.
Jesukristo' Abrahan Davxid ji'kh yu'. ²Abrahana' Isaak neyku
yu', naapkaçxha' Isaakha', Jakob neyku yu'. Aça' Jakoba', Judáwe'sx
neyku yu'. ³Juda' Fxares vxite' Zara neyku yu', aça' njī'ja' Tamarku
yaase yu'. Fxaresa' Esrom neyku yu', naapkaçxha' Esroma', Aram neyku
yu'. ⁴Arama', Aminadab neyku yu', naapkaçxha' Aminadaba' Naason
neyku yu'. Aça' Naasona', Salmón neyku yu'. ⁵Salmona' Booz neyku yu',
naapkaçxha' njī'ja' Rahabku yaase yu'. Booza' Obed neyku yu', aça' njī'ja'
Rutku yu'. Obeda' Isaí neyku yu', ⁶naapkaçxha' Isaía', jxkaahsa Davxid
neyku yu'. Aça' jxkaahsa Davxida', Salomón neyku yu', aça' Salomón
njī'ja' Urias nyu yu'k nyafxii txāak yu'.

⁷Salomona' Roboam neyku yu', naapkaçxha' Roboama', Abias
neyku yu'. Aça' Abiasa', Asa neyku yu'. ⁸Aça' Asa', Josafxat neyku yu',
naapkaçxha' Josafxatha', Joram neyku yu'. Jorama', Uzias neyku yu'.
⁹Uziasa' Jotam neyku yu', naapkaçxha' Jotama', Akaz neyku yu'. Aça'
Akaza' Ezekías neyku yu'. ¹⁰Ezekiasa' Manasés neyku yu', aça' Manasesa'
Amón neyku yu', naapkaçxha' Amona' Josías neyku yu'. ¹¹Josiasa'
Jekoniaswe'sx neyku yu'. Txāa ensutx Israelwe'sxa' Babilonia kiwen jxūna
u'jni yuu. ¹²Aça' Jekoniasa' Salatiel neyku yu', naapkaçxha' Salatiela',
Zorobabel neyku yu'. ¹³Zorobabela' Abiud neyku yu', aça' Abiuda'
Eliakim neyku yu'. Eliakima', Azor neyku yu'. ¹⁴Azora' Sadok neyku yu',
aça' Sadokha', Akim neyku yu', naapkaçxha' Akima' Eliud neyku yu'.
¹⁵Eliuda' Eleazar neyku yu', aça' Eleazara' Matán neyku yu', naapkaçxha'
Matana', Jakob neyku yu'. ¹⁶Jakoba' Jose neyku yu', naapkaçxha' Jose'
Maria nmi'k yu', Kristo Jesus yaasesa njī'j.

¹⁷Abrahan ji'jtx isate', katorce ney u'jweçtek Davxida' upxhna
ūsu'. Aça' Davxid ji'jtx isate', ki' vxite katorce ney u'jweçtetx

Israelwe'sxa' Babilonia kiwen jxūna u'jni yuu. Txāajū ki' isani ki' vxite katorce ney u'jweçtek Kristo' upxhna ūsu'.

Jesukristo upxni

(Lk 2.1-7)

¹⁸ Jesukristo upxni' na'wēk yuu: Jesus nji'l'j Maria' José yakh imi'ya' puutx we'wenik ji'phu'. Nawa ih fxi'zemey, nasa ji'phuk Dxus Espiritu kaavxya'ja'jni. ¹⁹ Txajx nmi' Josea' txāawe'sx leytxi kxtey nwēese'jna fxi'zesak yu'. Nawa Maria nasa ji'phuni yu's khuēswe'sxtxi pāatxhī'kxmée, paaçte txuteeya'wak yu' nasa jiyunimeete. ²⁰ Sa' txā'wē yajkxna ūsiyna, ksxa'wte Dxus angel vxyaaçxa na'jik:

—José, Davxid ji'l', iidx nyu yuuwa'jsa Maria's jxpaga'ya' wa'lnu, na'wē nasa ji'pha' nawa txā' Dxus Espiritu kaavxya'ja'jni'. ²¹ Maria nçxi'k āaga vxyaate', txā'sa' Jesus yasene'ga. Txā'wē kxsusni yuuna, txāa pa'gatey txajx nasa pkaltewe'sxtxi nwe'wewa'jsa' jīnak we'we.

²² Txā'wē yuuk, nawa txāniitey Dxus yuwe pta'sxsa's Dxusí kaaūusuthe'the' na'wēk we'we txāa kxtey yuukahnçxáak txā'wē yuu. ²³ Txā' na'wēk we'we:

Teeçx kna'sa' teeçx nçxi'k ji'phuna.

Txā' Emanwel kxsusni yuuna jīk.

Txāa Emanwel jīnisa': Dxusa' kwe'sx yakh ūsa' jīni'.

²⁴ Txajū' Josea' deenijū yajkxçxa', Dxus angel we'weni's nwēese'jçxa Maria txajx nyu yuuwa'jsa's nvxihtme'. ²⁵ Nawa ptam na'wē ih yu' fxi'zemeeta', María nçxi'k āaga yuupkaçx. Sa' Maria nçxi'k āaga yuute', txā'sa' Jesus yasek ki'p.

Sek kāanijuwe'sx Jesusa's weçxaya' pa'jni

2 ¹ Jesusa' Belen çxhabtek upx, Judea kiwete. Txān ensu txāa kiwesu jxkaahsa' Herodesku yu'. Naapkaçxha' Jerusalen çxhabte maz piçthē'l'j pa'jtx sek kāani kiwejuwe'sx estrelxatx jiisa. ² Sa' na'jīnatx pējx:

—çMtee ūsna judiuwe'sxtxi jxkaahwa'jsa āçxh u'se upxsa? Kwe'sxa' txajx upxni's pta'sxsa estrelxa's uytha'w sek kāani kiweju, txāasatha'w weçxaya' yuwé'.

³ Txā'jīte', Herodesa' wala kuh yajkxku, txā'wēy Jerusalen çxhabte nasawa jxukaysa. ⁴ Txajū' jxkaahsa' sacerdote npiičthē'l'jwe'sx vxite' ley kaapiya'jsawe'sx jxukaysatx pa'yaçxa' paapējxku:

—Kristo' çmteega upxwa'jsa yu'? jīte', pta'sxtxi:

⁵ —Judea kiwete Belen çxhabtek upxwa'jsa yu'. Txajūk Dxus yuwe pta'sxsa' na'jīna fxi'l'j:

⁶ Judá kiwete Belen çxhab txā'wē maa çxhabtewa jxthaakwe āhmeekwesame'.

Txāa pa'gatey Belen çxhabuh teeçx npiičthē'l'jsa kasehçxa Adx nasa Israelwe'sxtxi jxpe'jwa'jsa' jī'k.

7Txã'jîte', Herodesa' estrelxa's uysaatx paaçte pa'yaçxa pêjxku:
 —¿Makwe txaçx yuuçna estrelxa vxyaani? jîna wala ew paapêjçxak
 8Belenna kaah na'jîna neewe'weçxa:
 —Kxte me'jwe, sa' wala ew paapêyine'kwe txãa luuçx ma'wêsatewa.
 Sa' ew jiyuçxa', adxa's pta'sxine'kwe, aça' adxwa weçxaya' u'jwe'nja jîte',
 9estrelxa's uysaawe'sxa' u'jtx. Naapkaçxha' sek kãani kiweju estrelxa
 uyne'ta txãa estrelxa' txãawe'sx yaçte vxyaana u'jçxa mteene' luuçx ũsu'
 txãa kajkwete pa'jçxak kxtee yuju. 10Txã'wê estrelxa ki' vxyaate', wala
 weçxatx, 11sa' yatte u'kaçxa luuçxa's uytxi njî'j yakh. Sa' peejxūkweçxa'
 luuçxa's weçxatx. Txã'wê yūuçxatx txãawe'sx peeswa'j jxūçxa u'jni's
 phaadeçxa pees: vxyuu beh, incienso vxite' miçxa. 12Txã'wê yūuniijū' kus
 ksxa'wte pta'sxnixt yuu Herodes tasxna ki' sxawedkahnén. Aça' vxite
 dxi'jsutx sxawedna u'j.

Egipto kiwen ũphna u'jni

13Estrelxa's uysaawe'sx u'jniijū', José ksxa'wte', Dxus angel vxyaaçxa
 na'jik:
 —Kiiteçxa me'j ũphna Egipto kiwen luuçxkuê's pe'jçxa petx njî'j
 yã'jçxa. Sa' kxtee ũsune'ga adx ki' pta'sxpkaçx. Txã'wême', Herodesa'
 luuçxkuê's ikhya' pakweya'wa' jîte', 14Jose' kusçxáa pe'jna Egipto kiwen
 u'kh. 15Sa' kxteetx ũsu' Herodes uupkaçx. Dxus yuwe pta'sxsa we'weçxa':
 Egiptoju pa'yath Adx Nçxi'ka's jik txãa kxtey yuukahnçxáak txã'wê yūu.
 16Estrelxa's uysaawe'sx txã'wê Herodesa's weeçxsa na'wê vxite
 dxi'jsu u'jni's jiyuçxa', seena' wala ũusaçxak. Sa' luuçxtxi kiikhe'kh
 Belen çxhabtewe'sx vxite' peeku'jsuwe'sx yã'jçxa jxuka, luuçx e'z anxu
 ji'phsate kãhpkaçx. Estrelxa's uysaawe'sxa' makwe txaçx yã'j yuuçtewa
 pta'sxne'ta txã'sna jiyuçxak txã'wê e'z anxu ji'phsate kãhpkaçx
 kiikhe'jna ũsu' Herodesa'. 17Dxus yuwe pta'sxsa Jeremias na'jîna fxi'jni
 kxtey yuuk:

18 Teeçx ahte Ramá yaasesate pthūusek

Seena' pebeena nxus we'weni.

Txã' Raketku txã'wê ũ'ne' txajx luuçx pa'gate,

Sa' kisxi'çme', txã'wêtx ikhni yuu naa pa'ga jî'k.

19Egipto kiwete ũsçxa José ksxa'wte', Dxus angel vxyaaçxa na'jik
 Herodes uuniijū':

20—Açxha' luuçxa's ikh wêesawa uuyã'jtx, aça' pe'jçxa sxawedna me'j
 Israel kiwenîi jîte', 21Jose' sxawedna u'kh Israel kiwen luuçx petx njî'j
 yã'jçxa. 22Nawa Herodes pa'gate nçxi'k Arkelao Judeate jxkaahna ũste
 jiyuçxa', ũukhku kxtee pa'jya' yu'. Sa' ksxa'wte' pta'sxnixt yuu, txãasak
 Galilea kiwen u'j. 23Kxtee pa'jçxa', teeçx çxhab Nasaret yaasesatek u'p-
 ya' u'j. Nyafxiitey Dxus yuwe pta'sxsawe'sx we'weçxa', Jesusa' Nasareno
 ya'kxsusuna jî'tx txã'jîni kxtey yuukahnçxáak txã'wê yūu.

Juan Bautista nasa u'pnimée kiwesu Dxus yuwe's pta'sxni
(Mr 1.1-8; Lk 3.1-9, 15-17; Jn 1.19-28)

3 ¹Txãa ensu' Juan Bautista' Dxus yuwe's pta'sxna pa'kh Judea kiwesu nasa u'pniimesu. ²Sa' na'jî'k:

—Pkaltxi nvxihtçxa Dxus tasxte mixxawedwe. Txã'wême', Dxus jxkaahwa'j ena' ãjxã'kh jî'k.

³Naa Juana'sku we'wena fxi'j Dxus yuwe pta'sxsa Isaiasa' na'jîna:
 Nasa u'pnimée kiwesu sus we'weni pthüusek:
 Dxus pa'jwa'ja's mpheu'jwe,
 Dxi'ja's ku'le phaadena jî'k.

⁴Juana' kamelxo khas atxh athçxa kha'txku jxtudu'. Sa' txajx ü'nisa yu', khã'sx wala çxhi'dx miltxi yu'. ⁵Kxtee wēse'jya' pa'jtx Jerusalenuwe'sx vxite' Judea kiwesuwe'sx jxuka vxite' Jordan yu'wala utxasuwe'sxwa. ⁶Sa' txã'wē pkalsatha'w jîna Dxusa's perdon pējxna pa'jsatxi' Juana' Jordan yu'walate bautisaï'k.

⁷Nawa fxariseowe'sx vxite' saduceowe'sx txã'wē thegya' yuhte uyçxa', Juana' na'jî'k:

—I'kwe'sxa' ul weesweesa ji'ji'kwe txãa pa'ga kastigo seena'sa yuja', aç'a' txajü iyuwa'ja's çkimga pta'sx? ⁸Txã'wē kastigo seena'saju iyuwa'ja's jiyuyã'jçxa', ewçxáa yüuna mfxi'zewe, kxah maawa ew fxi'zeni's uysa': Naawe'sxa' pkaltxi nvxihtçxa Dxus luuçx yuh yuuta sūjutzna. ⁹Txã'jîte', i'kwe'sxa' na'wē iwejçx yaakxnuwe: Kwe'sxa' Abraham ji'tha'w na' pkalsameetha'w sūhna yaakxwa'j ji'phmée i'kwe. Na'jî'th na': Naa kwet yuhtxwa Abraham ji'j vxit-ya' ãjana Dxusa'. ¹⁰Txã'wē ew fxi'zemeete', ama' ih yã'j üsa' fxtüutasxtxi spē'thya'. Maa fxtüutasxwa ew yünsameetxi' spē'thçxa ipxte kabwa'jçxáa yuuna. ¹¹Adxa' i'kwe'sxtxi' yu'teçxáath bautisaï' pkaltxi nvxihtçxa Dxus tasxte sxawedsatxi'. Nawa adx e'suh vxite yuja' txã' Dxus Espiritu ipx na'wēsate bautisaïna. Txã' adxte jxthaakwe ãjawa'jsa', aç'a' adxa' txajx pelgatxiçxáa yuhtxwa üsya' seelpimeesath. ¹²Txã' skuutxh kweejxa'jni plaatu's kusete at yã'jçxa üsa' na' skuutxha's tamaju txudena süupi'jna. Txã'wē yüuçxa skuutxha's jxaawuuna. Nawa tama yu'sa' kabuna ipx bagaçxte yuhwa üçxhawa'jmeesate jî'k.

Jesus ya'bautisâyni
(Mr 1.9-11; Lk 3.21-22)

¹³Naapkaçxha' Jesusa' Galilea kiweju yuhçxa Jordan yu'wala pukate Juan üsnite pa'kh, Juan yu'te bautisâykahn. ¹⁴Nawa Juana' Jesusa's bautisây wēemeçxa na'jîk:

—Wejx yuuwa idx adxa's bautisâywa'jsag, sa' çma'wēga adxa's pi'ki' idxa's bautisâykahn? jîte', ¹⁵Jesusa' na'wēk pas:

—Dxus jxthãasni's kxtey yuuní wejx ewna jíte', Juana' kxtey nwēese'kh. ¹⁶Aça' Jesusa' yu'te ya'bautisãyçxa kasejeçpkaçxha', cielu' phaatek, açà' Jesusa' uyku Dxus Espiritu tub çxihme na'wësa txajx kajkwete kijaçte. ¹⁷Aça' we'weniwa pthũusek cieluju na'ljina:

—Naafi Adx Nçxi'k wala wedxnisa'. Txãa pa'ga wala weçxana ũsthu jĩk.

Eçxthêj Jesusa's isxii wëeni

(Mr 1.12-13; Lk 4.1-13)

4 ¹Txajũ' Dxus Espiritu' Jesusa's pe'ljna u'kh nasa u'pnimée kiwesu, kxteea' eçxthêj isxii wëeni fxi'zeya'. ²Sa' kuarenta en kuarenta kus kihwa ũmée u'pçxa', Jesusa' wëek. ³Aça' eçxthêja' Jesus tasxte utxaaçxa na'ljinak we'we ewmée vxit wëeçxa:

—Dxus Nçxi'k dxihçxa', naa kwettxi pan myuukaah jíte', Jesusa' na'wëk pas:

⁴—Dxus librute na'lji'k: Nasa' pan yakhçxáa yu' itxi fxi'zemeetxna, naasáa jxuka Dxus we'weni yakh yuuçxáa itxi fxi'zetxna jĩk.

⁵Txajũ' eçxthêja' Jesusa's pe'ljna u'kh Jerusalem çxhabna, sa' kxteea' dxuus yatte êete kaateka'jçxa, ⁶na'wëk jxkaah:

—Dxus Nçxi'k dxihçxa', ay êejũ müph. Txãa pa'gatey Dxus librute na'wëk we'we':

Dxusa' txajx angeleswe'sxtxi jxkaajana idxa's nwe'wekahn.

Aça' txãawe'sxa' kusete jxpa'gatxna,

Iidx çxida kwette kpã'yuukahmen jina fxi'jni' jíte',

⁷Jesusa' na'wëk pas:

—Vxite ahte Dxus librute' na'wëk we'we':

Iidxna jxpe'ljsa Dxusa's jxkaahwa'lj ji'phmeeg jina fxi'jni' jĩk.

⁸Txajũ' eçxthêja' ki' pe'ljna u'kh vxix walate, sa' txãajũ maa kiwesu çxhabtxiwa seena' zhiçxkwesa's kaavxya'jak. ⁹Sa' na'ljik:

—Adxa's peejxũkweçxa neewe'wene'ga açà' adxa' na'sa' jxuka idxa's ũsu'nja jíte', ¹⁰Jesus pasçxa':

—Eçxthêj, adx tasxu mtzutée, txãa pa'gatey Dxus librute na'lji'k:

Iidxna jxpe'ljsa Dxusçxá's neewe'wewa'ja', sa' txãaçxá's selpiwa'ja'

jina fxi'jni' jíte',

¹¹eçxthêja' Jesus tasxu txuteek, açà' Dxus angeleswe'sxa' pu'çxya' paljtx.

Galilea kiwesu Jesus mjiiya' takhni

(Mr 1.14-15; Lk 4.14-15)

¹²Juan Bautista' kxuuphni ũsa' jini's Jesusa' jiyuçxa', Galilea kiwen u'kh. ¹³Nawa Nasaret çxhabte yu' yujumée, Kapernaum çxhabtek u'p-ya' u'j. Txãa çxhaba' Zabulón vxite' Nefxtalí kiwe txãa ja'dasuk ũsu' ikh pukaga. ¹⁴Txã'wë yũuk nawa Dxus yuwe pta'sxsa Isaias fxi'jni kxtey yuukahnçxáak txã'wë yũu. Txã' na'ljinak fxi'j:

15 Zabolón Nefxtalí txāawe'sx kiwesu u'psa,
 Vxite' íkh pukasu dxi'j u'jna ūsa' txāa ja'dasu u'psa,
 Vxite' Jordan yu'kuteju, sek kāani ju'guwe'sx,
 Vxite' Galilea kiwesu judiu ji'ljmeesawe'sx

16 Txāa nasa' çxhi'dxte ūssa na'wē ūççxawa,
 Eena'sa's uytxi.
 Sa' uuní na'wēçxáa yā'j ūstewa,
 Eena'sa' kweethku jī'k.

17Txajū' Jesusa' Dxus yuwe's pta'sxya' takhku:

—I'kwe'sxa' pkaltxi nvxihtçxa Dxus tasxte misxawedwe. Txā'wēme',
 Dxus jxkaahwa'j ena' ājxā'kh jī'k.

Wedx uwesáa pahzsatx Jesus pa'yani

(Mr 1.16-20; Lk 5.1-11)

18 Jesusa' Galilea íkh pukasu u'jweççxa', e'z pxakhtxi uyku, Adres
 vxite nyakha's Simon Pedro jī'tx txāawe'sxtxi. Txāawe'sxa' wedx
 uwesaatx yu', txāasatx wedx ukhe's íkhte akhna ūsu'. 19Aça' Jesusa'
 na'jik:

—Adx yakh myuhwe, aça' Dxus jīi nasaa pkhakhwa'jsa vxitu'nja
 i'kwe'sxtxi'. 20Txā'jīçpkaçxha', wedx ukhetx nvxihtçxa txāa yakh u'jtx.

21Aça' Jesusa' txāajū wejkuē u'jnaçxáa, vxite e'z pxakhtxi uyku,
 Zebedeo nçxi'kwe'sx Jakobo vxite' Juan txāawe'sxtxi. Txāawe'sxa'
 barkote ney yakhtxi u'p yu', wedx ukhe's pā'khna. Aça' Jesusa' pa'yak.
 22Naapkaçxha' barko vxite' txāawe'sx neyna nvxihtna'wa Jesus yakh
 u'jtx.

Nasa seena' wala kuhsatx Jesus kaapiya'jni

(Lk 6.17-19)

23 Jesusa' Galilea kiwe jxukak pekūh, judiuwe'sx pkhaakheni yat-
 su Dxus jxkaahwa'j yuwe ewsa's pta'sxna, txā'wēy nasa kīh weete
 āça'satxwa jxuka nuykatxhik. 24Txajū' Siria kiwesuwe'sx jxuka jiyutx
 Jesus txā'wē yūuni's. Txāa pa'gatx fxiyfxiy āça'satxwa jxuka jxūna
 pa'j, aka jī'phsa vxite' eçx iiyamunisa vxite' wēeçxpā'jsa vxite' ēseya'
 ājasameetxwa jxuka. Txā'wēsaxku Jesusa' nuykatxhi. 25Txajū' Jesus
 yakh pi'kxna u'juya' nasa wala utxaatx, Galileajuwe'sx vxite' Dekapolis
 kiwesuwe'sx vxite' Jerusalenuwe'sx vxite' Judea kiwesuwe'sx vxite'
 Jordan yu'kutejuwe'sx.

Thā'j vxiçte Jesus kaapiya'jni

5 1Nasa wala kuh kasehte uyçxa', Jesusa' txajx txhitxhnisawe'sxtxi
 thā'thek pe'jna u'j. Aça' txāawe'sxa' txajx tasxte utxaate', 2na'wēk
 kaapiya'jya' takh:

Kim weçxana fxi'zewa'jsatxki
(Lk 6.20-23)

³Wala yuh weçxa yuja' Dxusa's peejxçxa pakwesáa yakha', txáa pa'gatey txá'wē yūusa' Dxus jxkaahna ūsnite u'kaya' ājawa'jsata' naa pa'ga.

⁴Wala yuh weçxa yuja' ewmeete fxi'zeni's jiyuçxa ū'nena Dxusa's yaakxxa yakha', txáa pa'gatey txá'wē yūusa' Dxus kvxiisxa'jni yuuwa'jsata' naa pa'ga.

⁵Wala yuh weçxa yuja' wa'lmée Dxus tasxte utxasáa yakha', txáa pa'gatey txá'wē yūusá' naa kiwe jxuka txáawe'sx jiiçxaçxáa yuuna pa'jwa'jsa' naa pa'ga.

⁶Wala yuh weçxa yuja' Dxus dxi'pte ew fxi'zewa'ja's yuuçxáa ūsuh jxuka yajkxçxa pakwesáa yakha', txáa pa'gatey txá'wē yūusaatxi' Dxusa' pu'çxhina.

⁷Wala yuh weçxa yuja' vxitetx peeygāhna fxi'zesa yakha', txáa pa'gatey txá'wē yūusa' Dxus peeygānitx fxi'ze' naa pa'ga.

⁸Wala yuh weçxa yuja' ūuste kíh pkala's yuhwa ka'ga'jmée fxi'zesa yakha', txáa pa'gatey txá'wē yūusa' Dxusa's uyya' ājawa'jsata' naa pa'ga.

⁹Wala yuh weçxa yuja' puiimée fxi'zewa'ja's pakwesáa yakha', txáa pa'gatey txá'wē yūusa' Dxus luuçxta' naa pa'ga.

¹⁰Wala yuh weçxa yuja' Dxus yakh fxi'zepa'ga yahçena fxi'zesa yakha', txáa pa'gatey txá'wē yūuni fxi'zeçxawa Dxus jxkaahna ūsnite u'kawa'jsata' naa pa'ga.

¹¹I'kwe'sxa' wala yuh weçxana mfxi'zewe, adxna nwēese'pha'gaçxáa nasa' wēesxuna pkxuuna kijkihwa ewmée nuywe'weçtewa. ¹²Txáa pa'gatey cielute' wala yuh jxpa'gawa'lj ji'phi'kwe naa pa'ga. Dxus yuwe pta'sxsa txāniiteywe'sxtxi txā'wētx pkxuu na' āçxhwa txā'wēyçxáa yuutxna, nawa nxusmée weçxana mfxi'zewe.

Naa kiwete nega na'wē pēethenna eena' kweethwa'jsa
(Mr 9.50; Lk 14.34-35)

¹³I'kwe'sxa' nega na'wē naa kiwete pēethewa'jsa i'kwe. Nawa nega' sxūukāhçxa', çma'wē pēethejex? Kíh yūuwa'lj yuhwa selpimeena, naasáa puhbçxa nasaa wakhi'khi'jwa'ljçxáa yuuna.

¹⁴I'kwe'sxa' naa kiwete eena' kweethsa i'kwe. Teeçx çxhab thā'lj vxiçga ūssa' çnasa uynimée ūsma'k? ¹⁵Lampara's aphçxa txajxa' txá'wē ya'pki'ta'çme', wejxwa āatek ya'txaja', yatte jxuka kweethkahn. ¹⁶Txā'wēy i'kwe'sxwa eena' mkweethwe nasaa dxi'pte, kxah i'kwe'sx ew fxi'zeni's uyçxa', Dxus ewsa ūsyuju'ga jīna we'wētxna i'kwe'sx Tata cielute ūssa's.

Moises leya's Jesus āate kaapiya'jni

¹⁷Moises ley vxite' Dxus yuwe pta'sxsawe'sx kaapiya'jni txāatx nwēese'jya'méene' yuwé' sūhna yaakxnuwe adxa's. Txā'wē yūuyua' yuwe'çmeeth,

wejxwa txāa leya's jxthaakwe ew āate kaajiyu'jya'th yuwé! ¹⁸Isath pta'sxi', cielu petx kiwe yā'jçxa skhēwpkaçx txāa leytxi' le'çxkuēçxāa yuhwa e'skhē nvxihtmée jxuka nwēese'jwa'tha! ¹⁹Txāa pa'ga maawa txāa ley jxkaahnitx wala le'çxkuēesa kīhtewa selpiwa'jmeesa na'wē thegte txāatxi' nvxihtçxa, nasatxwa txā'wē yūuya' ūçxāa kaapiya'jana na', txā'wē yūusa' Dxus jxkaahna ūsnite le'çxkuēçxāa seelpisa' jīni yuuna. Nawa txāa leytxi le'çxkuēçxāa yuhwa nvxihtmée jxuka nwēese'jçxa vxitetxwa txā'wēy nwēese'jya' kaapiya'jsa', Dxus jxkaahna ūsnite wala seelpisa' jīni yuuna. ²⁰Na'ji'th na': i'kwe'sxa' kaapiya'jsawe'sx vxite' fxariseowe'sx fxi'zenite jxthaakwe ew fxi'zemeççxa', bagaçxte yuhwa Dxus jxkaahna ūsnite u'kaya' ājameene'kwe.

Ūsçxawa'jme'

(Lk 12.57-59)

²¹I'kwe'sx yaççawe'sxtxi na'jīna kaapiya'jni's iiwēse'jne'kwe: Nasa ikhwa'jme'. Txā'wēme', nasa ikhsatxi's maatxwa kastigāywa'j yuuna jī'tx. ²²Nawa adxa' na'wēth jxkaaja': Nasa yu's ikhmeeçxawa, peekx yakthē'ja's ūsçxa yaakxpagaççāa txāawa yuuwesa kastigāywa'j yuuna. Meeçxawa peekx yakthē'ja's wāa açewe'wena aça' txā'sa' khuēswe'sx tasxte jxūna u'jni yuuna. Sa' peekx yakthē'ja's wēesxute', txā'sa' kastigo infxiernote akhwa'j yuuna. ²³Txā'wē Dxusna peeswa'j ofxreda's jxūna pa'jçxa altalte akhme'y yaakiwá'ga iidx yakthē'j idxa's açeni's, ²⁴sa' txāa ofxreda's altal pukate nvxihtna'wa u'jwene'ga iidx yakthē'ja's perdon pējxya'. Txā'wē yūuçxa txāa ofxreda's altalte akhene'ga.

²⁵Maawa idxa's açesa pāatxhī'khçxa khuēs tasxna jxūna u'jweçte', khuēs tasxte pa'jmey dxi'kha mpuutxwe'we khuēs tasxte jxūna u'khamen. Txā'wēme' khuēsa' policiawe'sxtxi dukhte', txāawe'sxa' karcelte txajatxna. ²⁶Adxa' isath we'we', txajūyā'ja' kasejxa' ājameene'ga vxyu nmeh jī'phuni's dukhmeeçxa yu'.

Ptamsa vxite yakh pkal yuua'jme'

²⁷I'kwe'sxa' iiwēse'jne'kwe na'jīna nyafxiitey kaapiya'jni's: Ptamsayā'ja' vxite yakh pkal yuua'jme' jīni's. ²⁸Nawa adxa' na'wēth jxkaaja': Vxite yakh yu' pkal yuumeççxawa, teeçx u'ya's ewmée yajkççxa thegni yakhççāa, pkal yā'kh yu' txajx ūuste.

²⁹Yafxa' idxa's pkalte kweete'phççāh yuuçte', kutxi'jçxa mwāatah. Wejxwa teeçx yafçççá's ivxiituçxa', kakwe jxuka yu' infxiernote akhni yuunimée wejx ewa'. ³⁰Meeçxa' paçu kuse txā'wē pkalte kweete'phççāh yuuçte', spē'thççxa mwāatah. Wejxwa teeçx kuseççá's ivxiituçxa', kakwe jxuka yu' infxiernote akhni yuunimée wejx ewa'.

Ptamusa' txuteewa'jme'

(Mt 19.9; Mr 10.11-12; Lk 16.18)

³¹Txā'wēy nyafxiitey na'jīna pta'sxni'swa iiwēse'jne'kwe: Maawa nyu yakh txuteeççxa', txāa txuteni's eçte fxi'jçxa nvxiitwa'ja' jīnatx

kaapiya'ja'. ³²Nawa adxa' na'wëth jxkaaja': Nyua' vxite yakh pkal yũuteçxáa nmi'a' txuteeya' ājana. Txā'wëme!, pkal yũusameete peekçxáa nmi'a' txuteeçxa', vxite yakh pkalte weteewa'ja's dxi'j phaadesa yuuna. Txāa pa'ga maa piçthē'jwa txāa u'y nvxiitnisa yakh ptamuuçxa', txāawa pkaltek wetesá yuuna pa'ja'.

Jurāywa'jme'

³³I'kwe'sx yaçgawe'sxtxi na'wë kaapiya'jni'swa iiwëse'jne'kwe: Dxus yase's kxsusçxa jurāyni's ĩsxiimée kxtey yuuwa'ja' jī'tx. ³⁴Nawa adxa' na'wëth jxkaaja': Kxtey yuune'jmeeçxa', ma'wësaçxáa yuhtxwa kxsusna jurāywa'jme'. Cielu's kxsusna jurāynuwe, txā' Dxus jxkaahna ũsni' naa pa'ga. ³⁵Sa' kiwe'swa kxsusna jurāynuwe, txāa kiwe' dxuus çxida txaahwa'j vxitnisa' naa pa'ga. Sa' Jerusalennawa kxsusna jurāynuwe, txāa çxhaba' jxkaahsa çxhaba' naa pa'ga. ³⁶Sa' peekx dxikthe's kxsusnawa jurāynuwe, txāa pa'gatey idxa' kīhte yuhwa seelpimeesag Dxus dxi'pte naa pa'ga. Txāasa teeçx dxkhasçxáa yuhnawa çxihme vxit-ya' ājawa'jsameeg, sa' khüçxwa vxit-ya' ājameene'ga. ³⁷Jurāywa'j peejxme', isasa's teeçx jwedçxáa mwe'wewe, jiiçxa' jii íith jīna, jiimeeçxa' jiimeeth jīna. Txā'wëme!, ĩsxiina we'wenisa' eçxthē'j kwe'we'jni'.

Iideewewa'jme'

(Lk 6.29-30)

³⁸I'kwe'sxa' iiwëse'jne'kwe na'jīna nyafxiitey kaapiya'jni's: Iidx yafxa's kpā'vxitte!, ka'tuwa txā'wëy myũu. Sa' iidx ki'tha's çxkahdete!, ka'tuwa txā'wëy myũu jī'tx. ³⁹Nawa adxa' na'wëth jxkaaja': Iidxna ewmée yũusa's ka'tuja' iideewenu. Txā'wë yũumée, iidx dxi'pga pehtxate!, ka'tu ju'guwe'sxnawa petxakahn mes. ⁴⁰Meeçxawa idxa's pāatxhī'khçxa iidx kmiisa's kusa'jaçte!, jxkaaçni atxhnawa mes jxūna u'khan. ⁴¹Teeçx ta'gute pa'j tu'sçxa nvxiht-ya' u'ljwa'ja's jxkaathe!, e'z ta'gute pa'j nvxiht-ya' me'j. ⁴²Maawa kīhçxáawa idxa's thāaste!, mes. Sa' pki'the!, wa'lwa'jme' jī'phçxa'.

Açesatx peeygāawa'ja'

(Lk 6.27-28, 32-36)

⁴³Nyafxiitey na'jīna kaapiya'jni'swa iiwëse'jne'kwe: Nasatxi' mpeeygāh, nawa açesa yuutxi' peeygāanu jī'tx. ⁴⁴Nawa adxa' na'wëth jxkaaja': I'kwe'sxtxi açesatxi' mpeeygāhwe, sa' kxsewna ewmée we'wesatxi' ka'tu' ewçxáa mwe'wewe. Açesatxi' ew yũuna mfxi'zewe. Wëesxuna pkxuusatxi' txāawe'sx pa'gate Dxusa's mneewe'wewe nwe'wekahn. ⁴⁵Txā'wë yũuçxaçxáa i'kwe'sx Tata cielute ũssa luuççxçxa txā'wë yuune'kwe. Txā' maa nasatxwa seka's kaakweethe'je'k, ewsa ma'k yuu meeçxa' ewmeesa ma'k yuu nawa jxukaysatx. Sa' txā'wëy nusnawa kaja'k, ew yũusa

ma'k yuu meeçxa' ewmée yūusa ma'k yuu nawa jxukaysatx. ⁴⁶Txā'wē i'kwe'sxtxi peeygāasaçxáatx ka'tuwa peeygāhçxa', ew yūusatha'w çjīya' ājama'kwe? Makwe nasa ewmeesa gobierno jīi vxxy pkhaksawe'sxwa txā'wē yūuwa'ljçxáa yu'sa' āja'tx açá'. ⁴⁷I'kwe'sx yakthhē'jwe'sxçxáatx weçxate', çkīh ew yūuni yaasena? Txā'wē yūuwa'lj yu'sa' Dxusna jiimeesawa kxteytxi yū'. ⁴⁸I'kwe'sx Tata cielute ūssa' maa yakhwa jxuka ewsa' naa pa'ga i'kwe'sxwa txā'wēy mfxi'zewe.

Jxpa'yakx ew yūuwa'ja'

6 ¹I'kwe'sx ew yūuni's nasa uyçxa ew we'we jxthāasçxa mjīini's wala mpa'yajkxwe. Txā'wē ew we'we jxthāasçxaçxáa ew yūuna fxi'zete', iidx Tata cielute ūssa' kīh yuhwa dewemeena. ²Txāa pa'ga peejxsatx kīhçxáawa peesu'ççxa', nasa uykahn sūhçxa nasa ksxavxyte txā'wē yūunu. Āateçxáa ew we'wesawe'sxçxáatx txā'wē yū' judiwe'sx pkhaakheni yat-su vxite' klxiikhunsu, nasa' uyçxa' ew yuh yū'k jīna tuuthe'lj jxthāasçxatx txāawe'sxa' txā'wē yū'. Nawa adxa' isath we'we': Txā'wē yūuçxa', nasaa pwe'sx tuuthe'ljniçxáatx fxi'ze'. ³Nawa peejxsatx kīhçxáawa peesu'ççxa', kim yuhwa jiyunimeete paaçte txā'wē myūu. ⁴Açá' paaçte txā'wē yūuçte iidx Tata uyçxa', idxa's deweena.

Dxus yakh na'wē puutx we'wewa'ja'

(Lk 11.2-4)

⁵I'kwe'sxa' Dxus yakh puutx we'weççxa', āateçxáa ew we'wesawe'sx na'wē yūunuwe. Txāawe'sxa' judiwe'sx pkhaakheni yat-su vxite' klxiikhunsu yujuçxatx Dxus yakh puutx we'wena pekūju' nasa uykahn sūhçxa. Isath we'we', txā'wē yūuçxa' nasaa tuuthe'ljniçxáatx fxi'ze'. ⁶Nawa idxa' Dxus yakh puutx we'weççxa', yat dxiite u'kaçxa vxitxa's aphçxa kim yuhwa uynimeete mpuutxwe'we. Açá' txā'wē paaçte puutx we'wete', iidx Tata cielute ūssa' deweena.

⁷Dxus yakh puutx we'weççxa', lxisasáa na'wē txā'snafiçxáa kuh us peenana ūswa'ljme'. Dxusa's jiimeesaçxáatx txā'wē yū', wala we'wete', Dxusa' wēsel'jena sūhçxa. ⁸Txāawe'sx na'wēy yūunuwe. Txā'wē yūumeetewa, i'kwe'sx Tata' jiiyā'ja' i'kwe'sx peejini's pējxumeyna. ⁹Txāa pa'ga i'kwe'sxa' na'wēçxáa Dxus yakh puutx we'wena na'ljīne'kwe:

Kwe'sx Tata cielute ūssa

Idxa' багаçxtewa jxtuhthe nes yuune'ga.

¹⁰ Iidx jxkaahwa'lj ena'sçxáatha'w ūythasu',

Naa kiwete idx ma'wēne'ga jxthāasu' txā'snaçxáa kxtey tee yuu cielute na'wēy.

¹¹ Kwe'sx ū'wa'lj een isa peejini's meen pees.

¹² Kwe'sx ewmée yūuni's meen peltunaī, kwe'sxwa ma'wētka'w peltunāy kwe'sxtxi ewmée yūusatx txā'wēy.

¹³ Ewmeete wetekahmén, meen nwe'we.

Txãa pa'gategy idx yuuçxáa kíhtewa jxuka ãjawa'jsag, sa' bagaçxtewa idx yuuçxáa jxkaahna nes yuuwa'jsag.

¹⁴ Txã'wẽ i'kwe'sxwa ewmée yūusatx peltunãyte', i'kwe'sx Tata cielute ũssawa peltunaĩna i'kwe'sxtxi. ¹⁵ Nawa ewmée yūusatx peltunaĩmeete', i'kwe'sx Tatawa peltunaĩmeena i'kwe'sxtxi.

Dxus yakh puutx we'weya' yūunani's kaapiya'jni

¹⁶ I'kwe'sxa' yūunaççxa', maa nasawa uykahn sūhçxa ãate kaavxya'ja'jwa'jme'. Áateçxáa ewtha'w jisaçxáatx txã'wẽ yū' nasa jiyukahn. Isath we'we': Txã'wẽ yūuçxa' nasaa tuuthe'jniçxáatx fxi'ze'.

¹⁷ Nawa idx txã'wẽ yūunaççxa', dxi'pna pçxhĩ'çxçxa dxkhasnawa ew mkid, ¹⁸ kxah idx yūunani's ãate kaavxya'ja'jmeete', nasa jiyumeetxna, naasáa iidx Tata yuuçxáa jiyuçxa idxa's deweena.

Cielute ji'phuwa'jçxá's mpa'pçxuwe

(Lk 12.33-34)

¹⁹ Naa kiwete kíjkíhwa ji'phuwa'ja's pa'pçxunuwe. Txã'wẽme', wes ũ'we'tx, aça' izwa suwu'tx. Naapkaçxha' peswé' pa'jçxa ji'phuni's kutxi'j'tx.

²⁰ Wejxwa cielute ji'phuwa'jçxá's wala mpa'pçxuwe. Kxteea' weswa ũ'meena, aça' izwa suwmeena, pesweewa kutxi'jmeena. ²¹ Txãa pa'gategy mtee jxaawni ji'phçxa', kxte yuuçxáak wejx jxthaakwe yajkxna ya'fxi'ze'.

Yafxa' kakwe's ewte kaafxi'ze'jsata'

(Lk 11.34-36)

²² Yafxa' kakwe's ewte kaafxi'ze'jsata'. Txã'wẽ iidx yafxa' ewsaçxá's thegsate', iidx kakwe' ewte sxiigmée fxi'zena. ²³ Nawa iidx yafxa' ewmeesaçxá's thegsate', iidx kakwe' jxuka ewmeete çxhi'dxteçxáa fxi'zena. Txã'wẽ eena'te ew kaafxi'ze'jwa'jsa yuu ewmeete çxhi'dxtewe'sxa'sçxáa thegsate', bagaçxte yuhwa eena'te fxi'zewa'ja's ya'ji'phumeena.

Dxusna yajkxna vxite' naa kiwete ji'phuni'swa yajkxna fxi'zeni

(Lk 16.13)

²⁴ Kim yuhwa e'z patrontxi selpiia' ãjameena. Txã'wẽ vxiteçxá's wedxna fxi'zeçxa', vxite patron yu'sa' açena. Sa' teeçxsa jxkaahniçxá's kxtey yuuçxa', vxite patron jxkaahni yu'sa' kxtey yuuya' ãjameena. Txã'wẽy naa kiwete ji'phuni's pa'pçxuna Dxusnawa selpiina yuuya' ya'ãja'çme'.

Kwe'sx peejini's Dxusa' jxuka pu'çxhina

(Lk 12.22-31)

²⁵ Na'wẽth yu'kxpeje': I'kwe'sxa' kíh yuhwa kuh yajkxmée mfxi'zewe, ¿kíh ũ'wekxtha'w? sa' ¿kíh athehxtha'w? sūhna. Txãa pa'gategy ũ'nisate

jxthaakwe peejsa itxi fxi'zeni's ji'phyã'ji'kwe, sa' athnisate jxthaakwe peejsa kakwe'swa ji'phyã'ji'kwe naa pa'ga. ²⁶Mthegwe êesu fxuusa vxiçxakwetx. Txãawe'sxa' uja'çmeeta', sa' ù' pkhakhe'çwameeta', sa' tee jwedte jxaawu'çwameeta'. Txã'wētewa i'kwe'sx Tata cielute ùssa' txãa vxiçxakwetxi' peejxmee k sã'ji'. I'kwe'sxa' txãa vxiçxakwete jxthaakwe pa'gasa i'kwe, aç'a' wejx txã'wē sã'jina. ²⁷Txã'wē wala pa'pçxuça' ç'i'kwe'sx maaçxá' peena medio metro thaakwe walaaya' aja'kwe'?

²⁸çKijxa'çxáakwe txakwe pa'pçxu' i'kwe'sx athwa'j ropaçxá's? Mthegwe kite tasxtxi. Txãawe'sxa' mji'çmeeta', sa' khaswa pudu'çmeeta', nawa ma'wēta zhiçxkwe walá'. ²⁹Na'ji'th na': Jxkaahsa Salomon yuhwa txãa kite tasx na'wē yu' zhiçxkwe iijxūme' makwe wala ji'phsaçxawa. ³⁰Txã'wē kite tasxa' açxhii yu' zhiçxkwe üsçxawa, kuskusa' ipxte kabwa'jçxáak yu', nawa txã'wēsa'swa Dxusa' wala zhiçxkwe pheu'ju'k na' i'kwe'sxtxi' wejx thaakwe ew pheu'juna. Txãa sūjxa' aja'çmeene'kwe. ³¹Txãa pa'ga i'kwe'sxa' kīh yuhwa kuh yajxnmée mfxi'zewe, çkīh ù'wekxtha'w? sa' çkīh athekxtha'w? sūhna. ³²Dxusna jiimeesaçxáatx txã'wē kuh yajxna fxi'ze'. Nawa i'kwe'sxa' cielute Tata ji'phi'kwe txã' jxuka jiia' i'kwe'sx peejini's. ³³Txãa pa'ga i'kwe'sxa' Dxus yakh fxi'zewa'ja's khuē'y wejx thaakwe mpa'pçxuwe, txajüyäl'ja' kīhwa thēymée vxyaana. ³⁴Åçxha' jiyui'kwe na' kuskuskhēwe'sxa's üythasna pa'pçxunuwe. Txã'wēme', kuskuskhē' pa'pçxuwa'j thaakwe thēysa pa'jana een isa fxiyfxiysa.

Jiimeeçxa' nuywe'wewa'jme'

(Lk 6.37-38, 41-42)

7 ¹Ma'wēsatewa jiimeeçxa', ewmeesata' jina nuywe'wewa'jme', Dxus dxi'pte i'kwe'sxwa ewmeesa yuuya'mée. ²Txã'wēme', vxitesatx nuywe'wete', Dxusa' i'kwe'sxtxiwa ewmeesata' jçxa kastigaína nuywe'wepa'ga. I'kwe'sx ma'wē juuna' yūute', Dxuswa txã'wēyçxáa juuna' kastigaína. ³Iidx yakthē'j yafxte kxtā' le'çxkuēesa khēeçxa üste çma'wē uyuki'g iidx yafxte yu' fxtū pe'la yuu walasa khēeçxa üste txã's khuē'y kutxi'jmeeçxa'? ⁴Sa' çma'wē iidx yakthē'ja's kxtā' le'çxkuēesa iidx yafxte ji'phgu txã'sa' kutxi'jith jina we'weki'g, txã'wē iidx yafxte yu' fxtū pe'la walasa's ji'phçxa'? ⁵Aakheçxáa ew we'wena ul'jusa, iidx yafxte fxtū pe'la walasa's khuē'y mkuutxi'j. Txã'wē yūuçxa iidx yakthē'j yafxte kxtā' le'çxkuēesa's ew uyçxa kutxi'jya' ajjane'ga.

⁶Dxus yuwe's alkutx üswal'jme', sa' kuçxixtwa üswal'jme'. Txã'wēme', jxuka wa'khi'khi'jçxa üusaçxayäl'jçxa, üssa i'kwe'sxtxi íçxáa wa'kxya' kūjuxtna.

Dxusa's pēyni vxitxte tu'kakana

(Lk 11.9-13; 6.31)

⁷Dxusa's mpējxwe, aç'a' üsuna, sa' pakweçxa', uyuune'kwe. Vxitxte mtu'kakawe, aç'a' phaadena. ⁸Txã'wē maawa pēysa' jxpa'gana, aç'a' pakwesá' uyuuna. Vxitxte tu'kakate', phaadeni yuuna.

⁹I'kwe'sx pwe'sx maaçxa' i'kwe'sx luuçx pan thãaste', çkweta's ũsma'kwe? ¹⁰Meeçxa' wedx thãaste', çula's ũsma'kwe? ¹¹I'kwe'sxa' Dxus dxi'pte ewmeesaçxawa, i'kwe'sx luuçxtxi' ewsaçxáa i'kwe peesu', aça' i'kwe'sx Tata cielute ũssa' wejx thaakwe ewsa's peesuna thãassatxi'.

¹²Bagaçxtewa i'kwe'sxtxi' maa nasawa ewçxáa yūuna fxi'ze jxthãasçxa', i'kwe'sxwa txã'wēy maa nasatxwa ewçxáa yūuna mfxi'zewe. Txãa pa'gatey Moises ley vxite' Dxus yuwe pta'sxsawe'sx fxi'jniwa txã'wēçxaçxáatx jxkaaja'.

Vxix pteeza

(Lk 13.24)

¹³Vxix pteezte me'kawe. Txã'wēme', vxituwa'the u'kawa'lj vxitxa' wala tape', aça' dxi'jwa txã'wēy tape'. Kxteea' wala kuhsa u'kana ũsta'. ¹⁴Naapkaçxha' vxitumée Dxus tasxte pa'jwa'lj vxitxa' pteeza', aça' dxi'jwa txã'wēy pteeza'. Kxtee yu' kuhmeeçxáa u'kana ũsta'.

Nasa ma'wē yuuçtewa mpa'yajxwe jiyuya'

(Lk 6.43-44)

¹⁵Dxus jxkaahnisatha'w jīna īsxiisatxi' mpa'yajxwe. Txãawe'sxa' i'kwe'sx tasxte yu' piisxáa kakwe yakhtxi vxya', nawa ũuste yu' yu'kh eçx weeswée na'wēsata'. ¹⁶I'kwe'sxa' txãawe'sx fxi'zeni's jiyune'kwe. Miiyajxwe: Uwa's çhūçh tasxte ya'ude'çme', sa' brewa's khãas tasxte ya'ude'çme'. ¹⁷Txã'wē fxtūu tasx ewsa' ewsaçxáak yūnu', aça' fxtūu tasx ewmeesa' ewmeesa'īçxáak yūnu'. ¹⁸Fxtūu tasx ewsa' ũ' ewmeesa's yūnya' ājameena. Txã'wēy fxtūu tasx ewmeesa' ũ' ewsa's yūnya' ājameena. ¹⁹Maa fxtūu tasxwa ewmée yūnsa's spē'thçxa ipxte ya'kabu'k. ²⁰Txãa pa'ga txãawe'sx fxi'zeni's uyçxa jiyune'kwe ma'wēsatawa.

Jxukaysa yu' cielute u'kameetxna

(Lk 13.25-27)

²¹Yuwejuçxáa adxa's ew we'wesa jxuka yu' cielute Dxus jxkaahna ũsnite u'kawa'ljsameeta', naasáa adx Tata jxthãasni's kxtey yuusaçxáa cielute u'kawa'ljsata'. ²²Txãasa cielute u'kawa'lj en āhte', wala yuh maawa adxa's na'ljixna: Kwe'sxtxi' jxpe'lja mwēese'lj: Kwe'sxa' iidx yuwe's pta'sxtha'w, sa' iidx yase's kxsusçxa eçxthē'ljtxwa kutxi'tha'w, sa' kim yuhwa ājanimeesa'swa kaavxya'ja'tha'w maz uswa jixna. ²³Nawa adxa' na'ljīna pasu'nja: Bagaçxte yuhwa adx jxpe'ljnisa yu'çmeei'kwe, naa pa'ga i'kwe'sxtxi' jiimeeth. Ewmée yūuna fxi'zesa' adx tasxtewe'sx mee'i'kwe.

Dxusa's nwēese'lja vxite' Dxusa's nwēese'ljamée

(Lk 6.47-49; Mr 1.22)

²⁴Maawa adx jxkaahni's wēse'lçxa kxtey yuusa', yat txajxa' jiisa na'wēsa yuuna: Txãa yata's kwette kaaçxida'ljçxa txahte', ²⁵nus pa'ljna,

wejxa wala kiitena, yu' walaana yuuçxawa, yata's suwme!, kwette kaaçxida'jçxa txaahnipa'ga. ²⁶Nawa maawa adx jxkaahni's wëse'jçxawa kxtey yuusame!, yat txajxa' jiimeesa na'wësa yuuna: Txãa yata's kwetmuseteçxáa txahte!, ²⁷nus pa'jna, wejxa wala kiitena, yu' walaana yuute!, txãa yata' weteçxa jxuka suweek jík.

²⁸Txajü! Jesusa we'wena jxã'the!, nasa' wala kuh yajkxna neeyüutx txajx kaapiya'jni's wëse'jçxa, ²⁹txã'wë leya's kaapiya'jsawe'sx na'wëmée, nwëese'jwa'ja's üukhnus we'wena kaapiya'pha'ga.

Teeçx piçthë'j wã'jy weete äça'sa's Jesus nuykatxhini

(Mr 1.40-45; Lk 5.12-16)

8 ¹Jesusa' thã'j vxïçu kíhte!, nasa iiméh wala kuh pkhaakhetx. ²Aça' teeçx piçthë'j wã'jy wee seena' kazxsate äça'sa Jesus tasxte utxaaçxa peejxükweçxa na'jïnak pxthaa we'we:

—Adxa's peeygãhçxa' nuykatxhine'ga naa weeju jïte!, ³Jesusa' na'jïnak kuseju jxa'dx:

—Ahçemée peeygãanisag, naa pa'ga katxhiçxa mneeyüu jïçpkaçxa!, txãa wã'jy weeju katxhiçxak neeyüu. ⁴Aça' Jesusa' na'wëk jxkaah:

—Maa yuhtxwa pta'sxmeene'ga, naasáa sacerdote yuuçxáana iidx kakwe's txwesya' me'j. Sa' Moises ma'wëga jxkaaja' txã'sçxáa kxtey yuune'ga, kxah nasa jxukaysa jiyutxna idx ew katxhiçxa neeyüutewa jík.

Soldau kpiitan jxpe'jnisa's Jesus nuykatxhini

(Lk 7.1-10)

⁵Txajü! Jesusa' Kapernaum çxhabte pa'the!, soldau kpiitan romanowe'sx utxaaçxa' pxthaa we'wek na'jïna:

⁶—Adx yatte jxpe'jnisa uuya' yã'j üsa' ëseyá' äjameeçxa jïte!, Jesus pasçxa!:

⁷—Adxa' u'jçxa nuykatxhi'nja jík. ⁸Aça' kpiitana' na'wëk pas:

—Adxa' iidx dxi'pte kíhte yuhwa seelpimeesath. Txãasath adx yatte iidx pa'jni's thaame!, naasáa çxhãçxhana jïna mwe'we aççxáa adx jxpe'jnisa' katxhina. ⁹Adxwa ma'wëtká walasa jxkaahnitxi! nwëese'je!, sa' adxna nwëese'jsa soldauwe'sx iijxpe'th txãawe'sxtxi teeçxsa's me'j jïte!, adx jxkaahni's kxtey yu'k. Sa' vxite's pa'yate!, txãawa kxtey nwëese'je'k. Sa' adxna selpisa's kíh jxkaathewa kxtey yu'k jík.

¹⁰Txã'wë we'weni's Jesusa' wëse'jçxa!, wala kuh yajkxku, sa' na'jïnak we'we txãa yakh yuusatxi!:

—Isath we'we!, Israelwe'sx jxukaysa mteewe'sx yuhwa txã'wë adx we'weteçxáa katxhina sühsa yu' iuymeeth naa piçthë'j na'wësa yu'.

¹¹Na'jï'th na!, judiu jiljmeeçxawa wala yuh pa'jatxna sek kãanijüwe'sx vxite' sek khëenijuwe'sx majüwe'sxwa jxuka, sa' Abraham, Isaak, Jakob txãawe'sx yakh ü'ya' kaçxhiitxna cielute Dxus jxkaahna üsnite.

12 Naapkaçxha' kxtee ũswa'jsata' jīnisa yu', kutxi'jçxa çxhi'dx walate akhni yuutxna. Kxteea' seena' yuh pebeena ki'thtxi ksuusu'jutxna ũukhna jīk. 13 Sa' Jesusa' ki' we'wek kpiitana's:

—Yatna me'j, aç'a' idx ma'wēne'ga jxthāasu' txā' kxtey yuuna jīçpkaçxha', txāa kpiitan jxpe'jnisa' katxhinik yuu.

Pedro nyu nji'ja's Jesus nuykatxhini

(Mr 1.29-31; Lk 4.38-39)

14 Txajū' Jesusa' Pedro yatnak u'j, sa' kxteea' Pedro nyu nji'ja' kakwesekte uuya' ũstek uy. 15 Aç'a' kusete jxa'dxku, naapkaçxha' kakweseka' ũçxhak. Txajū' txāa u'ya' kiiteçxa selpiiya' kasejk. 16 Sa' txāa en jxuka çxhi'dxiçte', Jesus tasxte wala jxūna pa'jtx eçx iiyamunisatx. Aç'a' tee dxi'j we'weni yakhçxāa txāa eçxtxi' ũusuh kutxi'kh, sa' aç'a'sa jxukaysatx nuykatxhik. 17 Nyafxī Dxus yuwe pta'sxsa Isaiasa' na'jīnak we'we:

Txāaíik kwe'sx çxhāçxhamée fxi'zeni vxite' kwe'sx aç'a'na fxi'zeni's jxuka txuhde jī'k txā'jīni kxtey yuukahnçxāak txā'wē yūu.

Jesus yakh fxi'ze wēesa

(Lk 9.57-62)

18 Txā'wē nasa wala pkhaakhete', Jesusa' íkh kuten u'jwe'nja'w jīnak we'we. 19 Txā'jīte', ley kaapiya'jsa teeçxsa Jesus tasxte utxaaçxa', na'jīk: —Idx yakh yuu wēeth idx mtee u'jweçtewa jīte', 20 Jesus paççxa':

—Yu'kh niimal yuhwa deewa'j kafx ji'phta', txā'wēy vxiçxakwewa yat ji'phta'. Nawa Dxus Nçxi'k Nasa Yuusa' mtee yuhwa txajx dxiktheçxāa yuja'swa khikhwa'j ji'phme'.

21 Naapkaçxha' Jesusna nwēese'jsa teeçxsa' na'jīnak we'we:

—Adxa's mkaah adx tata khuē'yna pedaawa'j ji'phthu jīte', 22 Jesus paççxa':

—Uusaawe'sxa' peekx uusāa pwe'sx ya'pedaatxna. Aç'a' idxa' adx yakh txutemée myuh jīk.

Marte wejxa wala's Jesus kxuujū'jni

(Mr 4.35-41; Lk 8.22-25)

23 Txajū' Jesusa' barkote khēek aç'a' txāa yakh u'jusawe'sxa' pi'lxna u'jtx. 24 Txā'wē íkhte u'jweçpkaçxha', wejxaa wala sējk, aç'a' yu'tūçxhasa' barko's aphyawak yu'. Nawa Jesusa' deenik yu'. 25 Aç'a' txāa yakh u'jusawe'sxa' fxītxxi na'jīna:

—Kwe'sxtxi jxpe'jsa, meen nwe'we. Txā'wēme', íkh dxiikhē khējeçtha'w jīte', 26 na'wēk pas:

—¿Kījxa'kwe txakwe wala ũukhu'? ¿I'kwe'sxa' Dxusna yajkxya' yu' ew jiimeewá'kwe? jīçxa', kiiteçxa wejxa vxite' íkh txāatx we'wek, aç'a' jxuka

yujuk. ²⁷Txã'wẽ yũute!, barkote u'jsawe'sxa' wala kuh yajkxçxa na'jĩnatx we'we:

—Naa piçthê'ja' çkimna açki'tx wejxa ìkh txã'wẽsa yuhwa nwẽese'je'? jì'tx.

Gadara kiwetewe'sx eçx iiyamunisa

(Mr 5.1-20; Lk 8.26-39)

²⁸Txajũ' Jesusa' ìkh kuteju Gadara kiwete pesathe!, e'z piçthê'j uusáa pedani kafxju kasehçxa Jesus tasxte utxaatx. Txãa e'zsa' eçx iiyamunisatx yu!, txãasatx iiméh seena' weeswée yu!, txãa pa'ga txãa dxi'jsu kim yuhwa skhẽwya' aja'çmeeta'. ²⁹Txãa eçx iiyamunisa' na'jĩnatx sus we'we:

—Dxus Nçxi'k Jesus, kwe'sx nxuste úswa'j en àhmeyna, çnxuste akhya' yuwe'wá'ga? jì'tx.

³⁰Kxsũ thã'jsu kuçxi wala úsu'tx aphna. ³¹Aça' txãa eçxa' Jesusa's pthaa we'wetx:

—Kwe'sxtxi neeuççxa', txãa kuçxi ússu khẽeya' u'khan mkaah.

³²Txã'jite!, Jesusa' kxtey yuukaakh. Aça' txãa eçxa' nasa úsuh kasehçxa txãa kuçxi úustetx khêe. Txã'wẽ yũute!, txãa kuçxi' penxakhê peluçxa ìkhkhê khêeçxa jxuka uutx. ³³Aça' kxsũ kuçxi thegsa' úukhçxa wuwuuçxáa çxhabna u'jçxa pta'sxtxi kÌh yũuni'swa jxuka. Sa' txãa e'z piçthê'j eçx iiyamunisawe'sxtxi kÌh yũutewa jxukatx pta'sx. ³⁴Txajũ' çxhabte nasa jxuka thegya' u'jtx Jesus úsnite. Sa' uyçxa' Jesusa's txãawe'sx kiwetu kasehna u'khaatx.

Èseya' ájasame's Jesus nuykatxhini

(Mr 2.1-12; Lk 5.17-26)

9 ¹Txajũ' Jesusa' barkote khêeçxa sxawedçxa txajx çxhabtey ki' pa'kh. ²Aça' kxteea' teeçx piçthê'j èseya' ájasame'stxi yakhna pa'j. Txã'wẽ yakhna pa'jsawe'sxa' Jesusa' nuykatxhiyujuna sũhni's jiyuçxa', áça'sa' na'wêk we'we Jesusa':

—Çxhãçxa myajkx. Iidx pkala' peltunãyni yã'jtx neeyũu jìte!, ³ley kaapiya'jsawe'sx maai' yu' na'wêtx yajkx: Naa piçthê'ja' Dxusa's iiveeçx we'wena ájawa'jmeela'sku we'we' sũju'tx. ⁴Nawa txãawe'sx yaakxni's Jesus jiyuçxa', na'jĩnak we'we:

—¿KÌh yuutekwe txã'wẽ ewmée yaaki'? ⁵¿Maa thẽyeesakx? Iidx pkala' peltunãyni yã'jtx neeyũu çjĩniá'? Meeçxa': Kiiteçxa me'j çjĩniá'? ⁶Makwe thẽysatewa Dxus Nçxi'k Nasa Yuusa' naa kiwete pkaltxi peltunãyya' ájawa'jsa' naa pa'ga kaajiyu'j ya'wath áçxha'.

Txajũ' èseya' ájasame's na'wêk we'we:

—Kiiteçxa, iidx deeni's tu'sçxa yatna me'j jìte!, ⁷txãa èseya' ájasameea' kiitena'wa u'kh txajx yatna. ⁸Txã'wẽ yũuni's nasa uyçxa', úukhtxi. Sa' Dxusna weçxana tuuthe'jtx txã'wẽ çxhãçxhawa'ja's Dxusa' peesne' sũhçxa.

Mateo's Jesus pa'yani
(*Mr 2.13-17; Lk 5.27-32*)

9 Jesusa' txajũ u'jçxa', teeçx piçthê'j Mateo yaasesa txã'wê gobierno jii vxyu pkhakhna u'pte uyçxa', na'wêk we'we:

—Adx yakh myuh jïna.

Aça' Mateo' kiiteçxa Jesus yakh u'kh.

10 Txajũ' Jesusa' ũ'ya' yatte u'kak, aça' gobierno jii vxyu pkhakhsawe'sx vxite' pkalsawe'sxwa wala kuh u'katx vxite' Jesus yakh u'jusawe'sx yã'jçxa. 11 Aça' txã'wê yũuni's fxariseowe'sx uyçxa' pëjtxti Jesus yakh u'jusawe'sxtxi na'jïna:

—¿Ma'wêçxaga i'kwe'sxtxi kaapiya'jsa' gobierno jii vxyu pkhakhsawe'sx vxite' pkalsawe'sx yakh ũ'wé'? 12 jïni's Jesus wêse'jçxa', na'wêk we'we:

—Yu'çe'jsa's jxpeejxmeeta' aka ji'phméé wêt ũssa', naasáa aça'sa yuuçxáa yu'çe'jsa's jxpeejxta'. 13 Mpiyawé Dxus librute na'wê fxi'jni ũsa' txã'sna: Tajkx ikhçxa Dxusa's weçxana kabni yu'sa' jxpeejxmeeth. Adxa' vxitetx peeygãaniçxá'sthu jxthãasu' jï'k. Adxa' nasa ewsatx pakweya' kíhmeeth, naasáa pkalsatx pakweya'çxáath kíh, kxah ewméé yũuna fxi'zeni's nvxihtçxa Dxus tasxte sxaweduutxna.

Yũunani's Jesusa's pëyni
(*Mr 2.18-22; Lk 5.33-39*)

14 Txajũ' Juan Bautista yakh u'jusawe'sxa' Jesus tasxte utxaaçxa na'wêtx pëjx:

—¿Kíh yuupa'gatka'w kwe'sx vxite' fxariseowe'sx txakwe wala yũuna', naapkaçxha' idx yakh u'jusawe'sx yu' yũuna'çmeeta'? jïte', 15 Jesusa' na'wêk pas:

—Miiyajkxwe: ¿bodate pi'kxnisá' ũ'méé nxusna ũswa'jsatxmanx novxio' txãawe'sx yakh nee ũsiite'? Naasáa novxio's txãawe'sx tasxuh txuhdete yuuçxáa yũunaatxna.

16 Ropa ñisxsate tela u'sesa yakh ya'pã'khe'çme'. Txã'wême', tela u'sesa' jwee'fiçxáak sude' ñisxsá's, aça' sutenisa' jwee'fiçxáa wala suteena. 17 Txã'wêy beka u'se aahnisa's slun ñisxsate ya'awu'çme'. Txã'wême', beka u'sesa slun ñisxsá's sude'k, aça' beka yakh slun yakh e'zïi vxitu'tx. Txãa pa'ga beka u'sesa's slun u'sesate awwa'ja'. Txã'wê yu', maa yuhwa vxitumeetxna.

Jairo niisa vxite' Jesus atxhte jxa'dxsa
(*Mr 5.21-43; Lk 8.40-56*)

18 Jesus txã'wê we'wena ũspkaçxha', judiu pkhaakhenite npiçthê'jsa' Jesus tasxte peejxũkweçxa na'wêk we'we:

—Adx niisa' uuyã'kh. Nawa idx yuhçxa kuseju jxa'dxwaça', ïtxi yuuna jïte', ¹⁹Jesusa' kiitena'wa txãa yakh u'kh, txãa yakh u'jusawe'sx yã'jçxa. ²⁰Txã'wẽ u'jweçpkaçxha', teeçx u'y doce anxu kakwe yu'te aç'a'na u'jusa Jesus e'ste paaçte kühçxa, atxh vxiçte kpaajxa'dxku. ²¹Atxh vxiçteçxáawa jxa'dxwaça', katxhi'nja sühçxak txã'wẽ yũu. ²²Nawa Jesusa' jiyuçxa txãa u'ya's thegçxa na'wẽk we'we:

—Ûukhuwe, wejxwa katxhini i'kwe neeyũu, txã'wẽ katxhi'nja sühçxane'kwe txã'wẽ yũu naa pa'ga jïte', txãa dudtey katxhiçxak neeyũu.

²³Txajü' Jesusa' txãa npiiçthê'jsa yatte pa'jçxa uyku pedaaçte nxusna tukawa'jsa músiku jxuka pheu'jçxa ùste. Aç'a' nasa' nxusna wala ù'нена ùste', ²⁴na'wẽk jxkaah:

—Ayjxu mkaasehwe. Luuçxa' uunime', deeniçxáa ùsa' jïte', nasa' npeevxysxijkatx. ²⁵Nawa Jesusa' nasatx kasejkaahçxa dxiite u'kana'wa, txãa luuçxa's pu'kisuçpkaçxha', kiitek. ²⁶Aç'a' txã'wẽ yũuni's txãa kiwesu jxuka tuuthe'jnik yuu.

E'z piçthê'j uyya' ájasameetx Jesus nuykatxhini

²⁷Txajü' Jesus kasehna u'jweçte', uyya' ájasamée e'ztxi sus we'wena yuwé':

—Davxid Nçxi'k, kwe'sxtxi mpeeygãh jïna.

²⁸Txajü' Jesusa' yatte u'kate', txãa uyya' ájasameewe'sxa' utxaana kũhtx. Aç'a' Jesusa' na'wẽk pëjx:

—¿Uywa'ja's ùsuna sũju'kwe' i'kwe'sxa'? jïte', txãawe'sx pasçxa':

—Txãa sũju'íitha'w jïtx. ²⁹Aç'a' Jesusa' txãawe'sx yafxte jxa'dxku na'jïna:

—I'kwe'sx jxthãasni' kxtey yuuna jïçpkaçxha', ³⁰txãawe'sx yafxa' ewuutx. Aç'a' Jesusa' wala neewe'wek na'jïna:

—Kim yuhtxwa pta'sxmeene'kwe jïtewa, ³¹txajü' kasehna' txãa kiwesu jxuka pta'sxtxi Jesus txã'wẽ yũuni's.

We'weya' ájasame's Jesus nuykatxhini

³²Txãawe'sx kasehna u'jweçpkaçxha', Jesus tasxte vxite piçthê'j nuypa'jtx, we'weya' ájasamée eçx iiyamunisa's. ³³Aç'a' Jesusa' txãa eçxa's ùsuh kutxi'the', txãa piçthê'ja' we'weya' ájak. Txã'wẽ yũute', nasa' wala kuh yajkxtxi na'jïna:

—Israel kiwete bagaçxte yuhwa na'wësa yu' iuymeetha'w jï'tx.

³⁴Nawa fxariseowe'sx yu' na'wëtx we'we:

—Naa piçthê'ja' eçxtxi nasa ùsuh kutxi'ji'k, nawa eçxthê'j pu'çxteçxáak txã'wẽ yũ' jï'tx.

Mjïisa yu' kuhmeeta'

³⁵Jesusa' çxhab walasu çxhab le'çxkwesu judiuwe'sx pkhaakheni yat iisa kaapiya'jnak pekũju'. Sa' Dxus jxkaahwa'ja'swa pta'sxna vxite' wee

ma'wēsate nasa āça'satxwa nuykatxhina kīh akatxwā jxuka kaykase'je'k. ³⁶Sa' Jesusa' txāa nasatx thegçxa', txāawe'sxtxi peeygājk txā'wē nxusna çxhāçxhameekuē piisxāa namu ji'phmeesa na'wē ūspa'ga. ³⁷Sa' txāa yakh u'jusawe'sxtxi na'wēk we'we:

—Isath we'we', mjīia' seena' wala', nawa mjīisa yu' kuh meeta'. ³⁸Txāa pa'ga mjīi namu's mpējxwe mjīiwa'jsa kaakhan jīk.

Doce nasa Jesus txhixhni

(Mr 3.13-19; Lk 6.12-16)

10 ¹Txajū' Jesusa' txāa yakh u'jusa docesatx pa'yaçxa na'wē yūuya' ājawa'ja'sku ūs: eçxtxi nasa ūsuh kutxi'jna kīh weete āça'satxwa nuykatxhina, kīh aka ji'phtewa jxuka yu'çe'jya' ājawa'ja'sku ūs.

²Txāa docesawe'sxa' na'wēttx yaase yu': Nyafxtewe'sxa' Simonku yu', txā'sa' Pedro jī'tx. Vxite' txajx nyakh Adres. Vxite' Zebedeo nçxi'ktxi yu', Jakobo Juan pxakhsa. ³Vxite' Fxelipe, Bartolomé, Tomás, vxite' Mateo gobierno jīi vxyu pkhakhsa. Vxite' Alfexo nçxi'k Jakobo, vxite' Lebeo txā'snañçxāa Tadeo jī'tx. ⁴Vxite' Simonku yu', kananista nasa. Vxite' Judas Iskariote, Jesusa's açesawe'sx kusete dukhwa'jsa.

Docesatx Dxus yuwe's pta'sxya' kaahni

(Mr 6.7-13; Lk 9.1-6)

⁵Txāa yakh u'jusa docesatx Jesusa' na'wēk neewe'weçxa kaah:

—Judiu ji'jmée vxite nasa kiwesu' u'jnuwe, sa' Samaria kiwesu çxhab ūstxna kxsūwa u'jnuwe, ⁶wejxwa Israel ji'lj piisxakuē na'wē jxpubana ūsta' kxsūçxāa me'jwe. ⁷Sa' pta'sxine'kwe Dxus jxkaahwa'j ena' ājxā'kh jīna. ⁸Åça'satxwa nuykatxhine'kwe, uusaatxwa ki' itxi vxitune'kwe, wā'jy wee kazx ji'phtewa nuykatxhine'kwe. Eçxtxiwa nasaa ūsuh kutxi'jine'kwe. I'kwe'sx txā'wē ājawa'ja's vxypa'gamée i'kwe jxpa'ga na', nuykatxhipa'ga vxyu pējxmeene'kwe.

⁹Kīh vxyu yuhwa jxūmée me'jwe. ¹⁰Ya'ja, spaatu, khāabu txāaçxāa yuhtxwa jxūmée me'jwe, naasāa teeçx kmiisaçxāa jxūçxa me'jwe, txāa pa'gatey mjīisa' puuçni fxi'zewa'jsa'.

¹¹I'kwe'sxa' çxhab wala meeçxa' çxhab le'çxkwesu mtee pa'lçxawa, kxtee paadejene'kwe nasa ewsa tasxsu, vxite ahte u'jwa'j en āhpkaçx. ¹²Yatte pa'lçxa, ewçxāa we'wena weçxana pa'jane'kwe. ¹³Txāa yatte nasa ew jxpa'gate', Dxus yakh weçxana fxi'zewa'ja's pta'sxine'kwe. Nawa txā'wē yūumeete', pta'sxmeene'kwe. ¹⁴Sa' i'kwe'sxtxi jxpa'gamée, pta'sxni'swa wēse'jya' wa'lte', yatte ma'k yuu meeçxa' çxhabte ma'k yuu nawa txajū kasejeççxa', i'kwe'sx çxidate kiwe tuhda's sakweekweçxa kasejene'kwe kxah yuuwesa yuutxna. ¹⁵Isath we'we', Dxus kastigāywa'j en āhte', txā'wē yūusa nasa' seena' yuh ya'kastigaixna, Sodoma Gomoçxa çxhabsu nasate jxthaakwe.

I'kwe'sxtxi açewa'j en pa'jana

¹⁶Mwēese'jwe, adxa' i'kwe'sxtxi piisxakuē na'wē kajaçthu yu'kh eçx ksxavxysu. Aça' i'kwe'sxa' ikhwe'sxte ul na'wē jxpa'yakx mfxi'zewe, nawa iideewewa'j yu'sa' ji'phméé tub çxihme na'wē myuuwe.

¹⁷Mpa'yajkxwe, txā'wēme' nasa' i'kwe'sxtxi uweçxa khuēswe'sx tasxte dukhetxna, sa' judiuwe'sx pkhaakheni yat-suwa pāpatxna. ¹⁸Kxsūçxáa kuutxa'jméé ne'jwe'sx tasxsu vxite' jxkaahsa tasxte yuhwa pe'jna u'jni yuune'kwe, adx yuwe's pta'sxpa'ga. Txā'wē yūutewa, kxsūwa txāawe'sx dxi'pte tuuthe'jeíçxáa ne'kwe adxa's vxite' judiu ji'jmeesa dxi'ptewa. ¹⁹Txā'wē khuēswe'sx tasxsu kuutxa'the', kuh yaakxnuwe, açxha' çma'wē pasukxtha'w? sūhna. Txāa pa'gatey txā'wē yūuçpkaçxha', Dxusa' i'kwe'sxtxi kaaūsuthe'jena ma'wē paswa'ja'swa. ²⁰I'kwe'sx ūus yaakxniju we'wemeene'kwe; Dxus Espiritu i'kwe'sxtxi kwe'we'jena.

²¹Peekx nwe'sxíçxáa txāawe'sx nyakhtxi ahçeçxa kiikhe'jetxna. Aça' neywe'sxa' peekx nçxi'ktxi ahçeçxa kiikhe'jetxna, naapkaçxha' nçxi'kwe'sxa' neywe'sxtxi ahçeçxa kiikhe'jetxna. ²²Adxna nwēese'pha'ga naa kiwete nasa jxukay i'kwe'sxtxi açetxna. Txā'wētewa, ūukhméé çxhāçxha uu entepkaçx fxi'zesa' txāawe'sx ūusa' Dxus nwe'weni yuutxna. ²³Txā'wē ahçeçxa ikhya' pakweeçpkaçxha', txāa çxhabuh kaseçxa vxite ahte me'jwe. Isath we'we', i'kwe'sx txā'wē Israelwe'sx çxhabsu jxuka pekūhmeyna, Dxus Nçxi'k Nasa Yuusa' kījana.

²⁴Piyasa' maa yuhwa kaapiya'jsate jxthaakwemeeta'. Txā'wē selpisa' patronte jxthaakwesame'. ²⁵Kaapiya'jsa ma'wē pkxuuni yuute', piyasaawa txā'wēy nxuswa'ja's jxpa'gawa'jsata'. Aça' selpisaawa patron ma'wē pkxuuni yuute', txāawa txā'wēy nxuswa'ja's jxpa'gawa'jsa'. Yat namu's Eçxthē'j jīna kxsusçxa', txajx jxpe'jnisa yuutxi' wejx txā'jīna we'wetxna.

Kimna wejx ūukhwa'jkk

(Lk 12.2-9)

²⁶Txā'wē yūutewa, nasatxi' ūukhnuwe. Adx we'weni' kīh yuhwa txā'wē paaçte yu' neeyūuwa'jsame', sa' kīh yuhwa txā'wē sūthçxa jiyuniméé yu' neeyūumeena. ²⁷Adxa' i'kwe'sxçxáatxthu we'we', nawa txāa we'weni's nasa ma'wēsaxwa jxuka āate mwe'wewe. Sa' naa ja'date ayteçxáa we'weni's msuua jxuka mwe'wewe. ²⁸Kakweçxá's ikhsa's ūukhwa'jme'. Txāawe'sxa' ūus yu'sa' ikhya' ājameetxna. Wejxwa kakwe petx ūus yā'jçxa infxiernote kaajxa' ājawa'jsa's wejx ūukhwa'ja'.

²⁹E'z vxiçxakwetx teeçx centawote çtxweyu'çyuhmeetxna' wakx? Txā'wē pa'gameekwesaçxawa, maa yuhwa kiwekhē wete'çmeeta', i'kwe'sx Tata' txā'wē jxthāasmeete yu'. ³⁰I'kwe'sx dxikthete dxkhas yuhwa jxuka isani ūsta'. ³¹Ūukhnuwe, i'kwe'sxa' txāa vxiçxakwete jxthaakwe pa'gasai'kwe.

³²Maawa ũukhmée adx ju'gu we'wesatxi', adxwa adx Tata cielute ũsa' txajx tasxte txāawe'sx ju'gu we'we'nja. ³³Nawa maawa nasatx ũukhçxa adxa's jiimeeth jīna ũxiijana txā'sa' adxwa txā'wēyçxáa jiimeeth jīna we'we'nja adx Tata cielute ũsa' txajx tasxte.

Jesusa' nasatx kaapui'jsa na'wē yuuni
(Lk 12.51-53; 14.26-27)

³⁴Naa kiwete yahçemée fxi'zewa'ja's nvxiht-ya' kīhmeeth, nxuste yahçena fxi'zewa'ja's nvxiht-ya'th kīh. ³⁵Adxna nwēese'pha'gaçxáa neya' nçxi'ka's açena, naapkaçxha' nji'ja' niisa's açena, açá' swegra' nkuēmyu's açena. ³⁶Txā'wē adxna nwēese'pha'ga peekx yattewe'sxíçxáa yaaçeni fxi'zetxna.

³⁷Maawa adx yu's yajkxmée naasáa ney vxite' nji'j txāawe'sxçxáatx jxthaakwe yaakxsa', adxa's selpiiya' ājameetxna. Txā'wēy maawa adx yu's yajkxmée naasáa nçxi'k vxite' niisa txāawe'sxçxáatx jxthaakwe yaakxsa' adxa's selpiiya' ājameetxna. ³⁸Makwe thēysa uwa'jma'k pa'j nawa txāatxi' yajkxmée fxi'zesame' adx tasxte selpiiya' ājameena. ³⁹Naa kiwete peekx itxi fxi'zewa'jçxá's ya'nwe'wesa', cielute fxi'zewa'j thaakwe ewsa yu'sa' ivxiituna. Naapkaçxha' adxna nwēese'pha'ga naa kiwete itxi fxi'zeni's yajkxmée ivxiitusa' cielute itxi fxi'zewa'j yu'sa' ivxiitumeena.

Dxus peesni's jxpa'gawa'jsa
(Mr 9.41)

⁴⁰Maawa i'kwe'sxtxi wa'lmée jxpa'gasa', adxnawa jxpa'gasaçxa txā'wē yuuna. Sa' adxna jxpa'gaçxa', adxna jxkaahsanawa jxpa'gasa yuuna. ⁴¹Dxus yuwe pta'sxsa txāawe'sxa' Dxus jxkaahnisata', açá' maawa txāawe'sxtxi wa'lmée ew jxpa'gasa', Dxus peesni's jxpa'gawa'jsata', Dxus yuwe pta'sxsatx peesni's íçxáa. Sa' nasa ewsatx jxpa'gasa' ewsaçxa txā'wē yuuna, sa' nasa ewsatx dewenisa's íçxáa jxpa'gana. ⁴²Isath we'we': Adxna nwēese'jsa makwe wala āhmeekwesatewa txā'sna yu'fxizeçxáawa yussa' dewenisa yuuna.

Juan Bautista yuwee kaahnisa
(Lk 7.18-35)

11 ¹Jesusa' ma'wē yūuwa'ja'swa txāa yakh u'jusa docesatx pta'sxna jxā'jçxa', txajū kasehna u'kh txāa kiwesu çxhab le'çxkwesu kaapiya'jya'. ²Açá' Jesus txā'wē yūuni's Juan Bautista kxuuphni ũççxa jjiyuçxa', txajx jxpe'jnisatx Jesus tasxna kaakh ³na'jīna pējxya':

—Kristo naa kiwete kīiwa'jsa ũsu'k idxa' ¿txāa dxihgá', meeçxa' vxite ũythasuwá'nja'w? jīte', ⁴Jesusa' na'wēk pas:

—U'jçxa Juana's pta'sxine'kwe adx na'wē yūuna fxi'ze'th txā'sa' yafxju uyi'kwe sa' kaapiya'jni'swa wēse'ji'kwe txā'sna: ⁵uyya' ājasameewa uyu'tx,

legsawa katxhiçxa legmeetx neeyū!, wā'jy wee kazx ji'phsawa katxhinitx neeyū!, wēse'jya' ājasameewa wēse'jya' āja'tx, uuniisawa ki' itxi yu'tx, sa' naa kiwete pxthaakuēesa yuutxi' Dxus tasxte pa'jwa'ja's pta'sxnik yuu jīne'kwe. 6Aça' adxa's kuh yajxkna jxpubasamée yakh yu' wala yuh weçxa yuja'.

7Txajū' txāa pēysa Jesusa tasxu u'the', Jesusa' Juan ma'wēsatewa pta'sxku kxtee wēse'jsa nasatxi' na'jīna:

—Nasa u'pnimée kiwete!, i'kwe'sxa' çkīhnakwe thegya' u'j? çKhīih tasx wejxate ēse'sesa's wá'kwe thegya' u'j? 8Kxte' çkīh ūski sūhçxakwe thegya' u'j? Meeçxa' çteeçx piçthē'j ropa zhiçxkwesa athçxa u'pna sūhçxa wá'kwe thegya' u'j? I'kwe'sxa' peekx jii i'kwe txā'wē ropa zhiçxkwesa athsa' jxkaahsawe'sx yat-suçxáatx u'pu'. 9Kxte' çkimmakwe uy? Dxus yuwe pta'sxsa's wá'kwe uy. Isa txā'sna yuh uyne'kwe, nawa Dxus yuwe pta'sxsa maatewa jxthaakwesa's i'kwe uy. 10Txā'sna we'weçxak Dxus libruete na'jī':

Adxa' yuweete pta'sxsa kajaçthu iidx yaçte,

Iidx pa'jwa'ja's pheu'khan jīna fxi'jni'.

11Isath we'we', naa kiwete maa nasa yuhwa Juan Bautistate jxthaakwe walasa yu' kasehnimeeta' açxpkaçx. Makwe txā'wētewa, açxh naa ensuwe'sx maatewa jxthaakwe le'çxkuēesaçxawa Dxus jxkaahnite u'kasa' Juan Bautistate jxthaakwe walasata'.

12Juan Bautista pa'jnijūjx Dxus jxkaahni ena' açeni ūsa' açxpkaçx, txāa pa'gatx kaaknayu'jya'mée çxhāçxha puina fxi'ze'. 13Nawa Dxus jxkaahwa'j ena's Moises ley vxite' Dxus yuwe pta'sxsa txāawe'sxa' txagaçxhíitx pta'sx Juan Bautista pa'phkaçx. 14I'kwe'sxa' jiyu wēeçxa', jxpa'yakx mwēese'jwe: na'wē Dxus yuwe pta'sxsawe'sx we'weçxa', Dxus jxkaahwa'j en ājaçpkaçxha', Elias pa'jana jī'tx txāak yu' Juan Bautista'.

15Na'wē pta'sxya'wath txā'sna wēse'jwa'jsa ūsçxa', mwēese'jwe. 16Naa ensu nasatxi' çma'wē kaaja'da'the wejx ewki? Nawa txāawe'sxa' luuçx le'çxkuē na'wēsata': luuçxçxáatx plaasasu pweesa'jya' kaçxçxa', txāawe'sx namikutx na'jīna sus we'we': 17Zhiçxkwetha'w kuvxí', nawa ku'ju'çmeei'kwe. Sa' nxus nxustha'w memu', nawa ū'ne'çmeei'kwe jīnatx we'we'. 18Txā'wēsaçxa i'kwe Juan Bautista's na'wē we'we': Eçx ji'phçxak txā'wē ū'we'çmée, sa' vxinowa tudxi'çme' jīna i'kwe açewe'we'. 19Txāa e'su Dxus Nçxi'k Nasa Yuusáa pa'lçxa txā'wē ū'na tudxna yuute!, na'wēi'kwe açewe'we': Wala pū'we', sa' txā'wēyku wala tudxi'. Pkalsawe'sx vxite' gobierno jīi vxyu pkhahsawe'sx yakh namiku' jīna i'kwe açewe'we'. I'kwe'sxa' jiimeeçxai'kwe txā'jī'. Nawa maawa jiyuwa'jsa yuutxi' Dxusa' kaajiyu'juna adx ma'wēsatewa jik.

Çxhab nwēese'jsamée yakh ūukhūukhsa

(Lk 10.13-15)

20Txajū' Jesusa' juuna'k we'we maa çxhabsuçxahne' wejx wala txā'wē kim yuhwa ājanimeesa's kaavxya'ja'jna ūsu' kxsūuwe'sx nasatx. Txāa nasa' pkaltxi nvxihtçxa Dxus tasxte sxawedmeene'ta naa pa'ga na'jik:

21—Korazín çxhabte nasa vxite' Beçaida çxhabte nasa txäawe'sx yakha' wala yuh seena' üukhüukha'. Txä'wë Tiro çxhabte nasa vxite' Sidon çxhabte nasa txäawe'sx ksxavxysu txä'wë kim yuhwa äjanimeesa's kaavxya'ja'jwaça', txäawe'sxa' pkaltxi nvxihtçxa Dxus tasxte sxawedni yäl'j yuutxna. 22 Nawa na'jî'th na': Dxus kastigäywa'j en ähte', Tiro çxhabte nasa vxite' Sidon çxhabte'wë'sxte jxthaakwe txäawe'sxa' ya'kastigaïtxna. 23 Aça' Kapernaum çxhabte nasa i'kwe'sx yu' cielute u'kawa'jsa yuhne'tka'w çsüju'kwe'? Txä'wëmée wejx infxiernoteçxáa u'jwa'jsa i'kwe. Txä'wë Sodoma çxhabte kim yuhwa äjanimeesa's kaavxya'ja'jwaça', txäa çxhaba' äçxpkaçx üs yuuna. 24 Txäa pa'ga na'jî'th na': Dxus kastigäywa'j en ähte', Sodoma kiwesu nasate jxthaakwe i'kwe'sxa' ya'kastigaïne'kwe jik.

Jesus tasxte jxkaaseya' pa'yani
(Lk 10.21-22)

25 Txäa ensu' Jesusa' na'jînak Dxus yakh puutx we'we:

—Tata, cielute vxite' naa kiwete jxkaahsa idxa' txakwe wala kîhtewa jxuka jiisawe'sx yuutxi' kaajiyu'jmeeçxawa, pxthaa ähmeechwesa yuutxi' kaajiyu'jg, txäa pa'gath txakwe wala weçxá' idxa's. 26 Idxa' txä'wëg yüu, iidx jxthäasni' txä'wëne' yu' naa pa'ga.

27 Adx Tata' kîhnawa jxuka adxçxaçxáanak dukh. Nawa Dxus Nçxi'k ma'wésatewa kim yuhwa ew yu' jiimeeta', naasáa adx Tata yuuçxáa jiia'. Txä'wëy kim yuhwa ew yu' jiimeeta' adx Tata's, naasáa Nçxi'k yuuçxáa ew jiia' Ney'a's. Txäasak maawa jiyu wëesa yuutxi' Nçxi'ka' kaajiyu'ju' Ney kimtewa. 28 Maawa üuste wëtmée wahtxna fxi'zesa' adx tasxte myuhwe jxukaysa, aça' adxa' weçxana thëymée fxi'zewa'ja's üsu'nja. 29 Adx jxkaahni's wa'lmée jxpa'gaçxa, adx na'wëy fxi'zeya' mpiyawew, txäa pa'gatey adxa' juuna'meekwe üusuh jxuka peeygāhnath jxkaaja'. Txäa pa'ga weçxana thëymée fxi'zewa'ja's ji'phune'kwe. 30 Adx jxkaahni' walame', sa' nwëese'jwa'jwa thëyeesata' jik.

Jxkaase entewa skuutxhtxi çxuktedeçxa ü'ni
(Mr 2.23-28; Lk 6.1-5)

12 1 Txäa ensu' Jesusa' skuutxh ehsuk skhëuuç yu' sapatu jxkaase ente. Aça' txäa yakh u'jusawe'sxa' wëeçxa skuutxhtxi çxuktedeçxa ü'tx. 2 Txä'wë yüute', fxariseowew'sx uyçxa' na'wëtx we'we Jesusa's:

—¿Uyu'gá' idx yakh u'jusawe'sxa' na'wë yuuçta' mjii enmée jxkaase entewa? jite', 3 Jesusa' na'wëk pta'sx:

—I'kwe'sxa' jii'leeymeewá'kwe? Teeçx ente' Davxida' txäa yakh u'jusawe'sx yakh wëeçxa' na'wëk yüu: 4 Dxuus yatte u'kaçxa', kxtee pantxi' ü'k txäatxi' kim yuhwa ü'wal'j ji'phmeeta' naasáa sacerdote yuuçxáatx ü'wa'jsa yu'. 5 I'kwe'sxa'

Moises leytewa çiiilëeymeewá'kwe? Kxte pta'sxçxa', dxuus yatte sacerdotewe'sxa' jxkaase'çmeeta' makwe jxkaase entewa jì'k. Txã'wë jxkaase ente jxkaasemeete', pkalna çsüju'çmeekwe? 6I'kwe'sxa' mjiyuwe: Ayte' dxuus yatte jxthaakwe jxtuhtesa üsa'. 7I'kwe'sxa' jiyu'çmeewá'kwe Dxus librute na'jì'k: Vxitetx peeygãaniçxá'sthu adxa' jxthãasu', tajkx ikhçxa altalte kabni's peejxmeeth jì'k. Txã'jini's jiyuwaça', kwe'sxtxi' üusaçxana açewe'wemeene'kwe, txã'wëçxáa yūunisa' pkalme' naa pa'ga. 8Txãa pa'gatey sapatu jxkaase entewa Dxus Nçxi'k Nasa Yuusáa jxkaahwa'j jì'pha' jìk.

Teeçx piçthê'j txajx kuse udxnisa

(Mr 3.1-6; Lk 6.6-11)

9Jesusa' txajū u'jçxa', judiuwe'sx pkhaakheni yattek u'ka. 10Kxteea' teeçx piçthê'j teeçx kuse udxnisa këese'jya' ājasameek u'p yu'. Aça' Jesusa's ewmée vxit wëeçxa na'wëtx pêjx:

—Jxkaase entewa nuykatxhite çewmanx? jíte', 11Jesusa' na'wëk pas:

—I'kwe'sx teeçx piisxáa jì'phte' txãa piisxá' jxkaase ente ewmeekhê khêete', çu'jçxa kutxi'jmeema'kwe jxkaase entewa? 12Nasa' piisxaate jxthaakwe pa'gasa', aça' wejx txã'wë ew yūuwa'ja' makwe jxkaase entewa. 13Txã'wë pasçxa txãa piçthê'ja's na'wëk we'we:

—Kuse's mku'le'j jíte', txã'wëy yuuk, naapkaçxha' txajx kuse' ewuuk ka'tuwe'sx na'wëy. 14Aça' fzariseowe'sxa' kasehçxa Jesusa's ikhya' puutx we'wetx.

Jesus ma'wësatewa nyafxiitey pta'sxni

15Txã'wë yūuçte Jesus jiyuçxa', txajū kasehna u'kh, aça' nasa wala u'jtx txãa yakh. Jesusa' aça'sa ma'wësatxwa jxukak nuykatxhi, 16nawa kim yuhtxwa pta'sxkaahme' nuykatxhisa kimtewa. 17Dxus yuwe pta'sxsa Isaias we'weni kxtey yuukahnçxáak txã'wë neewe'we. Isaiasa' na'jìk:

18Adxna selpiwa'jsa naa piçthê'ja'sthu txhitxh.

Txãasa peeygãhna weçxana üsthu,

Sa' adx Espiritu's üsu'nja,

Aça' adx ew yūuwa'ja's pta'sxina maa nasatxwa jxuka.

19Txã' puiiwameena, sa' áate susnawa fxi'zemeena.

Txãa pa'ga txajx we'weni' kīh yuhwa pthūusemeena klxiikhunsu.

20Makwe pxthaa āhmeekwesatewa txã' ahçemeena,

Sa' çxhãçxha fxi'zewa'ja's jì'phmeeyã'thewa, txã' ivxiitumeena,

Naa kiwete zhiçxkwe txajx jxkaahwa'j en āhpkaçx.

21Aça' nasa' ma'wësawa jxuka txã'sçxáana üythasutxna jì'k.

Dxus Espiritu's açewe'weni

(Mr 3.19-30; Lk 11.14-23; 12.10)

22Txajū' Jesus tasxte jxūna pal'jtx uyya' ājasamée we'weya'wa ājasamée eçx iiyamunisa's. Aça' Jesusa' nuykatxhite', txãa piçthê'ja' uyya' ājak, sa'

we'weya'wa ãjak. ²³Txã'wẽ yũute!, nasa jxukaysa ũukh yajkxna na'wẽtx kuh jwed we'we!:

—Naa piçthê'ja' Davxid Nçxi'k ïina jĩ'tx. ²⁴Txã'jĩni's fxariseowe'sx wẽse'jçxa', na'jĩtx:

—Naa piçthê'ja' eçtxi nasaa ũusuh kutxi'ji'k nawa eçxthê'j pu'çxteçxáak txã'wẽ ãja' jĩ'tx.

²⁵Txã'wẽ yajkxna ũste Jesus jiyuçxa', na'wẽk we'we:

—Maa kiwetewa gobierno' peekx nasatxíçxáa ahçeçxa puiçxa', çxhãçxhameena. Txã'wẽy çxhab ma'k yuu meeçxa' teeçx yattewe'sx ma'tx yuu nawa puutx yahçena puiçxa', puutx pçuutxna. ²⁶Txã'wẽy eçxthê'jwa txajx jxkaahnisa eçx yakhíçxáa puiçxa', çxhãçxhamée puutx pçuutxna. ²⁷I'kwe'sx adxna we'weçxa', eçxthê'j pu'çxteçxáak eçtxi kutxi'ji' jĩna i'kwe we'we'. Aça' txã'wẽ dxihte!, txã'wẽ i'kwe'sx yakh u'jusawe'sxwa eçtxi kutxi'jya' ãja'tx jĩ'i'kwe aça' txã'wẽ ãjawa'ja's çkimki'k ũs? Txã'wẽ i'kwe'sx yakh fxi'zesafíwa áate kaajiyu'ju'tx i'kwe'sx jxpubani's. ²⁸Adxa' eçtxi kutxi'ji'th Dxus Espiritu pu'çxte!. Nawa i'kwe'sxtxi Dxusçxaçxáa jxkaahwa'j en áhne' txáa pa'ga ne'tka txã'wẽ yũ!

²⁹Maawa piçthê'j çxhãçxhasa iiyamuni's kusa'jya' u'jçxa', txáa piçthê'j çxhãçxhasa khu'lyna tudmeeçxa yu', kusa'jya' ájameena. Txã's khu'lyna tudçxa yuuçxáa kusa'jya' ájana.

³⁰Adx ju'gu yuusame' açesaçxa txã'wẽ yuutxna. Sa' adxa's pu'çxsame', yupsaaçxa txã'wẽ yuutxna. ³¹Na'jĩ'th na!, nasa kíhwa ewmée yũuni kíhwa Dxusna ewmée nuywe'wetewa txáatxi' jxuka ya'peltunaĩna. Nawa Dxus Espiritu's açewe'wete!, bagaçxte yuhwa peltunãywa'jmée yuuna. ³²Sa' maawa Dxus Nçxi'k Nasa Yuusa's ewmée nuywe'wesa's peltunãywa'j yuuna. Nawa Dxus Espiritu's ewmée nuywe'wesa yuuçxáana peltunãywa'jmée yuuna naa kiwete cielutewa.

Ma'wẽ fxi'zeni'swa uyçxak ya'jjiyu'

(Lk 6.43-45)

³³Fxtũu tasx ewsa' ewku yũnu!. Nawa fxtũu tasx ewmeesa' ewmeek yũnu!. Fxtũu tasx ma'wẽsatewa yũnte yuuçxáak ya'jjiyu'. ³⁴Ewmeesa luuçx i'kwe'sxa' çma'wẽ ew we'weya' ájaki'kwe, ũuste yuu ewmeesa jĩ'phçxa'? Txáa pa'gatey ũuste yaakxni'sku ya'we'we!. ³⁵Nasa ewsa' ewsaçxá'sku we'we!, txajx ũuste' ewsaçxá's jĩ'phna naa pa'ga. Naapkaçxha' nasa ewmeesa' ewmeesaçxá'sku we'we!, txajx ũuste' ewmeesaçxá's jĩ'phna naa pa'ga. ³⁶Adxa' na'jĩ'th na!: Dxus kastigãywa'j ente' jxuka pta'sxi jĩ'phutxna kíhwa jxuka ewmée we'weni's. ³⁷Idx ma'wẽ we'weni'swa jxuka paapëyni yuuna, txajũ yuuwema'g yuu meeçxa' yuuwemeema'g yuu nawa ya'jjiyuna.

Nasa ewmeesa' cieluju kīhçxáawa kaavxya'ja'khaahni

(Mr 8.12; Lk 11.29-32)

³⁸ Txajū' f xariseowe'sx vxite' ley kaapiya'jsawe'sx Jesusa's na'jīnatx pējx:

—Txā'wē kim yuhwa ājanimeesa's kwe'sxtxi mkaavxya'ja' jīte', ³⁹ Jesus pasçxa':

—Nasa ewmeesa īsxiisawe'sxa' kim yuhwa ājanimeesa'stxi kaavxya'ja'khaja'. Nawa txā'wē yūumée Dxus yuwe pta'sxsa Jonas fxi'zeniçxáana ya'pta'sxina. ⁴⁰ Jonaswa ma'wēga wedx tutxhte tekhn en tekhn kus u'pu', txā'wēy Dxus Nçxi'k Nasa Yuusaawa tekhn en tekhn kus kiwe dxiiga ūsuna. ⁴¹ Dxus kastigāywa'j en āhte', Niniwe çxhabtewe'sxa' naa ensuwe'sxtxi' ewmeete nvxiitutxna, txāa pa'gatey Jonas Dxus yuwe's pta'sxiçpkaçxha', Niniwetewe'sxa' pkaltxi nvxihtçxa wa'lmée Dxus tasxte utxaatx. Aça' ayte' Jonas na'wēsaçxáamée jxthaakwesa ūsa', nawa txāa yu'sa' wa'lu'tx. ⁴² Txā'wēy Dxus kastigāywa'j en āhte', jxu'j kiwete jxkaahsa u'ya' naa ensuwe'sxtxi' ewmeete nvxiituna, txāa pa'gatey txā'wē jxu'j kiwejuwa txāa u'ya' yuwe'k Salomon pta'sxnixçxá'swa wa'lmée wēse'jya'. Aça' ayte' Salomonte jxthaakwesa ūsa', nawa txāa yu'sa' wa'lu'tx.

Eçxa' nasa ūuste ki' sxawedni

(Lk 11.24-26)

⁴³ Eçxa' nasa ūusuh kasehçxa kiwe uhdxsu pekūhna u'ljuçxawa u'pwa'j uymeeçxa': ⁴⁴ Sxawedu'nja kasehth txāa yatnay sūju'k. Txajū' sxawedna pa'lççxa', txāa piçthē'ja's uyuuna yata's ma'wē ew pheu'lççxa padçxa txaahni ūs yuuxk txā'wē. ⁴⁵ Txajū' u'lççxa vxite siete eçx txāate jxthaakwe ewmeesatx jxūna pa'lççxa txāa piçthē'j ūuste jxuka khējetxna, aça' txāa piçthē'ja' iiméh jxthaakwe ewmeesa yuuna. Txā'wē yuuwa'j en pa'jana naa nasa ewmeesatxi' jīk.

Jesus njī'j vxite' txajx nyakhwe'sx

(Mr 3.31-35; Lk 8.19-21)

⁴⁶ Jesus txā'wē nasatx we'wena ūsiyna, njī'j vxite' nyakhwe'sx txāa yakh we'weya' pa'lççxa ekate ūsu'tx. ⁴⁷ Aça' kxte ūssa teeçxsa' Jesusa's pta'sxku:

—Iidx mama iidx nyakhwe'sx idx yakh puutx we'weya' pa'lççxa ay ekate ūsta' jīte', ⁴⁸ Jesusa' na'wēk we'we pta'sxsas':

—Adx mama adx nyakhwe'sxa' kimtewa jiimeewá'kwe jīçxa', ⁴⁹ txāa yakh u'ljusawe'sxtxi kuseju vxijxaçça:

—Naawe'sxçxáa adx mama, adx nyakhwe'sxta'. ⁵⁰ Txāa pa'gatey maawa adx Tata cielute ūsa' txajx jxthāasni's kxtey yuusaaxçxáa txā'wē adx nyakh, adx npe'sx, adx mama na'wēsata' jīk.

Skootxh uuhsa's kaaja'da'jni

(Mr 4.1-9; Lk 8.4-8)

13 ¹Txãa enteyíçxáa Jesusa' yatuh kasehçxa íkhwala pukate úsya'k u'j. ²Aça' txajx úsnite wala nasa pkhaakheté', Jesusa' barkotek khêe. Aça' nasa yu' íkh pukatee neeyúutx. ³Txajúk wala kaapiya'j ejemplo kaaja'da'jçxa na'jîna:

—Skootxh uuhsa' ujxa' kasejk. ⁴Aça' uhna u'jweçte', msuúí yu' dxi'jsutx úsxi skuutxh fxiwa'. Aça' vxiçxakwe pa'jçxa skuutxh fxiwtxi ú'tx. ⁵Vxite ahsu' kwet kajkwesutx úsxi, kiwe wejkuêçxáa ji'phsu. Aça' kxsú úsxisa' wala dud buçxatx kiwe walameene'ta ya'fxihb txãa pa'ga. ⁶Nawa sek açxaate' jxuka uhdxtxi, iiwehçeya' ãjameene'ta naa pa'ga. ⁷Vxite skuutxh fxiwa' çhũçh ksxavxysutx úsxi, aç'a' çhũçh khuê'y walaaçxa', skuutxha's aphçxa ivxiitutx. ⁸Nawa vxite ahsu' kiwe wala ewsu úsxitx, sa' wala yúntxi. Maa tasxí yu' cien, vxite' sesenta, vxite' treinta nxinx txã'wêtx çut. ⁹Na'wê pta'sxni's jiyuwa'jsa úsçxa', jiyune'kwe jík.

Kîh yûupa'ga ejemplo yakhçxáa kaaja'da'jçxa pta'sxni

(Mr 4.10-12; Lk 8.9-10)

¹⁰Txajü' txãa yakh u'jusawe'sxa' Jesus tasxte utxaaçxa na'wêtx pêjx: —¿Kîjxa'ga ejemplo kaaja'da'jçxaçxáa nasatx pta'sxi'? jîte', ¹¹na'wêk pas Jesusa':

—Dxus jxkaahni ensu ma'wê yûuwa'ja'swa kim yuhwa jiyunimeesa's i'kwe'sx yuutxi's kaajiyu'jwa'ja'. Nawa vxite yuutxi's kaajiyu'jwa'jme'. ¹²Txãa pa'gateg jiyuwa'jsa's jweeíçxáa áate ya'kaajiyu'ljuna, wala jiyukah. Nawa jiyuwa'jmeesa's ya'kaajiyu'jmeena, wejxwa le'çxkweçxáawa jiiwáa yuuna txã's yuhnawa kusa'jni yuuna. ¹³Txãa pa'gath ejemplo kaaja'da'jçxaçxáa we'we'. Txã'wê yuukahní txãawe'sxa' uyçxawa, uysamée na'wê jiyu'çmeeta', sa' wêse'jçxawa wêse'jsamée na'wê nwêese'je'çmeeta'. ¹⁴Txãawe'sx fxi'zewa'ja's Dxus yuwe pta'sxsa Isaias we'weni' kxtey yuuk. Txã' na'wêk we'we:

I'kwe'sxa' wêse'jewá'kwe, nawa jiyumeene'kwe.

Uyuwá'kwe, nawa txãana sühmeene'kwe.

¹⁵ Txãa pa'gateg txãa nasa úusa' jxuka ewmeesaçxáa yuuna pa'jni'.

Txãa pa'gatx wêse'jya' wa'lu',

Sa' txãawe'sx yafxju uykahmén,

Txãawe'sx thũ'wêjuwa wêse'khamen,

Yafxa' jxuka aphanita' txãawe'sx úuste ew jiyukahmén.

Txãa pa'gatx adx tasxte pa'ja'çmée adx nuykatxhikahn jî'k.

¹⁶Nawa i'kwe'sx yakha' wala yuh weçxa yuja' i'kwe'sx yafxju yuu uyí'kwe, sa' i'kwe'sx thũ'wêju yuu wêse'jî'kwe naa pa'ga. ¹⁷Isath we'we',

maazkuēesawa Dxus yuwe pta'sxsa vxite' nasa ewsa nyafxiwe'sxwa uy wēetx i'kwe'sx uyna ūsi'kwe txā'sna, nawa uymeeta'. Wēse'j wēetx i'kwe'sx wēse'jna ūsi'kwe txā'sna, nawa wēse'jmeeta'.

Ejemplo yakh kaapiya'jni's āate pta'sxni

(Mr 4.13-20; Lk 8.11-15)

18 Āçxha' mjiyuwe skuutxh uuhsa's kaaja'da'jçxa pta'sxni's. 19 Naa kiwete Dxus jxkaahwa'ja's pta'sxni's wēse'jçxawa jiyusame!, skuutxh fxiw dxi'jsu ūxisáa na'wēsata': Nasa' Dxus yuwe's wēse'thewa, eçxthē'ja' pa'jçxa ūsuh kutxi'jina. 20 Skuutxh fxiw kwet kajkwesu ūxisa' Dxus yuwe's wala weçxana jxpa'gasa na'wēsata'. 21 Nawa Dxus yuwe's açxamée çxhāçxha yaakxa' çxhāçxha'çmeeta'. Txā'wē Dxus yuwe's jxpa'gapa'ga, pkxuwa'j en pa'theçxáa jxuka fxīykaja'tx. 22 Skuutxh fxiw çhūçh ksxavxysu ūxisa' Dxus yuwe's wēse'jçxawa naa kiwetewe'sxçxá's wejx wala yajkxna ji'phunisaçxá's pa'pçxusa na'wēsata'. Aça' txā'wēsaçxá's wejx wala yajkxte', txāaçxáa jxuka knayu'k Dxus yuwe yu'sa' kaapeçxkana'jna. 23 Nawa skuutxh fxiw kiwe ewte ūxisa' Dxus yuwe's wēse'jçxa kxtey yuusáa na'wēsata': Skuutxh spiīgawa ma'wēga cien vxite' sesenta vxite' treinta nxinx ji'phu', txā'wēyku txāawe'sx ūuste Dxus yuwe' wala pena' jik.

Jxūth ewmeesa skuutxh ksxavxyte buçxasa

24 Jesusa' vxite ejemplo na'wēk kaaja'da'jçxa pta'sx:

—Naa kiwete Dxus jxkaahni ente Dxus yuwe ewsaçxá's pta'sxtewa, na'wē yuuna: Teeçx mjiisa' txajx kiwete fxiw ewsa'sku uh. 25 Nawa jxukaysa dejeçpkaçxha', uuthasx namu's açesa pa'jçxa ū'nimeesa'sku skuutxh ksxavxyte uhçxa u'j. 26 Aça' skuutxh buçxaçpkaçxha', txāa ksxavxyte jxūth tasx ū'nimeesawa vxyaak. 27 Txā'wē yūute', selpisaawe'sxa' na'jīnatx namu's pta'sxya' u'j: Idxa' fxiw ewsaçxá'sgu uh, aça' naa jxūth tasx ewmeesa' çma'wē yūuçxaga buçxa? jīte', 28 namu' na'wēk pas: Maa açesa uhne'ta jik. Txajū' selpisaawe'sxa' pējxtxi: çTxāa jxūth tasx ewmeesa's khubeya' u'jmtha'w? jīte', 29 namu' na'wēk we'we: Kuçx yuunuwe. Txā'wēme!, petx skuutxh tasx yā'jçxa ya'khubeetxna. 30 Manvxihwe, peekx walaatxna, skuutxh wakawa'j en āhpkaçx. Txāa ente adxa' jxkaaja'nja mjiisatxi', aça' jxūth tasx ewmeesa khuē'yna jxuka khubeçxa tudutxna kabwa'j. Txā'wē yūuçxa skuutxha's adx yatte jxaawuutxna jik.

Mostasa fxiwa's kaaja'da'jnisa

(Mr 4.30-32; Lk 13.18-19)

31 Jesusa' na'wēk pta'sx vxite ejemplo kaaja'da'jçxa:

—Naa kiwete Dxus jxkaajxa' takhni ena' na'wēsa': Teeçx mjiisa' mostasa fxiwa's kiwete ujk. 32 Txāa fxiwa' maa maa fxiwtewa thaakwe

le'çxkuëesa'. Nawa buçxayâ'jçxa', maa û'tasxtewa jxthaakwek walá'. Aça' txá'wë seena' walaate', vxiçxakwe yuhwa pa'jçxa ku'tasu yaatu'tx jik.

Lewadura's kaaja'da'jnisa

(Lk 13.20-21)

³³Vxite ejemplo kaaja'da'jçxa na'wëk pta'sx:

—Naa kiwete Dxus jxkaahni ena' na'wë yüuwa'jsa': Teeçx u'y panu'juççxa', tekx libra skuutxh û'wete lewadura's ka'dte ma'wë jxuka pëethejekx txá'wë yüuwa'jsa' jik.

Ejemplo yakh kaapiya'jwa'ja's pta'sxni

(Mr 4.33-34)

³⁴Jesusa' ejemplo kaaja'da'jçxa yuuçxáak pta'sxi' nasa jxukaysatx. Ejemplo kaaja'da'jmée yu', pta'sxi'çme'. ³⁵Txá'wë yüuwa'ja's Dxus yuwe pta'ssxa na'jina fxi'kh txáak kxtey yuu. Na'wëk fxi'j:

Kim yuhtxwa kaajiyu'jnimeesa üsyâ'jtx yu' naa kiwe's vxitiyna txá'sna pta'sxi'nja ejemplo kaaja'da'jçxa yuuçxáa jïnak fxi'j.

Jxüth tasx ewmeesa's äate kaajiyu'jnisa

³⁶Txajü' Jesusa' nasa tasxuh txuteeçxa yattek u'ka, aça' txáa yakh u'jusawe'sxa' utxaaçxa na'wëtx pëjx:

—Jxüth tasx ewmeesa's kaaja'da'jna we'weni's äate mkaajiyu'j jïte',

³⁷Jesusa' pta'sxku:

—Fxiw ewsana uuhsa' Dxus Nçxi'k Nasa Yuusá'. ³⁸Aça' uuthasx jïnisa' naa kiwe'. Fxiw ewsa jina we'we'th txáa yu' nasa Dxus jxkaahnite üswa'jsatxthu txá'jï'. Sa' eçxthê'j nasa yuutxi' jxüth tasx ewmeesa jï'th. ³⁹Aça' jxüth tasx ewmeesa's uuhsa yu', eçxthê'jïçxá'. Skuutxh wakawa'j en jï'th txáa yu' naa kiwe pçuwa'ja'sthu txá'jï'. Aça' ü'a's pkhakhsa', Dxus angeleswe'sxta'. ⁴⁰Jxüth tasx ewmeesa's ma'wëta pkhakçxa ipxte abu' çxhavxykahn, txá'wëy yüuni yuuna naa kiwe pçuute'. ⁴¹Dxus Nçxi'k Nasa Yuusá' angeleswe'sxtxi kajana txá'wë ewmée yüuna vxitetx pkalte kweete'jna üssawe'sxtxi txajx jxkaahna üsnijü kutxi'jçxa ⁴²ipx walate akhkahn. Kxteea' seena' yuh pebeetxna ki'thtxi ksuusu'jna. ⁴³Naapkaçxha' Dxus jxthâasni's kxtey yuusa' sek na'wë eena' kweethetxna Tata cielute jxkaahna üsnite. I'kwe'sxa' jiyuwa'jsa üsçxa', jiyune'kwe.

Iiméh pa'gasa's süthçxa txaahnisa

⁴⁴Naa kiwete Dxus jxkaahna üsni ena' iiméh seena' pa'gasa's kiwe dxiite süthçxa txaahni na'wësa': Teeçx piçthê'jwa ma'wë txá'wë pa'gasa's uyçxa', äçxhíi yu' jxüna ul'jya' äjameeçxa kxteyçxáa wejx ew süthçxa txajakx, sa' wala weçxana ul'jçxa txajx ji'phuni's jxuka txweyçxa txáa

vxyuju kiwe's weyuukx mteene' ewsa's sũthçxa txah txãa kiwe's txã'wẽysa'.

Perla iiméh pa'gasa's uyni

⁴⁵Naa kiwete Dxus jxkaahna ũsni ena' na'wẽsa': Perla zhiçxkwesa's weysaawa ma'wẽ pakweçxa ⁴⁶teeçx perla iiméh pa'gasa's uyçxa', txajx ji'phuni's jxuka txweyçxa txãa vxyuju perla's weyuukx txã'wẽysa'.

Wedx ukhe yakh kaaja'da'jçxa kaapiya'jni

⁴⁷Naa kiwete Dxus jxkaahna ũsni ente' na'wẽ yũuwa'ja': Wedx ukhe'swa ma'wẽ ikhwalakhẽ akhte', wedx ma'wẽsatxwa jxuka pkhakhehx. ⁴⁸Aça' wedx uwesá' ukhe's tuhmete kutxi'jçxa wedxtxi txhitxhya' kaççxa ewsa's kanastate äsxçxa', ewmeesatxi' ikhwalakhẽ äsxitxki ⁴⁹txã'wẽy yuutxna Dxus angeleswe'sxa' naa kiwe pçuwa'j en ähte'. Sa' txãawe'sxa' ewmeesatxi' ewsa ksxavxyuh txhitxçxa ipx walate akhetxna. ⁵⁰Kxteea' seena' yuh pebeetxna ki'thtxi ksuusu'jna.

Nyafxíi kaapiya'jni'swa jiisa u'sesa'swa jiisawe'sx

⁵¹Txã'wẽ kaapiya'jni's Jesusa' na'jĩnak pějx:

—¿l'kwe'sxa' jxuka jiyukwe' na'wẽ pta'sxni's? jíte', txãawe'sxa':

—Jiyuúitha'w jĩnatx pas.

⁵²Aça' Jesusa' na'wẽk we'we:

—Dxus jxkaahwa'j ena's jiyusa' ley kaapiya'jsawa ma'wẽ nyafxíi kaapiya'jni's piyaçxa kaapiya'jni u'sesa'swa jxpa'gaçxa wala jiisa yuukx txã'wẽy e'z jwed jiisa yuutxna jĩk.

Jesusa' Nasaretna u'jni

(Mr 6.1-6; Lk 4.16-30)

⁵³Naa ejemplotx Jesusa' pta'sxna jxã'jçxa', txajũ u'kh txajx kiwen.

⁵⁴Kxteea' judiuwe'sx pkhaakhenitek kaapiya'jna ũsu'. Aça' nasa' kuh yajxna na'jĩ'tx:

—Naa piçthẽ'ja' çmteeki'k txakwe wala piya txã'wẽ äjaya'? ¿Ma'wẽ yũuçxaga txã'wẽ kim yuhwa äjanimeesa's kaavxya'ja'ja'? ⁵⁵Naaíi ¿karpintero nçxi'k meená', aça' njĩ'ja' Maria meená'? Aça' txajx nyakhwe'sxa' Jakobo, Jose, Simon, vxite' Judas txãawe'sxta', ⁵⁶aça' txajx npe'sxwe'sxwa ayte kwe'sx yakh ũsta'. ¿Majũki'k piya na'wẽ kĩhnawa jxuka äjawa'ja's? ⁵⁷Txã'wẽ jiiitx yu', txãa pa'gatx Jesus we'weni's kxtey yuumée. Nawa Jesusa' na'wẽk we'we:

—Dxus yuwe pta'sxsa' peekx kiwesu vxite' peekx yattewe'sx weeçxni yuuçxáa fxi'zetxna maawa jĩçxa', ⁵⁸kim yuhwa äjanimeesa's jwee yu' kaavxya'ja'ljme', txãawe'sxa' txajx we'weni's kxtey nwéesel'jmeeta' naa pa'ga.

Juan Bautista uuní
(Mr 6.14-29; Lk 9.7-9)

14 ¹Txãa ensu' Herodesa' Galilea kiwetek ne'ljwe'sx yu', sa' Jesus kíkíkhwa ew yūuni's jiyuça'a, ²txãa yakh ùssawe'sxtxi na'wèk we'we:

—Txãa piçthê'ja' Juan Bautistane' ki' itxi yuu. Txãasane' txã'wê kim yuhwa àjanimeesa'swa kaavxya'ja'jya' àja' jík.

³Herodesa' Juan Bautista's na'wê yūuça'ga ikh: Juana's tudça'a karcelte ktxaaja'kha, nawa Herodes nyakh Fxelipe nyu Herodias pa'gaçxáane' txã'wê karcelte ktxaaja'j. ⁴Txãa ensu' Juan Bautista' Herodesa's we'weçxa'a:

—Iidx yakhthê'j nyua's kusa'jçxa iidx nyu na'wê jxpe'jwa'j ji'phmeeg jíte', ⁵Herodesa' Juana's ikhe'nja sūhne'. Nawa nasa jxukaysa Juan ju'guçaçxáane'ta ūsu', Juana' Dxus yuwe pta'sxsapa'ga. Txãa pa'gane' ūukhçxa ikhmée karcelteçxáa txah. ⁶Nawa teeçx ente' Herodesa' txajx upxni en anxu àhte fxiesta vxitte', Herodias niisa' nasa pi'kxnisa dxi'pte wala zhiçxkwe ku'jya' kasehne'. Txãa pa'ga Herodesa' iiméh wala weçxaçxa, ⁷kíh pèjxtewa jxuka ūsu'nja jínane' puutx we'we txãa kna'sa's. ⁸Txajū' nji'l'j yu'kxpehte', txãa kna'sa' na'wêga pèjx Herodesa's:

—Juan Bautista dxikthea's plaatute akhçxa ūsune'ga jíte', ⁹ne'ljwe'sx Herodesa' wala nxusçxawa, txã'wê yá'jne' kíh pèjxtewa ūsya' puutx we'we nasa pi'kxnisa dxi'pte, txãa pa'ga kxtey yūuya' neeyūuyá'jçxa', ¹⁰Juan dxikthea's spê'thkaahne' karcelte. ¹¹Aça' dxikthea's plaatute akhçxa ūste', txãa kna'sa yu' nji'ja'sne' dukh.

¹²Txã'wê yūute', Juan Bautista yakh pi'kxna u'jusawe'sxa' pa'jçxa uuní kakwe's jxūna u'jçxa pedaane'ta. Sa' u'jçxa Jesusa's pta'sxne'ta.

Cinko mil nasatx Jesus sã'jīni
(Mr 6.30-44; Lk 9.10-17; Jn 6.1-14)

¹³Txã'wê Herodesa' Juan Bautista's ikhku jīni's Jesusa' jiyuça'a, barkote khêeçxa u'kh teeçx ahte kim yuhwa u'pnimeesate pa'jya'. Nawa Jesus mtee pa'jya' u'thewa jiyuça'a nasa' çxhabu kasehçxa Jesus pa'jwa'the pakwena ul'jtx çxidaçxáa. ¹⁴Aça' Jesusa' barkoju kasejeççxa' uyku nasa wala kuh ūste, sa' txãawe'sxtxi peeygãhçxa nuykatxhik áça'satx pe'jçxa nuypa'jnisatxi'. ¹⁵Txajū' kusna kijaçte', txãa yakh ul'jusawe'sxa' Jesus tasxte utxaaçxa na'wêtx we'we:

—Kusuçyã'ja', naapkaçxha' aysu' kim yuhwa u'pnimeesa'. Aça' nasatxi' mkaah çxhabsu pa'jçxa kíhçxáawa weyçxa ū'kahn jíte', ¹⁶Jesusa' na'wèk pas:

—Txãawe'sxa' ū' weyya' ul'jwa'j peejxmeena. I'kwe'sx mpuuçwe jíte', ¹⁷na'wêtx pas:

—Kwe'sxa' kīhwa wala yu' ji'phmeetha'w. Tahç pan e'z wedxçxáa ji'phtha'w jīte', ¹⁸Jesusa':

—Txāatxi' mneejxūhwe jīnak jxkaah.

¹⁹Txajū' nasatx kaçxkaakh txaksū. Sa' tahç pan e'z wedxtxi jxpa'gaçxa, cielute pagayçxa Dxusa's weçxaçxa pantxi pe'ltedek. Txā'wē yūuçxak txāa yakh u'jusawe'sxtxi ūs, aça' txāawe'sxa' ūsu'stxi nasatx. ²⁰Aça' jxukaysa ū'çxa txikte!, doce kanastate utatx kijxasaatx pkhakh. ²¹Ū'sawe'sxa' cinko mil piçthē'jtx yu', u'ywe'sx vxite' luuçxwe'sxtxi yu'.

Īkh kajkwega Jesus u'juni

(Mr 6.45-52; Jn 6.16-21)

²²Txajū' Jesusa' txāa yakh u'jusawe'sxtxi barkote yaçte kaakh, sa' txāa yu' kxtee neeyūuk nasa txuteena u'jsatx weçxana. ²³Txajū' nasa jxuka txuteena u'the!, thā'j vxiçna u'kh txāaçxáa Dxus yakh puutx we'weya'. Jxuka çxhi'dxni yā'thewa, Jesusa' kxtee nee ūsīçxáak yu'. ²⁴Naapkaçxha' barko' ĩkh pxājūy u'jweçku yu'. Aça' wejxaa wala kiiteçxa, dxi'puh sēhçxa barko's yupku. ²⁵Aça' khikhyna sējxa'wate!, Jesusa' utxaana kūjk ĩkh kajkwega çxidaçxáa. ²⁶Aça' ĩkh kajkwega txā'wē yuhte uyçxa', barkote u'jsawe'sxa' ūukhna na'jīnatx sus we'we:

—Eçxa'stha'w uy jīte!, ²⁷Jesusa' na'wēk we'we:

—Ūukhnuwe, adxthu jīte!, ²⁸Pedro we'weçxa' na'jīk:

—Adxthu jī'g na' txāa dxihçxa!, adxwa txā'wēy ĩkh kajkwesu çxidaçxáa yujxa' ājakahn mkaah jīte!, ²⁹Jesusa':

—Txā'wēçxa' myuh jīnak we'we.

Aça' Pedro' barkojū sa'jçxa, Jesus tasxte pa'j u'jya' u'jweçku yu' ĩkh kajkwesu. ³⁰Nawa wejxa seena' çxhāçxha ūste!, ūukhku. Sa' txā'wē ūukhpa'gaçxáa ĩkh dxiikhē khējeççxa!, susku we'we:

—Meen nwe'we jīçpkaçxha!, ³¹Jesusa' pu'kiççxa na'jīk:

—¿Kījxa'ga Dxusa's yu' yajkxmée, ūukhwa'jçxá's yajkx? jīçxa!,

³²Jesusa' barkote Pedro yakh khējeçpkaçxha!, wejxaa wala' jxuka yujuk. ³³Aça' barkote ūssa' Jesus tasxte peejxūkweçxa na'wēt x we'we:

—Isa, idxa' Dxus Nçxi'k yuh yu'ga jītx.

Genesarettewe'sxtxi Jesus nuykatxhini

(Mr 6.53-56)

³⁴Īkhuy ktejkaçxa!, Genesaret kiwete pa'jtx. ³⁵Aça' kxsū nasa' Jesus pa'jni's jiyuçxa txāa kiwesu nasatx jxuka pta'sxte!, nasa' āça'satx jxuka Jesus tasxte nuypa'jtx, ³⁶na'jīna pxthaa we'wena:

—Īdx atxh vxiçteçxáawa makhya'dxi'l jīçxa, txā'wē jxa'dxsa' jxuka katxhiçxatx neeyū'.

Nasa's ewmée vxit-sa

(Mr 7.1-23)

15 ¹Fxariseowe'sx vxite' ley kaapiya'jsa txāawe'sxa' Jerusalen çxhabu pa'lçxa', maái yu' na'jīnatx Jesus tasxte utxáa:

²—Idx yakh u'ljusawe'sxa' çkīh yūuçxata yaçgawe'sx kaapiya'jnitxi' kxtey yu'çmée, txā'wē kusekhē yu' kaahmée ū'wé'?

³Txā'jīte', Jesuswa pējxku na'jīna:

—I'kwe'sxwa çkīh yūuçxakwe i'kwe'sx yaçgawe'sx kaapiya'jniçxá's nwēese'jçxa' Dxus jxkaahni yu'sa' kxtey yu'çmée? ⁴Dxusa' na'wēk jxkaaja': Iidx tata iidx mama txāawe'sxtxi' peeygāhna pu'çxwa'ja'. Aça' txā'wē yūumée neywe'sxtxi açewe'wesa' uu ena's ji'phuna jī'k. ⁵Nawa i'kwe'sxa' yaçga kaapiya'jniçxá's nwēese'jçxa' Dxus jxkaahni yu'sa' kxtey yuumée ūsi'kwe. ⁶I'kwe'sx yaçgawe'sxa' na'wēttx kaapiya'ja': Maa nasawa neywe'sxtxi peeygāhna pu'çxmée, adx ji'phuni i'kwe'sxtxi pu'çxwa'ja's Dxusna dukhe'nja jīna we'weçxaçxáa, neywe'sxtxi' pu'çxmeetewa ewa' jī'tx. ⁷Yuwejuçxáa ew we'weçxa', ūuste yu' ewmeeçxáa yaakxsa'i'kwe, aça' Dxus yuwe pta'sxsa Isaiasa' isa yuh Dxus we'weni's na'jīna fxi'jne':

⁸Naa nasa' yuweju yu' adxa's yaaki'tha'w jīçxawa, ūusuh yu' adxa's yaaki'çmeeta'.

⁹Naa kiwete nasaa kaapiya'jniçxá's kxtey yuuna ūççxa, txā'wē Dxus jxkaahni'stha'w kxtey yu' jīte', kxul yuhna jī'k.

¹⁰Txajū' nasatx pa'yaçxa na'wēk we'we Jesusa':

—Jiyuya' mwēese'jwe. ¹¹Kīh ū'wa tutxhtēçxáa khēesa yu', nasatx ewmeesa vxitu'çme', naasáa ūusuh ewmée yaakxnisa yuuçxáak nasatx ewmeesa vxitu'.

¹²Txajū' Jesus yakh u'ljusawe'sxa' utxaaçxa na'wēttx we'we:

—Idx txā'wē we'wete', fxariseowe'sxa' ūusaçxanatx neeyūu jīte',

¹³Jesus paççxa':

—Kīh tasxwa adx Tata cielute ūssa uuhnisamée yu'sa' khubeni yuuwa'ja'. ¹⁴Aça' ūukhnuwe. Txāawe'sxa' yafx ji'phmeesa, yafx ji'phmeesa nwe'sxtxi pe'jna u'ljusaçxáata'. Txā'wē yafx ji'phmeesa yafx ji'phmeesa nwe'sxtxi pe'jna u'ljuçxa', e'zīi kafxkhē khējetxna.

¹⁵Txā'jīte', Pedro' Jesusa's na'jīnak pējx:

—Ejemplo kaaja'da'lçxa we'weni's áate mpeeta'sx jīte', ¹⁶Jesusa' na'jīnak we'we:

—çI'kwe'sxwa jiyu'çmeewá'kwe? ¹⁷Kīh ū'wa tutxhkhēçxáak u'ljwe', sa' txajū ki' kaseje'k. ¹⁸Nawa ūusuh yaakxnisa yuuçxáak nasa's ewmeesa vxitu'. ¹⁹Txāa pa'gatey ūusuçk kaseje' ewmée yaakxnisa, nasatx ikh wēenisa, ptamçxawa vxitesa yakh fxi'zeni, ma'wēsa yakhwa pkal yuuna fxi'zeni, pesweeni, īsxiina ewmée nuywe'weni, Dxusna açewe'weni. ²⁰Txā'wē yaakxnisatx nasa's ewmeesa vxitu'. Nawa kusekhē yu' kaahmée ū'nisaçxáa yu', nasatx ewmée vxitu'çme'.

Teeçx u'y judiu ji'jmeesa Jesusa's jxpa'gasa
(Mr 7.24-30)

²¹Jesusa' txajü kasehçxa u'kh Tiro vxite' Sidon kiwen. ²²Aça' teeçx u'y Kanaanuwe'sx txãa kiwete pa'ljçxa u'psa' Jesus tasxte pa'kh pxthaa we'wena:

—Davxid jilj, ù'kwe's meen peeygãh. Ù'kwe niisa's eçx iiyamute', iiméh wala pxthaa yuuna üsa' jítewa, ²³Jesusa' ma'wëçxáa yuhwa pasme'. Aça' Jesus yakh u'ljusawe'sxa' Jesusa's we'wetx na'jîna:

—Kwe'sx e'ste kuçx susna yuukahmen yatna mkaah jíte', ²⁴Jesusa' na'jînak pas:

—Piisxakuë na'wë vxituna üssa Israelwe'sxçáatxku pakweya' kaah Dxusa' jítewa, ²⁵txãa u'ya' sxuuna' yuumée utxaana kühçxa txajx tasxte peejxükwek:

—Ù'kwe's meen pu'çx jîna. ²⁶Aça' Jesusa' na'jînak we'we:

—Luuçx ù'wa'ja's kusa'ljçxa alkutx üswa'jme' ²⁷jítewa, txãa u'y pasçxa':

—Isa yuh we'we'g. Nawa alku' pejka ù'we'tx mesa tasxsu pan pe'la üsxisaçxáatxwa jíte', ²⁸Jesus we'weçxa':

—Dxusa' pu'çxyujuna sühwalj yuuçxá's i'kwe yaaki', txãa pa'ga i'kwe pëyni' kxtey yuuna jičpkaçxha', txãa dudtey txãa u'y niisa' katxhinik neeyüu.

Maazkuëe äça'satxwa Jesus nuykatxhini

²⁹Jesusa' txajü kasehçxa Galilea ìkh pukasuk u'j. Sa' thãlj vxiçtek tejka. ³⁰Aça' nasa wala pa'ljtx txajx tasxte äça'satx pe'ljçxa, legsa, uyya' äjasamée, we'weya' äjasamée, ëseyä' äjasameetx. Aça' txã'wë wala kuh äça'satx Jesus tasxte nuypa'the', txã' nuykatxhik. ³¹Txã'wë we'weya' äjasameewa we'weya' äjatx, aça' ëseyä' äjasameewa katxhitx, aça' legsawa ew u'jya' äjatx, naapkaçxha' uyya' äjasameewa uyya' äjatx. Aça' nasa' wala kuh yajkxna Israelwe'sx Dxusa's wala weçxatx.

Kuatro mil nasatx Jesus sä'jîni

(Mr 8.1-10)

³²Txajü' Jesusa' txãa yakh u'ljusawe'sxtxi pa'yaçxa na'wëk we'we:

—Naa nasa' ayte adx yakh tekh en yãlj üsta', sa' kîh yuhwa ù'walj jil'phmeeta', txãa pa'gath peeygãja', sa' puuçmée yu' kaahme'nja.

Txã'wëme' dxi'the u'jya' çxhãçxhameetxna jíte', ³³na'wëtx pas:

—Nawa çkîhte txakwe wala ù' uyuukxtha'w nasa txãazkuëesa ù'walj? Ayte' kim yuhwa u'p kiweme' aça' jíte', ³⁴Jesusa' pëjxku:

—I'kwe'sxa' çmaz pan jil'phkwe? jíte', txãawe'sx pasçxa':

—Siete pan, wedx kuhmeekuëçxáa jil'ptha'w jînatx pas.

³⁵Aça' nasatxi' kiwesu kaçxkaahçxa', ³⁶siete pan vxite' wedxtxi jxpa'gana'wa Dxusa's weçxak. Txã'wë yüuçxak pe'l'tedeçxa txãa yakh u'ljusawe'sxtxi üs, aça'

txāawe'sxa' nasatx ũsu'stxi. ³⁷Jxukaysa ũ'çxa txikte', kijxaasa's pkhakhtxi, aça' siete kanastate utak neeyũu. ³⁸Ũ'sawe'sxa' kuarto mil ähtx yu', nawa u'y vxite' luuçx txāawe'sx yuutxi' isaniméek kxaz yu'. ³⁹Txā'wē yũuçxa Jesusa' nasatx kaahçxa', txāa yu' barkote khēeçxa Magdala kiwenku u'j.

Fxariseo vxite' saduceowe'sx cieluju kīhçxáawa kaavxya'ja'khaahni
(Mr 8.11-13; Lk 12.54-56)

16 ¹Fxariseowe'sx vxite' saduceowe'sxwa pa'jçxa', Jesus ewméé yūutewa kpajkxya' sūhçxa pējxtxi:

—Cieluju kīhçxáawa mkaavxya'ja'j jīna.

²Nawa Jesus pasçxa' na'jīk:

—Kusna sek khējeçte', kuskusa' sekuuna, ew kusuça' jī'i'kwe. ³Sa' kusí we'weçxa', äçxa' en ewméé yuuna, täaphçxáa ũsa' jī'i'kwe. Yuwejuçxáa ew we'weçxa', ũuste yu' ewmeeçxáa yaakxsa, en ma'wē yūuwa'ja'swa jiyu'i'kwe i'kwe'sxa'. Nawa naa ensu na'wē seena'sa vxyaaça' txāa yu'sa' jiyuya' äja'çmeei'kwe kīh yūuya' txā'wē yūuçtewa. ⁴Naa nasa ewmeesa' cieluju seena'sa's kaavxya'ja'j jxthāasu'tx. Nawa peena yu' kaavxya'ja'jmeete ewna, naasáa Jonasa' ma'wēga yuu txā'sçxáana ya'pta'sxina jīna we'weçxaçxáa nvxihtçxa u'kh.

Fxariseowe'sx kaapiya'jni's lewadura yakh kaaja'da'jni
(Mr 8.14-21)

⁵Jesus yakh u'jusawe'sxa' i'khwala kuten u'jweççxawa, peçxkanaçxa pan yu' jxūmeeta u'j. ⁶Kxtee pa'jçxa', Jesusa' na'wēk we'we:

—Mpa'yajkxwe, fxariseo vxite' saduceowe'sx lewadura ewmeesa's jīte', ⁷txāawe'sxa' na'wētç puutx paapēyi':

—Pan jxūmeetha'w aça' kxahne' txā'wē we'we' jī'tx.

⁸Txā'wē we'weni's Jesus jiyuçxa' na'jīk:

—¿Maa sūhçxakwe pan jī'phmeetha'w jīna we'wé'? Pan jī'phmeetewa, Dxusa' thēyméé sāl'jīna sūhwa'j yu'sa' jī'phmeewá'kwe. ⁹Adxa' na'wē tahç pan yakhçxáa cinko mil nasatx thēyméeth sāl'jī aça' kijxaasa's maz kanasta pkhakhçxawa txā'sa' yaakiçmeewá'kwe. ¹⁰Vxite ente' txā'wēy siete pan yakhçxáa kuarto mil nasatx thēymeeth sāl'jī aça' kijxaasa's maz kanasta pkhakhçxawa yaakiçmeewá'kwe. ¹¹I'kwe'sxa' jiyumeewá'kwe adxa' pana's we'weçxa txā'wē mpa'yajkxwe fxariseo vxite' saduceowe'sx lewadura ewmeesa's jī'çmeeth.

¹²Txajū' jiyutx Jesusa' txā'wē pante ka'dnisa lewadura's we'wemée, fxariseo vxite' saduceowe'sx kaapiya'jni's we'weçxa txā'jīni's.

Pedro' jiyuk Jesusa' Dxus tasxu yuusaatewa
(Mr 8.27-30; Lk 9.18-21)

¹³Jxkaahsa Fxilipo vxitni çxhab Cesarea ja'dasu pa'jçxa', Jesusa' na'jīnak pējx txāa yakh u'jusawe'sxtxi:

—Dxus Nçxi'k Nasa Yuusa's çkimna jīnata we'we' nasa'? jīte', ¹⁴na'wētx pta'sx:

—Maafi yu' Juan Bautistana jī'tx. Vxite we'wesa' Eliasna jī'tx. Aça' vxite we'wesa' Jeremiasna meeçxa' vxite kasehne' Dxus yuwe pta'sxsa jī'tx jīna pta'sxte', ¹⁵Jesus pējçxa':

—I'kwe'sxa' çkimna jī'kwe? jīte', ¹⁶Simon Pedro' na'wēk pas:

—Idxa' Dxus itxisa Nçxi'kgu, txajx tasxu yuusa jīte', ¹⁷Jesusa' pasku na'jīna:

—Jonas nçxi'k Simon, idx yakha' wala weçxa yuja'. Idxa's naa kiwete piçthē'j kaajiyu'jmeeta'. Adx Tata cielute üssa yuuk kaajiyu'j adxa' Dxus itxisa Nçxi'ktewa. ¹⁸Idxa' Pedro yaaseg aça' idxwa ma'wēga adxa's ew jiyu txā'wēy maawa ew jiyuwa'ja's idx yakh nvxiitu'nja. Aça' txā'wē ew jiyunijū' eçxthē'j yuhwa knaymeena Dxus luuçtxi'. ¹⁹Dxus jxkaahna üsnite pa'jwa'j dxi'ja's phadewa'ja's idxa's üsu'nja, aça' idxa' maataxwa we'weçxa': Pkaltxi' Dxusa' peltuna'ina jīte', peltunāyni yūutxna. Nawa peltunaimeena jīte', peltunāynimée neeyūutxna jik.

²⁰Txajū' Pedrowe'sxtxi neewe'wek, Jesusa' Dxus tasxu yuusa yuh yu'ga jīna maa yuhtxwa pta'sxkahnén.

Jesusa' txajx uuwa'ja's pta'sxni

(Mr 8.31–9.1; Lk 9.22–27)

²¹Txāa entek Jesusa' nyafxçah pta'sx txāa yakh u'jusawe'sxtxi na'jīna:

—Jerusalenna u'jwa'j jī'pthu. Kxteea' wala pkxuuni yu'nja judiu nthē'jsawe'sx vxite' sacerdote npiiçthē'jwe'sx vxite' Dxus leya's kaapiya'jsa txāawe'sx kusete. Txāawe'sxa' ikhetxna, nawa tekh ente' ki' itxi yu'nja jīna pta'sxte', ²²Pedro' Jesusa's fxiite pe'jna u'jçxa na'wēk yu'kxpeh:

—Idxa's txā'wē yūuwa'j yu'sa' Dxusa' jxthāasmeewaça', ewna jīte', ²³Jesusa' yu'thegçxa na'wēk we'we Pedro's:

—Eçxthē'j, adx tasxuh mtzutée. Idxa' suw wēenaçxáa üsgu. Dxus jxthāasni yu'sa' kxtey yuumée, naa kiwega nasaa yaakxnixçá'sgu kxtey yuu wēje'.

²⁴Txajū' Jesusa' txāa yakh u'jusawe'sxtxi ki' we'wek:

—Maawa adx yakh yuu wēeçxa', peekx kakwe jxthāasni's kīhnawa jxuka nvxihtçxa yuuçxáa adx yakh yujxa' ājane'kwe, makwe pxthaa yuwa'j seena'sa ma'k yuu nawa txā'sa' ūukhmée. ²⁵Txā'wēme', naa kiwete peekx itxi fxi'zewa'jçxá's ya'nwe'wesa', Dxus yakh fxi'zewa'j yu'sa' ivxiituna. Nawa adx yakh fxi'zepa'gaçxáa naa kiwete itxi fxi'zeni's yajxkmée ivxiitusa', Dxus yakh fxi'zewa'j yu'sa' ivxiitumeena.

²⁶Makwe naa kiwetewe'sx yu'sa' jxuka knayçxawa peekx ūus yu's ivxiitute', çkīhteçxá' selpiima'k? Peekx ūusa's ivxiituyā'the', çkimçxa' nwe'wema'k? ²⁷Jxpa'yakxmeete', Dxus Nçxi'k Nasa Yuusa' ki' kīijana

Ney eena' kweethni pxāhte txajx angeleswe'sx yakh, açá' ma'wēçxah yūusaaçxawa teeçxsa na'wēçxah jxpa'gatxna. ²⁸ Isath we'we', ayte ūssa maai' yu' nee uumey uyuune'kwe txā'wē Dxus Nçxi'k Nasa Yuusa' jxkaajxa' pa'jni's jīnak pta'sx.

Jesusa' zhiçxkwe yu'pthehçxa vxyaani

(Mr 9.2-13; Lk 9.28-36)

17 ¹Seis en skhēwniite', Jesusa' pe'jna u'kh Pedro vxite' pxakhsa Jakobo Juan txāawe'sxtxi teeçx vxiç walate. ²Sa' kxtee pa'jçxa', txāawe'sx dxi'pte Jesusa' wala zhiçxkwe yu'pthehçxak vxyaa. Txajx dxi'pa' sek na'wēk eena' khi'khi', açá' txajx athni ropa' seena' zhiçxkwe çihme yuuk. ³Naapkaçxha' Moises vxite' Elias txāawe'sxa' Jesus yakh puutx we'wenatx vxyaa. ⁴Txā'wē uyçxa', Jesusna na'wēk we'we Pedro':

—Ayte! kwe'sx ūswa'j wala ewa'. Açá' idx ewna jīte', tekh wa'kuē txaja'nja'w, vxite' iidx jīi vxite' Moises jīi vxite' Elias jīi.

⁵Txā'jīna Pedro' we'wena ūsiyna, tāaph seena' zhiçxkwe çihmesa kūhçxa aphku. Açá' txāa tāaphthe na'jīnak we'weni pthūuse:

—Na' adx Nçxi'k wala wedxnisa', txāa pa'ga wala weçxana ūsthu. Txā'sa' nwēese'jna kxtey myuuwe jīni's ⁶Pedrowe'sxa' wēse'lçxa', wala ūukhçxa kiwega pkipha wetetx. ⁷Açá' Jesusa' txāawe'sxtxi jxa'dxçxa na'wēk we'we:

—Ūukhmée mkiitewe jīte', ⁸kiiteçxa' Moiseswe'sxtxi' uymeeyā'tha', naasáa Jesusçxáa yā'kh ūs yu'.

⁹Txajū' thā'ju sa'jna u'jweççxa', Jesusa' na'jīnak jxkaah:

—Kim yuhtxwa pta'sxmeene'kwe txā'wē uyni's, Dxus Nçxi'k Nasa Yuusáa uuçxawa kí' itxi yuupkaçx jīte', ¹⁰Pedrowe'sxa' Jesusna na'wētçx pējx:

—Dxus leya's kaapiya'jsawe'sx pta'sxçxa', Elias khuē'y yaçte pa'jana jī'tx, sa' çma'wē yuuwa'lsaxk açki'tx txā'jī'? jīte', ¹¹Jesusa' na'wēk pta'sx:

—Isa, Elias khuē'y yuh yaçte pa'jwa'jsa yu'k, açá' isa yuh pta'sxi'ne'ta. ¹²Adxa' na'jī'th na', Elia'sa' yaçte pa'jyujk. Txā'wētewa nasa' jiyumeeçxa, txā'sa' kījki'hwā yūutx. Açá' Dxus Nçxi'k Nasa Yuusáawa wala pkxuuni yuuna txāawe'sx kusetey jīk. ¹³Açá' Pedrowe'sxa' jiyutx Jesusa' Juan Bautistana yajkçxa we'weçtewa.

Teeçx luuçx wēeçxpa'jsa's Jesus nuykatxhini

(Mr 9.14-29; Lk 9.37-43)

¹⁴Txajū' txāawe'sxa' sxawedna kijaçte', nasa wala pkhaakhena ūsu'tx. Açá' teeçx piçthē'j Jesus tasxte peejxūkwena kūhçxa', na'wēk pxthaa we'we:

¹⁵—Adx nçxi'ka's meen peeygāh, wēeçxpa'jçxa iiméh seena' pxthaa yuuna ūsa'. Maa enteya' ipxkhēwa khēje'k, sa' yu'khēwa khēje'k. ¹⁶Açá'

idx yakh u'jusawe'sx tasxte jxūna kūhtewa, nuykatxhiya' ājameeta' jīte',
 17 Jesusa' na'jīnak pas:

—Dxusa' pu'çxhina sūhwa'l jyu'sa' ji'phmeesata' naa nasa'.

¿Bagaçxpkaçx i'kwe'sx yakh pu'çxna ūs ya'watka? ¿Bagaçxpkaçx ājamée fxi'ze ya'wakwe? Luuçxa's ayte mneejxūhwe jīte', 18 jxūna kūjuçpkaçxha', Jesusa' eçxa's juuna' we'weçxa kutxi'kh luuçx ūusu, aça' txāa dudtey katxhinik neeyūu.

19 Jesusa' yakh u'jusawe'sxa' Jesusa'sçxāa fxii pa'yaçxa, na'jīnatx pējx:

—Kwe'sxa' ¿kīh yūuçxakxtha'w eçxa's kutxi'jya' ājamée? jīte', 20 Jesusa' pta'sxku:

—Dxusa' pu'çxhina sūhwa'l yuuçxá's yaakxpa'gamée i'kwe ājamée.

Isath we'we', Dxusa' pu'çxhina sūhwa'ja's mostasa fxiw na'wē le'çxuēesaçxáawa ji'phwaça', naa vxiç wala's we'weni yakhçxāa fxiite ki'pxa' ājane'kwe. Dxusa' pu'çxhina sūhwa'l yuuçxá's yajkxwaça', i'kwe'sx yakha' kīh yuhwa thēysameena. 21 Na'wēsa eçxa' thēmée yu' kasehmeena, wala yūunaana Dxus yakh puutx we'wete yuuçxāa kasejena jīk.

Jesusa' txajx uuwa'ja's ki' pta'sxni

(Mr 9.30-32; Lk 9.43-45)

22 Txajū' Galilea kiwete ūsçxa', Jesusa' txāa yakh u'jusawe'sxtxi' pta'sxku:

—Dxus Nçxi'k Nasa Yuusa's nasa ewmeesa kusete dukhni yuuwa'ja'.

23 Aça' ikhetxna, nawa tekh ente' ki' itxi yuuna jīna pta'sxte', txāawe'sxa' wala nxustxi.

Dxuus yatpa'ga vxyu dukhni

24 Jesusa' txāa yakh u'jusawe'sx yakh Kapernaum çxhabte pa'the', dxuus yattewe'sx vxyuu pkhaksawe'sxa' Pedro's thegya' u'lçxa na'wētçx pējx:

—I'kwe'sxtxi kaapiya'jsa' ¿dukheçmeewá' dxuus yattewe'sx vxyu's? jīte', 25 Pedro we'weçxa':

—Dukhe'fik jīnak pas. Sa' Pedro' Jesus ūsni yatte kūjuçpkaçxha', Jesusa' na'jīnak we'we:

—Simon, idxa' ¿maa sūju'ga? Naa kiwete jxkaahsawe'sxa' vxyu kaapkhakhe'lçxa', ¿kimtxi pēywa'ja' jī'ta? ¿Jxkaahsa ji'ljwe'sxwa dukhe'ta', meeçxa' txāa ji'jmée ekajuwe'sxçxāa wá'nta dukhe'? jīte', 26 Pedro' na'wēk pas:

—Ekajuwe'sxçxāatx dukhe' jīk. Aça' Jesusa' na'wēk we'we:

—Txā'wēyā'the', jxkaahsa ji'ljwe'sxa' dukhwa'jsameeta'. 27 Nawa kim yuhtxwa kaaūusçxa'ljya'mée idxa' u'lçxa i'khwalate wedx yūhza's akhene'ga, sa' nyafxte wedx kāasa's kaawayi'lçxa uyuune'ga teeçx vxyu ji'lphna. Txāa yakh dukhene'ga adx pa'gate vxite' iidx pa'gate yā'lçxa jīk.

Kim wejx jxthaakwe jxtuhthesakx
(*Mr 9.33-37; Lk 9.46-48*)

18 ¹Txãa ensu! Jesus yakh u'jusa docesawe'sxa' txajx tasxte utxaaçxa na'wêtx pëjx:

—Naa kiwete Dxus jxkaajxa' kii ente' çmaa wejx jxthaakwe walasakxtha'w? jite!, ²Jesusa' teeçx luuçxkuê's pa'yaçxa txãawe'sx ksxavxyte txahçxa ³na'wêk we'we:

—Isath we'we!, i'kwe'sxa' iiwejçx yaakxni's nvxihtçxa naa luuçx na'wê yuumeeçxa yu!, Dxus jxkaahna üsnite u'kaya' ajameene'kwe. ⁴Txã'wê kihtewa ahmeekwesa naa luuçx na'wê yuusa yuuçxáa, Dxus jxkaahna üsnite! maatewa jxthaakwe walasa yuuna. ⁵Maa nasawa adxna jxpa'gaççxa ma'wê weçxana jxpa'gatx txã'wêy weçxana naa luuçxkuê na'wêsatx jxpa'gana txã' adxna jxpa'gasa yuuna.

Pkalte kweete'jya'mée jxpa'yakxwa'ja'
(*Mr 9.42-48; Lk 17.1-2*)

⁶Adxna jxpa'gasa ahmeekwesatx maawa pkalte kweete'jsa's txhikhte skuutxh ü'khni kweta's tudçxa îkh wala dxiikhê akhwaççxáa, wejx ewna. ⁷Naa kiwete ewmeesa' bagaçxtewa nes yuutxna. Nawa naa kiwete ewmeesa yakha' seena' yuh üukhüukha'. Sa' maawa txã'wê pkalte kweete'jena txãa yu' weh yuhwa iyumeena.

⁸Txãa pa'ga iidx kuse ma'k yuu meeçxa' iidx çxida ma'k yuu nawa txã'wê pkalte kweete'jpçxâh yuuçte!, txã'sa' spê'thçxa mwãatah. Txã'wê pçuwa'jmée ipx walate e'z kuse e'z çxida ji'ph akhni yuu na'wê!, wejxwa pçumée itxi fxi'zewa'the çxida ji'phmée legkuêçxáawa kxtee u'kani wejx ewa!. ⁹Iidx yafx txã'wê pkalte kweete'jpçxâh yuuçte!, kutxi'jçxa mwãatah. Infxierno ipxte e'z yafx ji'ph üs na'wê!, wejxwa pçumée itxi fxi'zewa'the teeçx yafx yakhçxáawa u'kani wejx ewa!.

Piisxáa vxitusa yakh kaaja'dal'jni
(*Lk 15.3-7*)

¹⁰Naawe'sx ahmeekwesa maa yuhtxwa açenuwe. Na'jĩ'th na': naawe'sxtxi pi'lxna u'jusa angeleswe'sxa' cielute adx Tata tasxte nes yuusaata!. ¹¹Txã'wême!, Dxus Nçxi'k Nasa Yuusa' vxitusatx nwe'weya'k kîh.

¹²I'kwe'sxwaççxáawa çna'wê yũumeema'kwe? Cien piisxáa ji'phçxa!, teeçxsa' vxitute!, nowenta y nwewesatx vxiçsü nvxihtçxa piisxáa vxitusa' pakweya' çu'jmeema'kwe? ¹³Sa' uyçxa!, vxite vxitusamée nowenta y nwewesate jxthaakwe peeygâhna weçxaane'kwe. ¹⁴Txã'wêy i'kwe'sx Tata cielute üssawa teeçxçxáa yuhwa vxitu jxthãasu'çme' naawe'sx ahmeekwesatewa.

Peekx yakhthê'ja's maz us peltunäywa'j yuukx
(Lk 17.3)

¹⁵Iidx yakhthê'j idxa's ewmée yūute!, txā'sçxáan pa'yaçxa mkaajiyu'j ewmée yūuni's. Iidx we'weni's nwēese'jewáana açá' iidx yakhthê'j yakh kxtee yuwe ewuune'ga. ¹⁶Nawa nwēese'jmeewáana açá' testigo teeçx meeçxa' e'z txahçxa txāawe'sx dxi'pte we'wene'ga, kxah txāa e'z testigosa' jiyutxna iidx yuwe ewuuya' pa'pçxuni's. ¹⁷Txāa e'z testigo dxi'pte nwēese'jmeete!, dxuus yatte jxkaahsawe'sxtxi mpeeta'sx. Açá' txāawe'sxtxiwa nwēese'jmeeçxa', yakhthê'j na'wēmée Dxusna jiimeesa na'wēçxáa nvxiitni yuuna.

¹⁸Isath we'we': I'kwe'sxa' yuwetxi's naa kiwete pheu'the', cielutewa Dxus dxi'pte pheu'jni yuutxna. Nawa i'kwe'sxa' yuwetxi's pheu'jmeete!, cielutewa Dxus dxi'pte pheu'jnimée yuutxna.

¹⁹Na'jī'th na': I'kwe'sx kīh yūune'jçxawa e'zsaçxáawa txā'wē yuute ewna jīna puutx we'weçxa, Dxusa's pi'kine'kwe ma'wē yuuwa'ja'swa açá' adx Tata cielute ūssa' kxtey yuuna. ²⁰Txāa pa'gatey e'z ma'tx yuu meeçxa' tekx ma'tx yuu nawa adxa's yajkxna pkhaakheçxa ūste!, adxa' txāawe'sx ksxavxyte ūswa'jsath jīk.

²¹Txajū' Pedro' Jesus tasxte utxaaçxa', na'jīnak pējx:

—Yakhthê'j adxa's ewmée yūusa's çmaz us peltunäywa'j yuukx, meeçxa' sietepkaççxáa ewmanx? jīte!, ²²Jesusa' na'wēk pta'sx:

—Sietepkaççxáa ewna jīya'wameeth. Sietesaççxáa setenta ähpkaçç peltunäywa'ja' jīk.

Selpisáa peltunäyya' wa'lsa yakh kaaja'da'jni

²³Txāa pa'gatey Dxus jxkaahwa'j en ähte', na'wē yuuna: Teeçx jxkaahsa' txā'sna selpisaawe'sx yuultxi pēyiçku yu'. ²⁴Yuulsatx teeçxsa na'wēçxah pējxna u'jweçpkaçxha', teeçx jxūna kühtx iiméh seena' wala yuulsana. ²⁵Txāa selpisa' kīh yakh yuhwa dewewa'j jī'phmeek yu'. Açá' patrona' txāa yuulsa's txweykaakh txajx nyu, txajx luuçx, txajx jī'phuni yā'jçxa jxuka txāa yuula's dewewa'j. ²⁶Txajū' selpisa' patron tasxte peejxūkweçxa pxthaa we'wek: Adxa's meen peeygāh. Txāa yuula's jxuka dukhe'nja jīte!, ²⁷patrona' peeygāhna yuula's peltunäyçxa ewte nvxihtku. ²⁸Nawa txāa peltunāynisa' kasehna u'jçxa', vxite selpisáa txā'sna walameekuē yuulsa'sku uy, sa' txhikhte uweçxa ikheçku yu': Adxna yuulgu txā'sna mdukh jīna. ²⁹Txajū' txāa yuulsa' peejxūkweçxa na'jīnak pxthaa we'we: Adxa's meen peeygāh, jxuka dukhe'nja jītewa, ³⁰kxtey yuumée wejxwa karcelna jxūna u'jçxa kxtee txajk txāa yuula's dukhpkaçç. ³¹Txā'wē yuuçte vxite selpisaawe'sx uyçxa', wala nxustxi. Sa' u'jçxa pta'sxtxi txā'wē ewmée yūusáa patrona's. ³²Açá' patrona' ewmée yūusa's pa'yaçxa na'wēk we'we: Selpisáa peethähwe, adxa'

iidx yuula's jxuka peltunāythu, pxthaag we'we txāa pa'ga. ³³ Aça' idxwa txā'wēy idxna yuulusa's peeygāhna peltunāywa'j ji'phgu, adxwa ma'wētkā peeygāh idxa's txā'wēy jįçxa', ³⁴ txāa patrona' wala ūusaçxaçxa, kastigāykaakh yuula's jxuka dukhpkaçx.

³⁵ Txā'jįçxa', Jesusa' na'wēk pta'sx:

—Teeçxsa na'wēçxah ūusuh jxuka peltunaīmeewá'kwe i'kwe'sx yakthē'jwe'sxtxi, aça' adx Tata cielute ūssawa txā'wēy kastigaīna i'kwe'sxtxi' jįk.

Ptamsa txuteewa'jme's Jesus kaapiya'jni

(Mr 10.1-12; Lk 16.18)

19 ¹ Txā'wē we'wena jxā'jçxa', Jesusa' Galileaju kasehna u'jçxa Judea kiwesu Jordan yu'kutetek pa'j. ² Kxte ūste', nasa wala pa'jtx, aça' nuykatxhik aça'satx.

³ Naapkaçxha' fxariseowe'sx maaíi yu' Jesus tasxte utxaana kũhçxa na'wētx pějx, pasya' sxiigte' ewmée vxit-ya' sũhçxa:

—Ptamsaçxawa, nyu kijkuēçxāa āhmée yūuteçxāa txāapa'ga wāatahte ĵewmanx? jįte', ⁴ Jesusa' na'wēk pas:

—I'kwe'sxa' ĵDxus librute iilēymeewá'kwe? Kxtee we'weçxa': Dxusa' nyafxiitey e'zįttx ja'daçxajk vxit piçthē'j petx u'y yāl'jçxa. ⁵ Txāa pa'ga piçthē'ja' peekx neywe'sx tasxu txuteeçxa peekx nyu yuuwa'jsa yakh utxaawa'jsa', txā'wē e'zçxawa teeçxsaxçxāa na'wē yuuna pa'jya' jį'k Dxus librute'. ⁶ Txā'wē yūunijū', e'zmée teeçxçxāak yuuna pa'ja'. Txāa pa'ga Dxus pũpxçxa nvxiitnijū' ptamsayā'ja' txuteewa'jsameeta'.

⁷ Txā'jįte', na'wētx pějx:

—Txā'wēte', Moisesa' ĵkįjxa'ga peekx nyu yakh txuteeçxa eç vxitçxa nyu's ūsçxa txuteewa'ja' jįna jxkaaja'? jįte', ⁸ Jesusa' na'wēk pas:

—I'kwe'sx txā'wē Dxus jxkaahni's nwēese'jmeeçxa nyu yakh txuteena fxi'zepa'ga íçxāak Moisesa' txā'wē yūuwa'ja's nvxiht. Nawa txā'wē yūuwa'ja's nyafxiitey Dxus nvxiitnisa yu'çme'. ⁹ Adxa' na'jį'th na': Nyu txā'wē vxite piçthē'j yakh pkal yuuna fxi'zesameete wāa nyu's wāatahçxa vxite u'y yakh ptamuuna na' txā'wē vxite yakh ptamuupa'ga pkal kazx yuusāa yuuna. Meeçxawa nmi' wāataanisa u'y yakh maawa ptamuuna na' txā'wē u'y wāataanisa yakh ptamuupa'ga pkal kazx yuusaaiçxāa yuuna jįte', ¹⁰ Jesus yakh u'jusawe'sxa' na'wētx we'we:

—Txā'wēte', ptamumée fxi'zeni wejx ewna jįtx. ¹¹ Aça' Jesusa' na'wēk pas:

—Txā'wē yuja', nawa jxukay yu' ptamumée fxi'zeya' āja'çmeeta', naasāa kimnane' Dxusa' ptamumée fxi'zewa'ja's nvxiht txāaçxāa ptamumée fxi'zeya' ājana, vxite' ptamumée Dxusçxāana selpiina fxi'zewa'jsata'. ¹² Na'wēsa yu' ptamumée fxi'zeya' āja'tx: Maaíi yu' ptamumée fxi'zeya' upxsatxna, aça' vxitetxi's naa kiwete piçthē'jwe'sx íçxāatx ptamumée

fxi'zewa'ja's vxitu', aça' vxite' ptam yuumée Dxusçxáana selpiina fxi'zewa'jsata'. Ptamumée fxi'zeyá' ájasa', ptamumée fxi'zetxna jík.

Luuçxkuêtx Jesus bedekiyini
(Mr 10.13-16; Lk 18.15-17)

¹³Txajü' Jesus tasxte luuçxkuê nuypa'jtx, luuçx dxikthesu peekizeçxa Dxus kusete neewe'wekahn. Nawa Jesus yakh u'ljusawe'sxa' úusçxa we'wetx nuypa'jsatx. ¹⁴Aça' Jesusa' na'wêk we'we:

—Luuçxkuê adx tasxte yuusaatxi' kuçx yupnuwe, txáa pa'gátey cielute Dxus jxkaahna úsnisa' naa luuçxkuêwe'sx na'wésa jii ííçxá'.

¹⁵Txá'jìçxa', luuçxkuêwe'sx dxikthesu peekizeçxa Dxus kusete neewe'weçxa', txajü u'kh.

Piçtakx wala ji'phsa Jesus yakh puutx we'weni
(Mr 10.17-31; Lk 18.18-30)

¹⁶Txáa e'su' teeçx piçtakx Jesus tasxte pa'jçxa na'wêk pêjx:

—Kaapiya'jsa wala ewsa, mpeeta'sx. ¿Kìh ew yúuçxa pçumée ítxi fxi'zewa'ja's ji'phuki'th? jíte', ¹⁷Jesus pasçxa':

—¿Kìh yuupa'gaga adxa's ewsa jí'? Ew yúusa' teeçx yuuçxáa úsa' txá' Dxusa'. Aça' pçumée ítxi fxi'zewa'ja's ji'phu wéeçxa', Dxus jxkaahnitxi' kxtey myuu jíte', ¹⁸piçtakxa':

—¿Maatxna? jina pêjxte', Jesusa' pta'sxku:

—Dxusa' na'wêk jxkaaja': Nasa ikhwa'jme', ptamsayá'ja' vxite yakh pkal yuuwa'jme'. Pesweewa'jme'. Vxitetx ísxiina nuywe'wewa'jme'.

¹⁹Neywe'sxtxi peeygáhna ewçxáa yúuna fxi'zewa'ja'. Peekíi ma'wéga ya'peeygája' txá'wéy mpeeygáh vxite nasatxwa jíte', ²⁰piçtakx pasçxa':

—Txáatxi' le'çxkuéjüjx kxtey yuunath waláa, aça' ¿kìh wejx peeçxna? jíte', ²¹Jesus pasçxa':

—Dxus jxkaahnitxi' jxuka kxtey nwéese'jsa yuu wéeçxa', u'jçxa iidx ji'phunitxi' jxuka txweyçxa ji'phmeekuésatx mes. Sa' txá'wé yúuçxa' cielute ji'phsa yuune'ga. Txá'wé yúuçxa adx yakh myuh jíte', ²²txáa piçtakxa' txá'wé wése'jçxa' nxusnak u'j, wala ji'phsa yu'k txáa pa'ga.

²³Txajü' Jesusa' na'wêk we'we txáa yakh u'ljusawe'sxtxi:

—Isath we'we', ji'phsa yakha' wala yuh théya' Dxus jxkaahna úsnite u'kawalj. ²⁴Nal'jì'th na': kamelxo txakwesa' ¿ma'wé yüz kafxga khéwya' ájakkx? Aça' ji'phsa yakha' txáate jxthaakwe théya' Dxus jxkaahna úsnite u'kawalj.

²⁵Txá'jini's wése'jçxa', Jesus yakh u'ljusawe'sxa' wala kuh yajkxtxi, sa' txáawe'sx pwe'sx na'wêtx puutx ya'paapēyi':

—Txá'wéte', ¿kimçxá' ewte neeyüuya' ájama'k? jíte', ²⁶Jesus thegçxa' na'wêk we'we:

—Nasa' Dxus yakhmée yu', ewte neeyüuya' ájameeyuhtxna. Nawa Dxus yakh yu', kìh yuhwa théysa meea'.

27Txãljíte!, Pedro! na'wêk pêjx:

—Kwe'sxa' idx yakh yujxa' kwe'sx ji'phuni's jxuka nvxihttha'w, sa' çkîh jxpa'gakxtha'w? jíte!, 28Jesusa' na'ljînak pta'sx:

—Isath we'we!, naa kiwete pkalsa's jxuka yu'pthehçxa ewsaçxaçxáa yuuwa'j en áhte!, Dxus Nçxi'k Nasa Yuusá' pa'lçxa jxkaajxa' takheçpkaçxha!, adx yakh yuusáa i'kwe'sx docesawa adx yakh jxkaahsa yuune'kwe Israel ji'j docesatx. 29Maawa jxukaysa txã'wê adx yakh yujxa'çxáa txãawe'sx yat, kiwe, nyakhwe'sx, npe'sxwe'sx, neywe'sx, nyu, nçxi'kwe'sx, niisawe'sx txãatx jxuka nvxiit-sa' txãa nvxiitnisate jxthaakwe wala jxpa'gatxna, sa' pçumée itxi fxi'zewa'ja'swa jxpa'gatxna. 30Nawa jxpa'yakxmeete!, makwe yaçtewe'sxçxawa, nmehtewe'sx yuutxna; naapkaçxha' nmehtewe'sx yu!, yaçtewe'sx yuutxna jîk.

Mjiisa yakh kaaja'da'lçxa Jesus kaapiya'jni

20 1Dxus jxkaahni ente mjiisa' na'wê yûuni yuutxna: Teeçx mjii namu' kusí kasehçxa mjiisa pakweya' u'kh, uuthasxte uwa udewa'jsa. 2Sa' mjiiwa'jsa yakh puutx we'wek teen mjîini's áh dukhya!. Txã'wê yûuçxa mjii ehn kaakh. 3Sa' kusí las nwewe yuuçpkaçxha!, ki' kasejk, sa' vxite kîh mjiiwa ji'phméé plaasasu u'ljusatx uyçxa!, 4txãatxi' na'wêk we'we: Me'jwe mjiiya' adx mjii ehte, teen uta mjîinite áh dukhe'nja jíte!, txãawe'sxa' u'ljtx mjiiya!. 5Txajü' mjii namu' éepxâh wala ki' kasejk, sa' kusuçte las trestewa ki' kasejk, txãatxwa txã'wêy mjiiya' kaakh. 6Txajü' kusuçte las cinkote plaasasu ki' kasehçxa!, vxite uyku kîh mjiiwa ji'phméé u'ljusatx. Txãawe'sxtxiwa na'wêk we'we: I'kwe'sxa' çkîh yûuçxa mjii ji'phméé u'ljukwe teen uta? jíte!, 7txãawe'sxa' na'wêtx pas: Kimwa mjiiya' pa'yameeta' jíte!, mjii namu' kaakh txajx mjii ehte: U'lçxa adx mjii ehte mjîine'kwe aça' adxa' wala ew dukhe'nja jîk. 8Txajü' jxuka kuste!, mjii namu' pa'yak kxtee kmãaji'jsa's na'ljîna: Mjîisatxi' pa'yaçxa mdukh, nawa nmeh mjiiya' pa'jsatx khuê'y nyafxte dukhçxa teen uta mjîisatxi' nmehte dukhna jxã'ljane'ga jíte!, 9kxtey yuuk. Aça' kusuçte las cinkote mjiiya' pa'jsa khuê'y utxaaçxa teeçxsa na'wêçxah jxpa'gatx teen uta mjîinite áhçxaçxáa. 10Txajü' kusí mjiiya' pa'jsa!: Kwe'sxa' jxthaakwe jxpa'ga'nja'w sühna üsçxawa, txakweíçxáa jxpa'gaçxa! 11üusçxa we'wetx mjii namu's na'ljîna: 12Naawe'sxa' nmeh pa'lçxa naasáa teeçx ora yuuçxáatx mjii. Nawa dukhni yu'sa' kwe'sx nakweíçxáatx jxpa'ga. Naapkaçxha' kwe'sx yu' teen utatha'w mjii, sekte yaaçxana wantâyna jíte!, 13mjii namu' na'ljînak pas: Namiku, idx yakh ewméé yûuçmeeth. Adxa' teen uta mjîini's áh dukhe'nja jîna idx yakh puutx we'wete!, ewna çjimeegá!? 14Txãasa iidx mjîini's áh dukhni's jxpa'gaçxa me'j. Idxna nakweth dukh txakweçxaçxáa dukheçthu nmeh mjiiya' pa'jsatxwa. 15Nawa adx ji'sa' ma'wê yûuweçxtewa kxtey yu'nja. Meeçxa' adx ew yûuni's idxa' çaçe'wá'ga? jîk mjii namu!. 16Txã'wê yûuwa'jsata' nmehtewe'sxa' yaçtewe'sx yuutxna, naapkaçxha' yaçtewe'sxa' nmehtewe'sx yuutxna. Txãa pa'gatey pa'yanisa yu' wala kuhta!, nawa txhitxhnisa yu' kuhmeeta' jîk.

Jesusa' txajx uuwa'ja's ki' pta'sxni
(Mr 10.32-34; Lk 18.31-34)

¹⁷Jesusa' Jerusalen dxi'the u'jweçça', txãa yakh u'jusawe'sx docesatx fxiite pe'jna u'jçxa na'jïnak pta'sx:

¹⁸—I'kwe'sxa' jii i'kwe Jerusalenna u'jweçtha'w. Kxteea' Dxus Nçxi'k Nasa Yuusa's uweçxa dukhni yuuna sacerdote npiçthê'j vxite' ley kaapiya'jsawe'sx kusete. Aça' txãawe'sxa' ikhwa'j vxitçxa ¹⁹judiu ji'jmée vxite nasatx dukhetxna, txãawe'sxa' weeçxna pâpana kluuskhê ki'pçxa ikhkahn. Nawa tekh ente' ki' itxi yuuna jïk.

Jakobowe'sx nji'j Jesusa's pêyni
(Mr 10.35-45)

²⁰Txajü' Jakobo Juan nji'j Zebedeo nyua' txãa e'z nçxi'ksa yakh Jesus tasxte peejxülkwenä utxaatx, txãawe'sx pêyni's Jesusa' kxtey yuukahn. ²¹Aça' Jesusa':

—¿Kij'kwe yüu jxthäasu'? jïte', Jakobowe'sx nji'ja' na'wêk we'we:

—Idxa' naa kiwete jxkaajxa' kîhçxa', ü'kwe luuçx naa e'zsatx iidx pukakhê pdxi'p kaçxwa'ja's üsune'ga jïte', Jesus we'weçxa':

²²—I'kwe'sxa' jiimeeçxai'kwe txã'wê pêyi'. Adx na'wêy pxthaa yuuçxa uuwa'ja's üukhmée jxpa'gaya' ¿ajama'kwe i'kwe'sxa'? jïte':

—Åja'nja'w jïnatx pas.

²³Aça' Jesusa' pta'sxku:

—Isa, i'kwe'sxa' adx na'wêy pxthaa yuuçxa uuwa'ja's ji'phuyujune'kwe. Nawa txã'wê adx pukakhê pdxi'p kaçxwa'j yu'sa' adx üsu'çmeeth. Txã'sa' naasáa adx Tata yuuçxáa üsuna kiim jïi pheu'jçxa ji'phna txã'sna jïk.

²⁴Aça' diezsawe'sxa' üusaçxatx Jakobowe'sx txã'wê pêyni's wêse'jçxa. ²⁵Nawa Jesusa' pa'yaçxa na'wêk we'we:

—I'kwe'sxa' peekx jii i'kwe, naa kiwete jxkaahsa' txãawe'sx nasatx juuna'tx jxkaaja', aça' txã'wêy npiçthê'jsawa txãawe'sx jxpe'jnisatx juuna'tx jxkaaja'.

²⁶Nawa i'kwe'sx yu' txã'wê juuna' jxkaahwa'jsamée i'kwe, wejx yuuwa i'kwe'sxa' walasa yuu wêeçxa', vxitesa kusete selpisáa yuuwa'j ji'phi'kwe. ²⁷Aça' i'kwe'sx maawa txã'wê vxitesatx jxkaahsa yuu wêeçxa', vxitee jxkaahni fxi'zewa'ja'.

²⁸Txãa pa'gatey Dxus Nçxi'k Nasa Yuusáa yuhwa txã'sna selpii jxthäasya' kîhme', wejxwa nasatx nwe'wena selpiia' kîhçxak ya'dukh nxuste uuya' jïk.

E'z piçthê'j uyya' äjasameetx Jesus nuykatxhini
(Mr 10.46-52; Lk 18.35-43)

²⁹Txajü' Jeriko çxhabuh kasehna u'jweçte', nasa' iimeh wala yuwe'tx Jesus e'ste. ³⁰Txãa dxi'the e'ztxi kaçxçxa u'p yu' uyya' äjasamée. Sa' Jesus skhêwni's wêse'jçxa' sustxi we'we:

—Davxid jil'j, kwe'sxtxi meen peeygâh jïte', ³¹nasa' üusçxa we'wetx sxuuna' yuukahn. Nawa txãawe'sxa' jwee'üçxáatx sus we'we:

—Davxid ji'lj, kwe'sxtxi meen peeygãh jîna.
³²Aça' Jesusa' yujuçxa txãa uyya' âjasameetxi' pa'yaçxa na'wêk pêjx:
 —¿Kîjkwẽ yûu jxthãasu'? jîte', ³³txãawe'sx pasçxa':
 —Kwe'sx yafxtxitha'w phaade jxthãasu' jîte', ³⁴Jesusa' peeygãhçxa
 txãawe'sx yafxsu jxa'dxiçpkaçxa', txãa dudtey uyya' âjaçxa Jesus yakh u'ljtx.

Jesus Jerusalente u'kani

(Mr 11.1-11; Lk 19.28-40; Jn 12.12-19)

21 ¹Jerusalente utxaana pa'jaççxa', Betfxagé çxhabkuête khuê'y
 pa'ljtx. Txãa çxhabkuê' Oliwos vxiç utxagak üsu'. Txajü' Jesusa'
 txãa yakh u'ljusawe'sx e'zsatx na'jînak kaah:

²—Ay dxi'pga çxhabkuê üsa' kxtee me'jwe, sa' kxteea' uyuune'kwe
 buçxu luuçx nji'jsa tudni üsna txã'sa' jxükhwedeçxa jxüne'kwe. ³Jxüna
 yuhte uyçxa' pêyiwáatxna aç'a' kwe'sxtxi jxpe'jsa' peejxa', nawa
 txaçxmeyna kaaswedu'ljuna jîne'kwe.

⁴Dxus yuwe pta'sxsa we'weni' kxtey yuuk. Txã' na'jînak fxi'lj:

⁵Sion çxhabte nasatx na'jîna pta'sxine'kwe:

Mthegwe, i'kwe'sxtxi jxkaahsa yuja',

Pxthaakwesa na'wê thegna, buçxu luuçxte a'ljçxa,

Aça' txãa buçxu nji'ja' ktü'se'jnisa' jîna fxi'jni'.

⁶Txajü' txãawe'sxa' u'ljçxa Jesus ma'wê jxkaathe', kxtey yuutx. ⁷Sa' buçxu
 nji'ja's jxüna pa'ljtx luuçx yã'ljçxa. Txajü' buçxu luuçx kastxaja'jnimeesa's
 txãawe'sx atxhtxi puxtxi, aç'a' Jesusa' txãate a'kh. ⁸Nasa wala kuh pi'kxna
 u'ljusawe'sx yu', txãawe'sx atxhtxi dxi'jsutx pusna u'ljwe' Jesus skhêwwa'ljsu.
 Maaí yu' êjxa spê'thçxa txã'wêytxi dxi'jsu pusna u'ljwe'. ⁹Aça' nasa' yaçte
 u'ljsa vxite' e'ste yuusa txãawe'sx jxukaysa na'jînatx sus we'wena u'ljwe':

—Dxus kaahnisa wala yuh jxtuhthesa yuja' jxkaahsa Davxid ji'lj.

Dxusa's weçxaaga wala ew yûupa'ga jî'tx.

¹⁰Txajü' Jesusa' Jerusalente u'kate', kxtee nasa jxukaysa seena' wala
 sustxi na'jîna paapêjxna:

—Na' ¿kimna? jîte', ¹¹pta'sxtxi na'jîna:

—Naaí Dxus yuwe pta'sxsa Jesusa', Galilea kiwesu Nasaret

çxhabtewe'sx jî'tx.

Dxus yatte txweysaatx Jesus kasxisxni

(Mr 11.15-19; Lk 19.45-48; Jn 2.13-22)

¹²Txã'wê yûuni e'su' Jesusa' dxuus yatte u'kaçxa jxuka eka kasxisxku
 kxtee txweyna ki' weyna üssatx. Sa' vxuyu yu'pthehna üsni mesa vxite'
 tub çxihme txweyna u'pnitxwa jxuka püsxku. ¹³Sa' na'wêk we'we:

—Dxus librute' na'wêk we'we': Adx yata' Dxus yakh puutx we'wena
 üswal'jçxá' jî'k. Nawa i'kwe'sxa' peswée pkhaakhena üsni kafx na'wêçxáa
 vxitçxa ji'phi'kwe jîk.

¹⁴Kxtee dxuus yatte maafí yu' Jesus tasxte utxaatx, uyya' ájasamée, çxida legsa, aça' txāwe'sxtxi' nuykatxhik. ¹⁵Nawa sacerdote npiičthē'jwe'sx vxite' ley kaapiya'jsawe'sx txāwe'sxa' ūsaçxatx, txā'wē kim yuhwa ájanimeesa's kaavxya'ja'the' kxtee dxuus yatte ūssa luuçxa' sus we'weçxa' jxkaahsa Davxid ji'ja's wala weçxa'tha'w jīna susni's wēse'jçxa. ¹⁶Sa' Jesusa's pējxtxi:

—Na'wē we'wena ūsta' txā'sa' çwēse'je'ga'? jīte', Jesusa' pasku:

—Wēse'je'fith. Nawa i'kwe'sxa' çilēymeeekwe'? txā'wē yūuwa'ja's Dxus libruete na'jīnak we'we':

Luuçx le'çxkuē vxite' çxu'çxsawa txā'wē zhiçxkwe tuuthe'jwa'ja'sgu vxit jī'k.

¹⁷Txajū' Jesusa' kxtee nvxihtçxa u'kh çxhabu kasehna sa' Betania çxhabtek pe'te.

Higwera fxtūu taxx yūnsame's Jesus açewe'weni

(Mr 11.12-14, 20-26)

¹⁸Kuskuskhē' Jesusa' çxhabna ki' sxawedna u'jweççxa', wēek. ¹⁹Sa' dxi'j pukate higwera fxtūu taxx ūste uyçxa', thegya' utxaak. Nawa kīh yūn yuhwa uywe', eççxáak ji'ph yu'. Aça' txāa fxtūu tasxa's na'wēk we'we:

—Áçxha' peena yu' yūnmeene'ga jīçpkaçxha', naa dudtey fxtūu tasxa' uhdxku. ²⁰Txāa yakh u'jusawe'sxa' txā'wē uyçxa', wala kuh yajkxna na'wētx pējx Jesusa's:

—Fxtūu tasxa' çkīh yūuçxaga txakwe wala dud uhdx? jīte', ²¹Jesusa' na'wēk pas:

—Isath we'we': Kuh jwed yajkxmée Dxusa' pasyujuna sūhwa'jçxá's yajkxçxa', adx vxitthu txā'wēçxáamée, na'wē yūuya'wa ájane'kwe: Naa vxiç wala ayjxu u'jçxa ikh walate tee khēe jīne'kwe, aça' kxtey yuuna. ²²I'kwe'sxa' kīh pējxçxawa Dxus yakh puutx we'wene'kwe Dxusa' pasuna sūhna, sa' txā'wē yūuçxa' jxpa'gane'kwe jīk.

Dxuus yatte Jesus juuna' yūuni's pēyni

(Mr 11.27-33; Lk 20.1-8)

²³Txajū' Jesusa' dxuus yatte u'kaçxa kaapiya'jaçpkaçxha', sacerdote npiičthē'jwe'sx vxite' judiu nthē'jsawe'sx kūhçxa' na'wētx pējx:

—çKīh yūupa'gaga txā'wē dxuus yatte jxuka suw? çKimga jxkaah txā'wē yūuwa'ja's? jīte', ²⁴na'wēk pas:

—Adxwa i'kwe'sxtxi pējx ya'wath, aça' adx pēyni's pasya' ájate', adxwa pta'sxi'nja kim jxkaathe txā'wē yūuçxawa. ²⁵Juana's çkimga jxkaah yu'te bautisāykahn? çDxus wá' jxkaah, meeçxa' naa kiwete piçthē'jwe'sx wáa ne'ta jxkaah? jīte', txāawe'sx pwe'sx puutx ya'paapēyi'tx:

—Dxusne' jxkaah jīna paste', txā'wēte' çmjīitekwe nwēese'jmée? jīna. ²⁶Aça' naa kiwega nasa jxkaahnine' yu' jīya'wa ájame'nja'w. Txā'wēme',

nasa jxukaysa Juan ju'guçxaçxáatx we'we', Dxus jxkaahnine' yu' jîna txáatxtha'w úukhu' jînatx puutx we'we. ²⁷Sa' ãjameeçxa', Jesusa's na'wêçxáatx pas:

—Jiimeetha'w jîna. Aça' Jesuswa txã'wêyçxáak pas:

—Adxwa pta'sxme'nja kim jxkaathe txã'wê yúuçxawa jík.

E'z nçxi'ksatx kaaja'da'jçxa kaapiya'jni

²⁸Txajü' Jesusa' na'wêk we'we:

—I'kwe'sxa' úus miyajkxwe, na'wê kaaja'da'jçxa pêjxya'wath: Teeçx piçthê'ja' e'z nçxi'kku ji'phu', sa' teeçxsa's na'wêk jxkaah: ãçxha' adx mjji ehte uwa uhdeya' me'j jîte', ²⁹nçxi'k pasçxa': U'j wêemeeth jîçxawa, úus yajkxna u'pçxa', mjjiya' u'kh. ³⁰Txajü' neya' vxite nçxi'ka'swa txã'wêy jxkaakh. Aça' txã' na'wêk pas: Ewna, u'jwe'nja jîçxawa u'jme'. ³¹ãçxha' i'kwe'sxtxi ¿ma'wêga thegu'? ¿Maasaga ney jxthãasni's kxtey yuu? jîte', txãawe'sx pasçxa': Nyafxte jxkaahnisa nçxi'k jîtx. Aça' Jesusa' na'wêk we'we:

—Isath we'we', gobierno jîi vxuyu pkhakhsawe'sx vxite' u'ywe'sx pkal yuuna fxi'zesa txãawe'sx khuê'y Dxus jxkaahnite u'katxna, naapkaçxha' i'kwe'sxa' u'kaya' ãjamée úsi'kwe. ³²Txãa pa'gately Juan Bautista' kaapiya'jna pa'kh pçumée itxi fxi'zewa'ja's. Txã'wêtewa, i'kwe'sxa' jxpa'gamee'kwe. Naapkaçxha' gobierno jîi vxuyu pkhakhsawe'sx vxite' u'ywe'sx pkal yuuna fxi'zesa txã'wêsa yu' jxpa'gatx. Nawa i'kwe'sxa' yafxju uyçxawa pkaltxi nvxihtçxa Dxus tasxte sxawedmee'kwe.

Mjîisawe'sx patron nçxi'ka's ikhni yakh kaaja'da'jni

(Mr 12.1-12; Lk 20.9-19)

³³Vxite ejemplo na'sna mwêese'jwe: Teeçx kiwe namu' uuthasx vxitku, sa' peeku'j uphçxa teeçx ahte uwa's ku'swa'j txajk, sa' êete tejkaçxa jxuka thegwa'j yatwa txajk. Txã'wê yúuçxa txãa kiwe's mjîisatx pki'jçxa jxu'j dxi'kh u'j. ³⁴Uwa thê'jwa'j en ãhte', txã'sna selpisaatx kaakh kiwee pki'jnipa'ga pêjxya'. ³⁵Nawa kiwee pki'jsawe'sxa' txãa selpisaatx uweçxa maafí yuutxi' pâpana vxitetx ikhna vxitetxi' kwet wâatatahnatx yúu. ³⁶Txã'wê yúute', kiwe namu' jwee'fçxáak kuh kaahna úsu' selpisaatx. Nawa kiwee pki'jsawe'sxa' jxukaytxi txã'wêçxaçxáatx yúu.

³⁷Txajü' nmehte' txajx nçxi'k yuunak kaah: Adx nçxi'ka's kuçx txã'wê yúumeewáatxna sühçxa. ³⁸Nawa kiwee pki'jsawe'sxa' nçxi'ka's uyçxa', txãawe'sx pwe'sx na'wêtx puutx we'we': Ney uute' naa txã'wê kiwe's iiyamuwa'jsa', aça' txã'sa' ikhega kiwe' kwe'sx jîi yuukahn jî'tx. ³⁹Txã'jîyã'jçxa', uweçxa txãa kiwejü kutxi'jçxa ikhtxi.

⁴⁰Txã'wê pta'sxçxa', Jesusa' na'jînak pêjx:

—Txã'wê yúute', kiwe namu' pa'jçxa', ¿kîh yúukx kiwee pki'jsawe'sxtxi'? jîte', ⁴¹na'wêtx pas:

—Txãa ewmeesatxi' peeygãhmée ikhçxa txãa kiwe's vxitetx pki'jina kiwee pa'ga namu's wa'lmée dukhwa'jsatx jïtx.

⁴² Aça' Jesusa' na'wêk we'we:

—I'kwe'sxa' çbagaçxte yuhwa iilëeymeewá'kwe Dxus librute na'jïna fxi'jni's?

Yat txaahsawe'sxa': Naa kweta's selpime' jïçxa wãatahtx.

Nawa txãa ñik yat makwesananawa çxhãçxha neewewa'jsa yuuna pa'j.

Txã'wê neewewa'jsa yuuna pa'jwa'ja's Dxusku vxitçxa nvxiht.

Txãa pa'ga kwe'sx yakha' wala weçxa yuja' çjï'çmeena'?

⁴³ Txã'wê açepa'ga ñiçxáath na'jï': Dxus jxkaahni's i'kwe'sxtxi kusa'jçxa vxite nasatx üsni yuuna, kiwe namu's pki'pha'ga wa'lmée dukhkah.

⁴⁴ Sa' maawa txãa kwet kajkwega wetesa' jxuka çxkateteena, meeçxawa txãa kwet nasa kajkwekhê weteçxa' jxuka ku'çxina jïk.

⁴⁵ Aça' sacerdote npiïçthê'jwe'sx vxite' fxariseowe'sxa' jiyutx txãawe'sxtxi ñiçxáa we'weçxa txã'jini's. ⁴⁶ Sa' tud wëeçxawa üukhtxi, txã'wê nasa' Jesus ju'guçxaçxáatx üs yu', Dxus yuwe pta'sxsa' jïna txãa pa'ga.

Boda fxiesta yakh kaaja'da'jçxa kaapiya'jni

22 ¹ Jesusa' vxite ejemplo kaaja'da'jçxak pta'sx na'jïna:

² —Dxus jxkaahni ente' na'wê yüuna: Teeçx jxkaahsa' txajx nçxi'ka's kaaba'jçxa fxiesta vxitku. ³ Sa' txãa jxkaahsa' selpisaatx jxkaakh pi'kxnisatx pa'yakahn. Nawa txãawe'sxa' wa'lçxa yuwe'çmeeta'.

⁴ Txã'wêwewa, ki' jxkaakh vxite selpisaatx na'jïna: Pi'kxnisatxi' yuukajane'kwe. Ü'wa'ja's jxuka pheu'jniyã'j ji'pthu, tajkx kaaniisxi'jnisatx kiikhe'th, aça' myuhwe boda fxiestate jï'k jïne'kwe. ⁵ Txã'wê kxtey yuutewa, pi'kxnisawe'sxa' nwëese'jmée wejxwa txãawe'sx uuthasxsu vxite' txãawe'sx vxyu knaynisuçxáatx u'j.

⁶ Aça' vxite yu' selpisaatx uweçxa wala pâpatx ikhpkaçx. ⁷ Txã'wê yüute', jxkaahsa' seena' wala üusaçxak, sa' txajx soldauwe'sxtxi kaakh txãa nasa ikhsatx ka'tuwa ikhçxa txãawe'sx çxhaba's jxuka kabkahn. ⁸ Txajü' jxkaahsa' na'wêk we'we txã'sna selpisaatx: Boda fxiestate ü'wa'j jxuka pheu'jniyã'j üsa', nawa pi'kxnisawe'sxa' wa'lçxa pa'jmeeta'.

⁹ Aça' açxha' mel'jwe klxiikhunsuwe'sxtxi pi'kxya' maatxwa jxuka boda fxiestate yuukahn. ¹⁰ Txã'jite', selpisaawe'sxa' klxiikhunsu ul'çxa maatxwa jxuka pkhakhtxi ewsa ma'k yuu meeçxa' ewmeesa ma'k yuu nawa jxuka. Aça' fxiesta yatte jxuka nasa utatx.

¹¹ Txajü' jxkaahsa' pi'kxnisatx thegya' u'kaçxa', uyku teeçx piçthê'j txã'wê boda fxiestate athni ropa yakhmée u'pte. ¹² Sa' na'wêk we'we: Namiku, idxa' çkïjxa'ga ayte u'ka', boda fxiestate athni ropa ji'phmeeçxa'?

Txã'jite', txãa piçthê'ja' pasmée sxuuna'k neeyüu. ¹³ Aça' jxkaahsa' mesate puuçuçsatx na'jïnak jxkaah: Naa piçthê'ja's uweçxa mtudwe çxida petx

¹¹ Txajü' jxkaahsa' pi'kxnisatx thegya' u'kaçxa', uyku teeçx piçthê'j txã'wê boda fxiestate athni ropa yakhmée u'pte. ¹² Sa' na'wêk we'we: Namiku, idxa' çkïjxa'ga ayte u'ka', boda fxiestate athni ropa ji'phmeeçxa'?

Txã'jite', txãa piçthê'ja' pasmée sxuuna'k neeyüu. ¹³ Aça' jxkaahsa' mesate puuçuçsatx na'jïnak jxkaah: Naa piçthê'ja's uweçxa mtudwe çxida petx

kuse yā'ljçxa, sa' ekaju kutxi'ljçxa çxhi'dx walate makhwe, kxte' ki'thtxti ksuusu'ljna ũ'nena ũukhkahn. ¹⁴Txāa pa'gately wala yuh pa'yatewa, jxukay yu' utxaawa'jsameeta' jik.

Gobierno's dukhwa'ja'swa pëyni

(Mr 12.13-17; Lk 20.20-26)

¹⁵Txajü' fxariseowe'sxa' u'ljçxa txāawe'sx pwe'sx puutx we'wetx Jesusa's ewmeete nvxiit wēçxa. ¹⁶Txā'wē yūuçxa' txāawe'sx ju'gu ũssa vxite' Herodes nasa txāawe'sxtxi' kaahtx Jesusa's na'ljina pëykahn:

—Kaapiya'jsa, idxa's jiitha'w, kihtewa isasaçxáanag we'we'. Sa' Dxus tasxte pa'ljwa'l dxi'ja'swa ew yuuçxáag kaapiya'ja'. Nasaa jxkaahna yu'kxpehnitx nwēese'je'çmeeg, txāa pa'gately idxa' nasa ewsa na'wē thegsatx jiyumey ju'gu yu'çmeeg. ¹⁷Idxa' ¿ma'ljiki'g? Jxkaahsa Cesara's vxyu dukhte ¿ewmanx? Meeçxa' ¿dukhmeete wáa ewna? jite', ¹⁸Jesusa' na'wēk pas txāawe'sx ewmée yaakxni's jiyuçxa':

—Adx dxi'pteçxáa ew we'weçxa', ũuste yu' ewmée yaakxsawe'sx, ¿kijxa'kwe adxa's ewmeete nvxiit wēçxa txā'wē pëyí'? ¹⁹Dukhwalj vxyu's mneejxühwe jite', teeçx vxyu's jxūna kūhtx. ²⁰Aça' Jesusa' thegçxa' na'wēk pëjx:

—¿Kiim dxi'pa's ki'pnina, sa' kiim yase's fxi'jnina naa vxyute'? jite':

²¹—Cesar dxi'pa's ji'pha', sa' txajx yase's fxi'jni' jinatx pas. Txajü' Jesusa' na'wēk jxkaah:

—Cesar jī's Cesara's dukhwa'ja', sa' Dxus jī's Dxusna dukhwa'ja' jite', ²²paapëysawe'sxa' wala kuh yajkxna neeyūutx, sa' txajü u'jtx.

Uusaawe'sx ki' itxi yuuwa'ja'swa pëyni

(Mr 12.18-27; Lk 20.27-40)

²³Txāa entey saduceowe'sx maaí yu' Jesusa's thegya' pa'ljtx. Nasa' uuyā'ljçxa' peena yu' itxi yuuwa'jsameeta' jina we'wesatx yu' txāa saduceowe'sxa'. Txāasa na'wēttx paapëjx:

²⁴—Kaapiya'jsa, meen peeta'sx. Moises we'weçxa': Maa piçthē'jwa luuçx ji'phumey nyu's nvxihtçxa uute', uusáa nyakha' txāa u'y neeyūsúaa yakh kabawa'jsa', aça' txāate luuçxa' uusáa nçxi'k na'wē neeyūuna jī'k.

²⁵Aça' kwe'sxa' jiitha'w siete piçthē'j pxakhtxi u'pu'. Aça' nyafxtewe'sxa' kabaçxawa luuçx ji'phumey uuk, txajx nyua's nyakh e'stewe'sx jii nvxihtçxa. ²⁶Aça' nyakh e'stewe'sxwa txā'wēyçxáa nyakh tekhtewe'sx jii nvxihtçxak uu, sa' txā'wēçxaçxáatx yūu siete pxakhsay. ²⁷Aça' nmehte' txāa u'ywa uuk. ²⁸Txā'wē uuçxawa ki' itxi yuu ente', ¿maa yakh isa nyu yuuwa'jsaxx? txā'wē kxaz pxakhsatxíi txāa u'yçxaçxáa iimi'sa' na' jite', ²⁹Jesusa' na'wēk pta'sx:

—I'kwe'sxa' Dxus libruete fxi'jni ũsa' txā' isa yuhna sūju'çmeei'kwe, sa' Dxusa' kījxa'wa jxuka ājana sūju'çwameei'kwe. Txāasa jxpubana ũsi'kwe.

³⁰Uusaawe'sxa' ki' itxi yuuçxa' peena yu' kabana fxi'zewa'jsameeta'. Txãawe'sxa' cielute üssa Dxus angeleswe'sx na'wësaçxáa yã'tha'. ³¹Nawa uuçxa ki' itxi yuuwa'ja's i'kwe'sxa' iilëeymeewá'kwe Dxusiwa na'wëk we'we: ³²Abrahan, Isaak, Jakob txãawe'sx Dxusthu adxa' jì'k. Uuçxawa ki' itxi yuusaawe'sx Dxusthu jìçxak txã'jì'.

³³Txã'wë wëse'lçxa', wala kuh yajkxna neeyütx txã'wë zhiçxkwe Jesus kaapiya'pha'ga.

Dxus ley maatewa jxthaakwesa

(Mr 12.28-34)

³⁴Jesus txã'wë saduceowe'sxtxi sxuuna' vxitni's fxariseowe'sx jiyuçxa', pkhaakhetx. ³⁵Sa' Dxus ley kaapiya'jsa teeçxsa' Jesus tasxte utxaak pëjxya' ewméé pastewa jiyu wëeçxa. Sa' na'wëk pëjx:

³⁶—Dxus leya' maatewa jxthaakwesa' çmaana? jìte', ³⁷Jesus pasçxa':

—Dxusa's üsuh jxuka yajkxçxa txãa yuuçxáana selpiina fxi'zewa'ja' багаçxte yuhwa txutemée uu entepkaçx. ³⁸Naa txã'wë jxthaakwesa'.

³⁹E'stewe'sxa' txã'wëydxì'a': Peekí ma'wëga ya'peeygája', txã'wëy mpeeygãh vxite nasatxwa. ⁴⁰Dxus jxkaahni naa e'zsaçxáa Moises leytxi jxuka ähsata', txã'wëy Dxus yuwe pta'sxsawe'sx kaapiya'jnitxwa jxuka jìk.

Dxus tasxu yuusa' çkiim nçxi'kki? jina Jesus pëyni

(Mr 12.35-37; Lk 20.41-44)

⁴¹Fxariseowe'sx pkhaakheçxa kxtee nee üsiyna, ⁴²Jesusa' na'wëk pëjx:

—Kristo' çkimna süju'kwe i'kwe'sxa'? çKiim nçxi'kna süju'kwe? jìte', txãawe'sx pasçxa':

—Davxid nçxi'kna süju'tha'w jìte', ⁴³Jesusa' na'wëk we'we:

—Txã'wëte', çma'wëçxaga Davxida's Dxus Espiritu kaayaki'the' Kristo's we'weçxa' na'jì:

⁴⁴Adxna jxpe'jsa Kristo's Dxusa' na'jìk:

Adx pukate paçu ju'gte mkaaçx,

Idxna açesatx idxçxaçxáana nwëese'jwa'ja's vxitna jxã'phkaçx jìk.

⁴⁵Txã'wë Davxidíwa Kristo's we'weçxa': Adxna jxpe'jsa jínak kxsusu' açá' Kristo' çma'wëçxa Davxid nçxi'k yuukx? jìte', ⁴⁶kim yuhwa teeçx yuweçxáawa pasya' äjameeta', sa' txajüyã'ja' peena yu' pëjxmeeta' kim yuhwa.

Fxariseo vxite' ley kaapiya'jsawe'sxtxi yuuwesa Jesus nvxiitni

(Mr 12.38-40; Lk 11.37-54; 20.45-47)

23 ¹Txajü' Jesusa' na'jínak we'we txãa yakh u'jusawe'sx petx vxite nasa yã'lçxa:

²—Ley kaapiya'jsa vxite' fxariseowe'sx txãawe'sxa' Moises leya's wala ew jiisa txãa leya's nwëese'jwa'ja's jxkaahsatha'w süju'tx.

³Txã'wëyã'the!, i'kwe'sxa! mwëese!jwe ley ewsa ma'wë jxkaathe! txãa yu'sa! jxuka. Nawa txãawe'sx na'wë yu! yûuna fxi'zenuwe. Txãawe'sxa! nasa yuutxi! leya's nwëese!jwa!ja's jxkaahçxawa txãawe'sx yu! leya's nwëese!je'çmeeta!. ⁴Tû'swa!j iiméh wala duhsa pheu!ju'tx txã'sa! kim yuhwa çxhãçxhameena. Txã'wësa'stxi nasatx ktû'se!je!, nawa txãawe'sx yu! le'çxkuë kuseteçxáa yuhwa at pu'çxhi'çmeeta!. ⁵Maawa uykahn sũhçxa iwejçx iwejçx yajkxna áate yu! kíhwa yu'tx Dxusna yaakiçtha'w jina. Txãasatx Dxus jxkaahni's eçte fxi!jçxa kajate akhçxa dxiktheuy vxite! kusesu tudçxa fxi'ze!. Sa! nasa jiyuni fxi'zeya! sũhçxa athni ropawa thaakwe jxu!jsa iijxüçxatx fxi'ze!. ⁶Fxiesta yat-su pi'kxni u!jçxa!, kaçxni wejx ewsaçxáanatx pakwe! iwejçx yajkxna. Sa! judiuwe'sx pkhaakhenisuwa txã'wëytxi yu!. ⁷Klxiikhunsu msuuwa nasatx wala ewçxáa we'wena weçxaa jxthãasnatx pekûju!, kaapiya!jsa jina kxsus jxthãasna.

⁸Nawa i'kwe'sxa! txã'wë kaapiya!jsa jina kxsus jxthãasna fxi'zenuwe. Txãa pa'gatey i'kwe'sxa! kaapiya!jsamée maa yakhwa jxuka pxakhsaçxáai'kwe, naasáa kaapiya!jsa! teeçx yuuçxáa ji'phi'kwe txã' Dxus kaahni Kristo!. ⁹I'kwe'sxa! naa kiwetewe'sxtxi! kim yuhnawa tata jina kxsusnuwe, txãa pa'gatey teeçx Tata yuuçxáa ji'phi'kwe txã' cielute úsa!. ¹⁰Sa! npiiçthê!j jxpe!jsa jina kxsus jxthãasnawa fxi'zenuwe, txãa pa'gatey Npiiçthê!j jxpe!jsa! teeçx yuuçxáa ji'phi'kwe txã' Kristo!. ¹¹Maatxwa selpiina fxi'zeçxa yuuçxáa jxtuhthesa yuune'kwe. ¹²Txã'wëme!, maawa peekfiçxáa walasath sũhna iwejçx iwejçx yaakxsa! áhmeekuësa yuuna, nawa áhmeekwesath sũhna fxi'zesa! walasa yuuna.

¹³Ley kaapiya!jsa vxite! fxariseowe'sx áateçxáa ew we'weçxa! úuste yu! ewmeeçxáa yaakxsa, i'kwe'sx yakha! seena! yuh úukhũukha!, txã'wë Dxus jxkaahnite u'kawa!ja's apha!i'kwe maawa u'kakahmén. Sa! vxitesatx ka'ga!jmeeçxa!, i'kwe'sxçxáa yuhwa u'kaçmee!i'kwe, txãa pa'ga úukhũukha!.

¹⁴Ley kaapiya!jsa vxite! fxariseowe'sx áateçxáa ew we'weçxa! úuste yu! ewmeeçxáa yaakxsa, i'kwe'sx yakha! seena! yuh úukhũukha!. Vxiudawe'sx yattxi kusa!jçxa txãa kusa!jnitx kaapeçxkana!jya! sũhçxa wala jxu!j lisa!i'kwe. Txã'wë yûupa!ga i'kwe'sxa! jxthaakwe Dxus kastigãyni yuune'kwe.

¹⁵Ley kaapiya!jsa vxite! fxariseowe'sx áateçxáa ew we'weçxa! úuste yu! ewmeeçxáa yaakxsa, i'kwe'sx yakha! seena! yuh úukhũukha!. Mtee mteewa pekûju!i'kwe nasatx i'kwe'sx ju'gu tuphy wëeçxa i'kwe'sx kaapiya!jni's pta'sxna. Nawa nasatx knayçxa!, txãa nasatxi! i'kwe'sx úswa!j infxiernotey nvxiit-sa i'kwe yu!.

¹⁶I'kwe'sx yakha! seena! yuh úukhũukha!, jimeeçxa na!jina i'kwe kaapiya!ja! naa pa'ga: Puutx we'weni's kxtey yu'nja jičxa dxuus yata'sçxáa kxsusna jurãyni's kxtey yuumeetewa, kíh yuumeena. Nawa dxuus yatte

vxyuu beja's kxsusna jurãyni's yuuçxá' kxtey yuuwa'lj yuja' jî'i'kwe. 17 Jiiimée luuku we'lwesa, Dxus dxi'pte' çkîh wejx jxthaakwe ewsakx, vxyuu beja' meeçxa' dxuus yata'? E'zîi çDxus jiiçxaçxáa meetxna'? 18 Txã'wëy na'jî'i'kwe: Dxuus yatte altala'sçxáa kxsusna jurãynisa's kxtey yuumeetewa, kîhwa yuumeena. Nawa altalte kabwa'ja's kxsusna jurãynisa's yuuçxá' kxtey yuuwa'lj yuja' jî'i'kwe. 19 Jiiimée luuku we'lwesa, Dxus dxi'pte' çkîh wejx jxthaakwe ewsakx, dxuus yatte altala' meeçxa' altalte kabnisa'? E'zîi çDxus jiiçxaçxáa meetxna'? 20 Maawa dxuus yatte altala's kxsusna jurãysa' txã'sçxáana kxsussa yu'çme'. Altalte kabnisa'swa jxukak kxsussa yu'. 21 Txã'wëy maawa dxuus yata's kxsusna jurãysa' txã'sçxáana kxsussa yu'çme'. Kxtee üssa Dxus îtxisa's kxsussak yu'. 22 Txã'wëy cielu's kxsusna jurãysa' cieluçxáana kxsussa yu'çme'. Dxus jxkaahna üsni's jxukak kxsussa yu' petx Dxus yã'ljçxa.

23 Ley kaapiya'lja vxite' fxariseowe'sx äateçxáa ew we'weçxa' üuste yu' ewmeeçxáa yaakxsa, i'kwe'sx yakha' seena' yuh üukhüukha'. I'kwe'sx üusteçxáa yajkxçxa kaapiya'ljçxa', putatxhã' ma'k yuu meeçxa' me'sukwe ma'k yuu komino ma'k yuu txã'wësatx diez eç uhdeçxa' teeçx eça's kutxi'jî'i'kwe Dxus jî' jîna. Nawa Dxus ley jxkaahçxa': Dxus dxi'pte ew fxi'zena, vxite nasatx peeygãhna, Dxusa's üusuh jxuka yajkxna txã'wë yüuwa'ja' jî'k txãa isa jxkaahni yu's kxtey yu'çmeei'kwe. Nawa na'wë Dxus jî' jî'i'kwe txãa yu's nvxiitwa'lj yu'me'. 24 Jiiimée kaapiya'lja, fxîsx le'çxkwesa yuutxi' a'çha'i'kwe, nawa kamelxo walasa yu'sa' uymeeçxa jxkhëje'i'kwe.

25 Ley kaapiya'lja vxite' fxariseowe'sx äateçxáa ew we'weçxa' üuste yu' ewmeeçxáa yaakxsa, i'kwe'sx yakha' seena' yuh üukhüukha'. Waso ma'k yuu meeçxa' plaatu ma'k yuu txã'wësatx ekaju yu' wala ew pkhi'khi'i'kwe, nawa dxiikhë yu' vxite jîitx pesweeçxa abnisaçxáa uta jî'phta'. 26 Fxariseo jiyu'çmeeg. Dxiikhë khuë'y pkhi'kxwa'ja' waso vxite' plaatutx, kxah ekajuwa jxuka ate yuuna.

27 Ley kaapiya'lja vxite' fxariseowe'sx äateçxáa ew we'weçxa' üuste yu' ewmeeçxáa yaakxsa, i'kwe'sx yakha' seena' yuh üukhüukha'. Uusáa pedani's kajkwekhë pçxiime'the', zhiçxkwek vxya'. Nawa dxiite yu' uusáa dxi'thçxáa utak kazx putana üsu'. 28 I'kwe'sxa' txã'wëysa i'kwe. Aakhë yu' nasaa dxi'pte wala ew na'wë thegu'i'kwe. Nawa üuste yu' kazx ewmëe yaakxnisaçxáa uta üsa'.

29 Ley kaapiya'lja vxite' fxariseowe'sx äateçxáa ew we'weçxa' üuste yu' ewmeeçxáa yaakxsa, i'kwe'sx yakha' seena' yuh üukhüukha'. I'kwe'sxa' ewkuë pheu'ljna nes yu' Dxus yuwe pta'sxsa vxite' nasa ewsa txãawe'sxtxi pedaní kafxsu. 30 Sa' na'jî'i'kwe: Kwe'sx yaçgawe'sx fxi'zeni ente kwe'sx üswaça', kwe'sxa' ikhwaljme'ntka'w yu' Dxus yuwe pta'sxsatxi' jî'i'kwe. 31 I'kwe'sxa' Dxus yuwe pta'sxsawe'sxtxi ikhsa nwe'sxi'kwe, txãasa i'kwe txãa ikhsawe'sxtxi' kwe'sx jî'j yaçgawe'sx jîna we'we'. 32 I'kwe'sx

yaçgawe'sx kîhne'ta yûusa yu', aça' i'kwe'sxwa txâ'wëy yûuna nes yuune'kwe.

³³Ul weeswée seena'sa jilj, çma'wë yûuçxa infxiernote kastigäywa'the pa'ljmée yuuki'kwe? ³⁴Txâ'wësa yâ'ji'kwe na' i'kwe'sxa' maaítixi' kluuskhé ki'pna ikhna, vxitetxi's judiuwe'sx pkhaakheni yaçu pâpana, vxitetxi's ahçççxa çxhab iisa ikhya' pakwena nes yuukahn adxa' kaajxa'wath Dxus yuwe pta'sxsa vxite' kîhtewa wala jiisa vxite' kaapiya'jsa txâawe'sxtxi. ³⁵Txâ'wë Abela's ikhnijûjx nasa ewsatx ikhya' takhçxa Berekias nçxi'k Zakariasa's Dxus altal pukate ikhi'kwe txâa entepkaçx ikhnisatx i'kwe'sxçxaçxâa yuuwesa yuune'kwe. ³⁶Isath we'we' nyafxiitey ikhnisatxi's nasa naa ensuwe'sx txâ'wë yuuwesa yuutxna.

Jesusa' Jerusalena's thegçxa ũ'neni

(Lk 13.34-35)

³⁷Jerusalente nasa, i'kwe'sxa' Dxus jxkaahnisa txajx yuwe's pta'sxsawe'sxtxi ikhe'i'kwe, maaítixi' kwet wâatatahna. Maz uswa pkhakhçxa nwe'we wëeth i'kwe'sx luuçxtxi, atalxwa ma'wëga luuçxkuëtxi's fxuu ku'ta dxiite äsxi' txâ'wëy, nawa wa'li'kwe.

³⁸Mwëese'jwe: i'kwe'sx ũsni' thegnimée neeyûuna. ³⁹Na'jî'th na': peena yu' adxa's uymeene'kwe, Dxus tasxu yuusa wala ewsa yuja' jîna we'wewa'j en ähpkaçx.

Dxuus yat pçuwa'ja's Jesus pta'sxni

(Mr 13.1-2; Lk 21.5-6)

24 ¹Dxuus yatu kasehçxa Jesusa' u'jweçpkaçxha', txâa yakh u'jusawe'sxa' utxaaçxa we'wetx dxuus yata's pta'sxna. ²Aça' Jesusa' na'wëk pas:

—Txâ'wë yuh seena' zhiçxkwe wala'. Nawa na'jî'th na': jxuka pçuuna, aça' txâa yattewe'sx teeçx kwetçxâa yuhwa këese'jnimeesa yu' neeyûumeena jîk.

Naa kiwe pçuwa'j en äjaçte seena'sa vxyaawa'j

(Mr 13.3-23; Lk 21.7-24; 17.22-24)

³Txajû' Oliwos vxicnatx u'j. Kxtee pa'jçxa Jesus kaçççxa u'pte', txâa yakh u'jusawe'sx maaíi yu' na'jînatx we'we paaçte:

—Meen peeta'sx, çbagaçx txâ'wë jxuka pçuukx? Sa' iidx kîiwa'j en vxite' naa kiwe pçuwa'j en äjaçte', çkîh seena'sa vxyaakx? jîte', ⁴Jesusa' pta'sxku:

—Mpa'yajkxwe, i'kwe'sxtxi kaypuba'jwe'sxte. ⁵Txâ'wëme', wala pa'jatxna adx yase's kxsusna na'jîna: Dxus kaahnisa Kristoth jîtxna, sa' txâ'wë yûuçxa wala kaypuba'jatxna îsxiina. ⁶I'kwe'sxa' wëse'jene'kwe gweçxa msuu msuwa u'pa' jîni. Txâ'wë yûutewa i'kwe'sxa' ũukhnuwe,

txā' nmeh en yu' me'. ⁷Gobierno' vxite kiwete gobierno yakh puiitxna, naapkaçxha' puutx jxu'lj kiwejũ pwe'sxwa puiitxna. Txā'wẽ mtee mteewa jxuka gweçxa kiiteena. Sa' wẽje enwa pa'ljana, wee seena'sawa pa'ljana, ehdwa seena'sa u'lwetxna mtee mteewa. ⁸Txā'wẽ seena'sa pa'ljçxawa txāa yu' nyafxte nxusya' takhnisaçxāa yuuna.

⁹Txajũ' i'kwe'sxtxi uweçxa dukhetxna pāpana ikhkahn, sa' naa kiwete mteewe'sxwa jxukaysa açetxna adx jxkaahni's nwēese'pha'gaçxāa.

¹⁰Txā'wẽ yũute', maazkuēesawa Dxus tasxu txuteetxna, sa' puutx yahçena vxitesa uweçxa ikhwa'ja's vxitutxna. ¹¹Wala ĩsxiisa vxyaatxna, adxa' Dxus kaahni yuhth jĩna nasa maazkuēesatxwa ĩsxiijatxna. ¹²Sa' ewmée yũuna fxi'zewa'jçxāa txakwe wala pa'the', puutx ya'peeygāhna fxi'zewa'j yu'sa' ivxiitutxna maazkuēesawa. ¹³Nawa uu entepkaçx Dxus yakh txutemée fxi'zesa' ewte neeyũutxna. ¹⁴Naapkaçxha' Dxus jxkaahwa'ja's pta'sxnisa' maa kiwetewa jxuka pta'sxni yuuna mteewe'sxwa jxuka jiyukahn. Txā'wẽ yũunijũ nmeh ensa pa'ljana.

¹⁵Na'wẽ yũuwa'ja's jxp'a'yakx lēeyçxa jii mfxi'zewe Dxus yuwe pta'sxsa Daniela' pta'sxna fxi'kh dxuus yatte kazx ewmée yũuna pa'ljwa'ja's.

Aç'a' txā'wẽ seena' kazxsa pa'ljçxa dxuus yatte u'kaçte uyçxa', ¹⁶Judea kiwesuwe'sxwa jxuka ũphna u'lwene'kwe vxiç walasu ũsya'. ¹⁷Sa' ēe yat-su ũssawa sa'ljçxa kĩhçxāanawa kutxi'ljwa'j en ji'phumeetxna.

¹⁸Txā'wẽy mjii ehsu u'jusawa txajx atxha's nikxya' yatna u'lwaj' ençxāa yuhwa ji'phumeetxna. ¹⁹Txāa ente' u'ywe'sx nasa ji'phsa meeçxawa luuçx āpākuē ji'phsawe'sxa' wala yuh pxthaa yuutxna. ²⁰I'kwe'sxa' Dxusa's mpējxwe txā'wẽ nus ente meeçxawa jxkaase ente ũphna u'lwaj' yuukahmén.

²¹Txā'wẽ txāa ente' seena' yuh wala nxuswa'j yuuna. Naa kiwe's pheu'jiyna bagaçxte yuhwa txā'wēsa yu' iuu'pume', sa' txā'wēsa skhēwniijũyā'ja' peena yu' u'pumeena txā'wēysa yu'. ²²Dxusa' en txā'wẽ seena'sa's txaçxmée vxitmeete yu', kim yuhwa ĩtxi neeyũumeetxna. Nawa txajx nasa txhitxhnisatx peeygāhçxa, en txā'wẽ seena'sa's txaçxmeeçxāa vxituna.

²³Maawa i'kwe'sxtxi we'weçxa', mthegwe Kristo ayte ũsa' jĩtxna, meeçxawa kxtee ũsa' jĩtxna, nawa txā'jĩni's nwēese'ljuwe. ²⁴Txāa pa'gatey wala ĩsxiisa pa'ljatxna, adxa' Dxus yuwe pta'sxsath sa' Dxus kaahnisa Kristoth jĩtxna, txā'wẽ kim yuhwa ājanimeesa's kaavxya'jaljatxna kaypuba'j wēeçxa. Txā'wẽ yũuçxa maaiĩtxi' kaypuba'jatxna Dxus txhitxhnisa yuhtxwa. ²⁵Txā'wẽ yũuwa'ja's pta'sxyā'th i'kwe'sxtxi dxiikhēy. ²⁶Txāa pa'ga nwēese'jmeene'kwe makwe txā'wẽ kxtee ũsa' nasa u'pnimeete jĩtewa meeçxa' ay dxiite ũsa' jĩtxna.

²⁷Txāa pa'gatey Dxus Nçxi'k Nasa Yuusāa kii ente', kpi'sxwa ma'wēga sek kāanijũ kwehneçxa' sek khēenijũwa vxya' txā'wēyçxāa yuuna naa dudte jxukaysa dxi'pte. ²⁸Kakwe uuniisa mkaa ũstewa kxtee pkhaakhetxna mēewējxa' ũ'ya'.

Dxus Nçxi'k Nasa Yuusáa seena' zhiçxkwe vxyaana
(Mr 13.24-37; Lk 21.25-33; 17.26-30, 34-36)

²⁹Txã'wẽ seena' nxuswa'j en skhẽuuçpkaçxha', seka' çxhi'dxina, açã' a'te' kweethmeena. Naapkaçxha' estrelxa ùsxitxna, ãe walasu kîh seena'sawa jxuka kãese'jni yuutxna. ³⁰Txã'wẽ yũunijũ', Dxus Nçxi'k Nasa Yuusáa kîiwa'ja's kaajiyu'jsa vxyaana cieluju, açã' naa kiwete nasa maazkuẽesawa ù'netxna Dxus Nçxi'k Nasa Yuusáa txã'wẽ cieluju tãaph pxãhte seena' zhiçxkwe vxyaana yuhte uyçxa. ³¹Sa' txajx angeleswe'sxtxi jxkaajana seena' sus tujkaçxa txajx txhitxhnisatxi' pkhakhkahn naa kietewe'sx mtee mteewe'sxwa jxukaysatx.

³²Naa ejemplo's peçxkananuwe: higwera fxtũu tasxa' eç ubuçxa ki' u'se yeeçuçte uyçxa', yũnya'watewa jiyu'i'kwe. ³³Txã'wẽy na'wẽ seena'sa vxyaachte uyçxa', jii mfxi'zewe, pçuwa'j en utxaaçte txã'wẽ yuuna. ³⁴Isath we'we', naa ensu nasa' uumey txã'wẽ seena'satx uyuune'kwe. ³⁵Cielu naa kiwe jxuka skhẽuutxna, nawa adx we'weni yu' kxtey yuume yu' skhẽwmeetxna.

³⁶Nawa kîh ente kîh orate txã'wẽ yũuwa'j yu'sa' kim yuhwa jiimeeta', cielute angeleswe'sx Dxus Nçxi'k txãawe'sx yuhwa, naasáa Dxus yuuçxáa jiia'.

³⁷Noe entewa ma'wẽga yuu txã'wẽyçxáa yuuna, Dxus Nçxi'k Nasa Yuusáa kîi entewa. ³⁸Txãa ensu nasa' îkh utameyna yu' wala weçxana ùsu'tx ù'na tudxna kabana Noe arkate u'kapkaçx. ³⁹Sa' Dxus kastigo's jiiimée ùsí, îkh utate jxuka pçuuçyã'jçxaçxáatx jiyu, txã'wẽyçxáa jiyumeetxna Dxus Nçxi'k Nasa Yuusáa kîi entewa. ⁴⁰Txãa ente' e'z piçthẽ'j mjîina ih ùsutxna, açã' teeçxsa's jxũna u'jni yuuna, nawa vxite's nvxiitni yuuna. ⁴¹Txã'wẽy e'z u'y ih ù'khna ùsutxna, açã' teeçxsa's jxũna u'jni yuuna, nawa vxite's nvxiitni yuuna.

⁴²I'kwe'sxa' jxpa'yakx meswe. Txã'wẽme', kîh ente kîh orate Dxus Nçxi'k kîiwa'jsatewa jiimeei'kwe. ⁴³Nawa jxpa'yakx meswe. Yat namuwa ma'wẽ peswée kîh orate yuhtewa jiyuçxa' dehmée jxpa'yakx ùyhasna u'pukx yatte pesweekahmén, txã'wẽy myũuwe. ⁴⁴Txãa pa'ga i'kwe'sxwa jxuka pheu'jçxa meswe. Txã'wẽme', yajkxmée ùsiyna Dxus Nçxi'k Nasa Yuusa' kîhçxáa yuuna.

Selpisáa ewsa vxite' ewmeesa
(Lk 12.41-48)

⁴⁵Selpisáa ¿maa ewki patron neewe'weçxa nvxihtte kxte yattewe'sxtxi kwẽeje'jmée sã'jîwa'jsa? ⁴⁶Patron neewe'weçxa nvxiitni's jxuka kxtey yuuna ùste patrona' thegna pa'the', txãa selpisáa yakha' wala yuh weçxa yuhna. ⁴⁷Isath we'we': txã'wẽ yũusa's patrona' txajx ji'phuni's jxuka neewe'weçxa nvxiituna. ⁴⁸Nawa selpisáa ewmeesa' patron pa'jya'

jxthēyuuuna sūhçxa ⁴⁹xte vxite selpisaatx pksuuna tūusaawe'sx yakh tudxna ũ'na yūuna ũste!, ⁵⁰yajkxmée ũsiyna patrona' kīh ente kīh oratewa pa'lçxáa yuuna. ⁵¹Sa' seena' wala nxus nxus kastigāina txā'wē yuwejuçxáa ew we'weçxa' ũuste yu' ewmeeçxáa yaakxsawe'sxtxi na'wēy. Txajūyā'ja' txāa selpisáa ewmeesa' seena' wala pebeena ki'thtxi ksuusu'jna.

Diez kna'sa yakh kaaja'da'jni

25 ¹Dxus jxkaahwa'j en āhte!, na'wē yuuna: Diez kna'sawa ma'wēta lampara aceite awniisa's atçxa boda yatna u'j novxio's jxpa'gaya', txā'wēy yuutxna. ²Txāa kna'sawe'sx taçsa' jxpa'yakxmeeçxa pheu'jmeetx u'j, sa' vxite taçsa' jxpa'yakxçxa jxuka pheu'lçxatx u'j. ³Taçsa' ew ũus yajkxmeeçxa, lampara yu'sa' jxūçxa u'lçxawa aceite yu' jxūmeetx u'j pçuute ki' awwa'j. ⁴Nawa vxite taçsa' aceite jxūçxatx u'j lamparatewe'sx pçuute' ki' awwa'j. ⁵Novxio pa'jya' jxthēyuuute!, txāawe'sxtxi wala deewēe yuute' dehtx. ⁶Txajū' kuspāh yuuçte!, pthūusek na'jīna sus we'weni: Novxio yujxā'ja', aça' jxpa'gaya' myuhwe jīni. ⁷Naapkaçxha' kna'sawe'sx kxazí kiiteçxa lampara's pheu'jtx. ⁸Aça' taçsa jxpa'yakxmée u'jsawe'sxa' vxite taçsatx aceite thāastxi: Le'çxkuēçxáawa peesune'kwe. Txā'wēme!, kwe'sx pki'tanisa' ũçxhaça' jīnatx we'we. ⁹Nawa kna'sawe'sx jxpa'yakx pheu'lçxa u'jsa' na'wētx pas: Ūsme'nja'w. Txā'wēme!, kwe'sx jīi yuhwa āhmée jil'ptha'w, aça' i'kwe'sxtxi ũswa'j yu' wejx āhmeena. Wejx yuuwa me'jwe weyya' jī'tx. ¹⁰Txā'wē taçsa jxpa'yakxmeeçxa aceite weyya' u'jweçpkaçxha', ptamusá novxio' pa'kh. Aça' jxpa'yakx ũythāssawe'sxa' boda yatte novxio yakh u'kaçpkaçxha', vxitxa's aphantxi. ¹¹Txāa e'suyā'jtx vxite kna'sawe'sx kūhçxa: Meen phaade jīna we'we. ¹²Nawa pasçxa': Isa, adxa' i'kwe'sxtxi' jiimeeth jīk. ¹³I'kwe'sxa' jxpa'yajkx meswe. Txā'wēme!, kīh ente kīh orate Dxus Nçxi'k Nasa Yuusáa pa'lwa'ja's jiimeei'kwe.

Mjīiya' ājawa'jsatx vxxyu's neewe'weçxa u'jni yakh kaaja'da'jni

¹⁴Teeçx piçthē'jwa ma'wēga vxite kiwen u'jweççxa', txā'sna selpisaawe'sxtxi pa'yaçxa txajx vxxyu's neewe'weçxa ũçxa u'j, txā'wē yūuna Dxus jxkaahwa'j en āhte!. ¹⁵Txāa piçthē'ja' selpisáa teeçxsa's vxxyu taçç milku ũs, sa' vxite's e'z milku ũs, sa' vxite's teeçx milku ũs, teeçxsa na'wēçxah makwesal's xsiigmée iijxūya' ājawa'jsatewa txakweçxáak ũçxa u'j. ¹⁶Teeçx selpisáa taçç mil vxxyu jxpa'gasa', txāa vxxyu's kmāajil'çxa ki' vxite taçç mil íik āh knay. ¹⁷Txā'wēy e'z mil jxpa'gasawa ki' vxite e'z mil íik āh knay. ¹⁸Nawa teeçx milçxáa jxpa'gasa' patron vxxyu's kafxil'çxa kiwetek pedáa. ¹⁹Patrona' wala txaçte ki' sxawedna pa'lçxa', txāa selpisaawe'sxtxi vxxyu ũsni's ki' pējxku. ²⁰Nyafxte' taçç mil vxxyu jxpa'gasa khu'e'y

utxaana kühçxa ki' vxite tahç mil íik ãh kaasxwedu'j na'jîna patrona's: Idxa' tahç milgu ũs, aç'a' ki' vxite tahç mil íith knay kmãaji'jçxa jîte',²¹ patrona' na'wêk we'we: Idxa' vxyu'sa' psuwmeeg wala ew kmãaji'j. Txã'wê le'çxkuêçxáasanawa psuwmeé kmãaji'pha'ga, wejx walasanawa neewe'weçxa iidx kusete nvxiitu'nja. Æçxha' me'ka adx yakh weçxana ũsya' jîk.²² Txajû' vxite selpisáa e'z mil jxpa'gasawa kûjk na'jîna patrona's: Idxa' e'z milçxáag ũs, nawa txã'sa' kmãaji'jçxa ki' vxite e'z mil íith ãh knay jîte',²³ patrona' na'wêk pas: Idxa' vxyu'sa' psuwmeeg wala ew kmãaji'j. Txã'wê le'çxkweçxáasanawa psuwmeé ewgu kmãaji'pha'ga ãçxha' txáate jxthaakwe walasanawa nvxiitu'nja iidx kusete. Me'ka adx yakh weçxana ũsya' jîk.²⁴ Txajû' teeçx milçxáa jxpa'gasawa kûjk patrona's na'jîna: Idxa' wala weesweetewa jiith, sa' iidx uthasxmeesuwa jxukag pkhakhe' kíhwa uhmeeçxawa.²⁵ Txáa pa'ga ũukhçxa iidx vxyu's jxaawthu kiwete pedaaçxa. Nawa ãçxha' dukheçthu idx makwene'ga ũs txã'sa' jîte',²⁶ patrona' na'wêk pas: Idxa' seelpmíeé watxkuêg. Adxa' txã'wê juuna'çxa kíhwa uhmeeçxawa vxite jîtx pkhaksatewa jiith jî'g na',²⁷ çmjítega adx vxyu's bankoga jxaawmée txáate jxthaakwekué nuypehnaçxa kaasxwedu'jya'? jîçxa',²⁸ kxtee ũssatx na'wêk jxkaah: Txáa piçthê'j vxyu mil ji'phsa's kusa'jçxa diez mil ji'phsa's meswe.²⁹ Txáa pa'gatey ji'phsa's jweeíçxáa jxthaakwe ũswa'ja' wala ji'phukahn. Nawa ji'phmeesa's jxuka kusa'jwa'ja' le'çxkuêçxáa ji'phuni'swa.³⁰ Sa' txáa piçthê'j seelpimeesa's uweçxa ekaju çxhi'dx walate makhwe. Kxte' seena' yuh pebeena ki'thtxi ksuusu'jna ũswa'ja' jîk.

Naa kiwetewe'sxtxi jxuka ewsatx fxii txudeni

³¹ Dxus Nçxi'k Nasa Yuusa' jxkaahsa yuuçxa angeleswe'sx ksxavxyte kíhçxa txajx jxkaahwa'the kaçxhiina.³² Txajû' nasa' naa kiwete mtee mteewe'sxwa jxuka pkhaakhetxna txajx tasxte, aç'a' teeçxsa na'wêçxah txhitxçxa txudena, piisxáa-thegsawa ma'wêga fxii txudé' piisxáa vxite' kaplatx txã'wêy.³³ Sa' piisxaatxi' paçu ju'gu txahçxa', kaplatxi' jebu ju'gu txajana.³⁴ Txã'wê yuuçxa jxkaahsa' we'wena paçu ju'gu ũssatxi' na'jîna: Adx Tata peeygãanisa, i'kwe'sxa' myuhwe txã'wê naa kiwe's vxitiyna i'kwe'sx jxkaahwa'j pheu'jni ũsa' txã'sna jxpa'gaya'.³⁵ Txáa pa'gatey i'kwe'sxa' adxa's sã'jî i'kwe wëena u'jute'. Sa' yû'wëena u'jute', yusi'kwe. Nasa ekajuwe'sx na'wê u'jute', deewa'j pki'j'i'kwe.³⁶ Athwa'j ropa ji'phméé u'jute', ropa ũsi'kwe. Uuya' ũste', thegya' pa'j'i'kwe. Karcelte ũste', kxteewa thegya' pa'j'i'kwe jîte',³⁷ nasa ew yūusa' na'jîtxna: Idxa' ¿bagaçx wëena u'jutetka'w uyçxa ũ' puuç? ¿Bagaçx yû'wëena u'jutetka'w tudxwa'j ũs? ³⁸ Idxa' ¿bagaçx txã'wê ekajuwe'sx na'wê u'jute uyçxatka'w deewa'j pki'j? ¿Bagaçx txã'wê ropa ji'phméé u'jutetka'w ropawa ũs? ³⁹ ¿Bagaçx aç'a'na ũstetka'w thegya' pa'j? ¿Bagaçx karcelte ũstetka'w kxteewa thegya' pa'j? jîtxna.⁴⁰ Aç'a' jxkaahsa' na'wê pasuna: Isath we'we', adx

yakhthē'jwe'sx makwe wala pxthaa āhmeekwesaçxawa ayte ũsta' txāatx txā'wē yūusa' adxna pu'çxsaçxa i'kwe txā'wē yūu jīna.

⁴¹Txajū' jebu ju'gu ũssatxi' jxkaahsa' na'jīna we'wena: Adx tasxu mtxuteewe, i'kwe'sxa' ewmeetewe'sx yā'ji'kwe. Txāa pa'ga eçxthē'j jī eçxthē'j angeleswe'sx jī pheu'jni ũsa' infxierno ipx wala kxtee me'jwe jīna jxkaajana. ⁴²Txā'wē adx wēena u'jutewa, puuçmeei'kwe. Yū'wēena u'jutewa tudxwa'j ũsmeei'kwe. ⁴³Nasa ekajuwe'sx na'wē u'jutewa, deewa'j pki'jmeei'kwe. Ropa ji'phmēe u'jutewa, athwa'j ũsmeei'kwe. Āça'na ũstewa, thegya' pa'jmeei'kwe. Sa' karcelte ũstewa, kxteewa thegya' pa'jmeei'kwe jīte', ⁴⁴txāawe'sxa' na'wē pasutxna: Idxa' çbagaçx wēena u'jutetka'w puuçmēe? çBagaçx yū'wēena u'jutetka'w tudxwa'j ũsmēe? çBagaçx ekajuwe'sx na'wē u'jutetka'w deewa'j pki'jmēe? çBagaçx ropa ji'phmēe u'jutetka'w athwa'j ũsmēe? çBagaçx āça'na ũstetka'w thegya' pa'jmēe? çBagaçx karcelte ũstetka'w kxteewa thegya' pa'jmēe? jītxna. ⁴⁵Aça' jxkaahsa' na'wē pasuna: Isath we'we', naa nasa pxthaa āhmeekuēsath kīhte yuhwa pu'çxmeei'kwe na' adxna pu'çxsameeçxai'kwe txā'wē yuu jīna. ⁴⁶Txāa pa'ga ew yūusame' infxierno ipx pçuwa'jmeete khēeya' u'ljwetxna, naapkaçxha' ew yūusawe'sxa' bagaçxtewa pçuwa'jmēe ītxi fxi'zewa'ja's ji'phutxna.

Jesusa's ikhwa'ja's puutx we'weni
(Mr 14.1-2; Lk 22.1-2; Jn 11.45-53)

26 ¹Jesusa' txā'wē pta'sxna jxā'jçxa', txāa yakh u'jusawe'sxtxi na'jīnak we'we:

²—I'kwe'sxa' jii i'kwe Paskua fxiesta ājxa' e'z ençxāa yā'lj peejxa', aça' txāa ente' Dxus Nçxi'k Nasa Yuusa's uweçxa dukhni yuuna kluuskhē a'kxçxa ikhkahn jīk.

³Txāa entey sacerdote npiiçthē'jwe'sx, ley kaapiya'jsawe'sx, judiu nthē'jsawe'sxa' pkhaakhetx sacerdote npiiçthē'j Kaifxas yat patxute, ⁴sa' txāawe'sx pwe'sx puutx we'wetx nasa jiyunimeete paaçte Jesusa's uweçxa ikhya'. ⁵Txāasatx fxiesta ente yu' txā'wē ikhya'mēe puutx we'we nasa wala suskahmen.

Aceite pa'gasa's teeçx u'y Jesus dxikthekhē awni
(Mr 14.3-9; Jn 12.1-8)

⁶Txāa ensu' Jesusa' Betania çxhabte Simon wā'ly weeju katxhisa yattek ũsu'. ⁷Aça' teeçx u'y utxaana kūjk aceite wēt putasas' fxraskote uta awniisa wala pa'gasa's atçxa. Sa' Jesus kaçxçxa u'pte', txajx dxikthekhēk jxuka aw.

⁸Txā'wē yūuni's Jesus yakh u'jusawe'sx uyçxa', na'jīnatx ũusçxa we'we:

—çTxakwe yuja' wala psuwmanx? ⁹Txā'wē yūupkaçxte wejxwa pa'gate txweyçxa txāa vxyu's puuplesatx peeswaçne' wejx ew yu' jīte', ¹⁰Jesus wēse'jçxa' na'wēk we'we:

—¿Kĩjkwē kuçx susu' naa u'ya's? Na'wẽ yũunisa' psuwnisame'!
 11 Puuplesa' bagaçxtewa i'kwe'sx yakh nes yuutxna. Nawa adxa' i'kwe'sx yakh nes yuuwa'jsameeth. 12 Naa u'y adx kakwekhẽ aceite wēt putasa's awku, nawa adx uute pedaawa'ja's pheu'jnaçxáak txā'wẽ yũu. 13 Isath we'we': Naa kiwete mtee mteewa Dxus yuwe's pta'sxna pekũhsa' naa u'y txā'wẽ yũuni'swa ja'da pta'sxni yuuna peçxkanamée jĩk.

Jesusa's preesu'jwa'ja's Judas ũus yaakxni
(Mr 14.10-11; Lk 22.3-6)

14 Txajũ' Jesus yakh u'jusa docesatewe'sx Judas Iskariote yaasesa' sacerdote npiĩthẽ'jwe'sx yakh puutx we'weya' u'jçxa 15 txāawe'sxtxi na'jĩk:

—Jesusna uweçxa dukhte' ¿maz deweeki'kwe? jĩte', txāawe'sxa' treinta vxyutx deweya' neeyũu. 16 Txajũ' Jesusa's ma'wẽ yũuçxa txāawe'sx kusete dukhya' ājawa'ja's wala pakwek.

Jesusa' docesawe'sx yakh nmeh ũ'ni
(Mr 14.12-25; Lk 22.7-23; Jn 13.21-30; 1 Ko 11.23-26)

17 Pan lewadura ji'phmée ũ'ni fxiesta en ājaçte', Jesus yakh u'jusawe'sxa' txajx tasxte utxaaçxa na'wẽtx pẽjx:

—Paskuate ũ'wa'ja's ¿mteega pheu'j jxthāasu'? jĩte', 18 na'wẽk jxkaah:

—Jerusalenna me'jwe, kxtee teeçx piçthẽ'ja's jii i'kwe txā'sna na'jĩne'kwe: Kwe'sxtxi kaapiya'jsa' na'jĩnak yuwe kaah: Adx uuwa'j en utxaak, aça' iidx yatte Paskua's yu'skhẽwya'wath adx yakh u'jusawe'sx yakh jĩne'kwe jĩte', 19 txāa yakh u'jusawe'sxa' Jesus jxkaahni's kxtey yuutx, sa' ũ'wa'ja's pheu'jtx.

20 Txajũ' jxuka çxhi'dxiçte', Jesusa' docesawe'sx yakh kaçxku mesate ũ'ya'. 21 Sa' ũ'na u'pçxa', na'wẽk we'we:

—Isath we'we', i'kwe'sx yakh u'jusa teeçxsa' adxa's açasawe'sx kusete dukhya'wa' jĩte', 22 txāawe'sxa' wala nxusçxa paapẽjxtxi teeçx teeçxçxah:

—¿Adx ma'th? jĩna. 23 Aça' Jesusa' pta'sxku:

—Maa txā'wẽ adx yakh ja'daçxah kuse's akhena plaatukhẽ txāa txā'wẽ adxa's açasawe'sx kusete dukhwa'jsa'. 24 Dxus Nçxi'k Nasa Yuusa' ma'wẽ uuwa'jsatewa Dxus librute pta'sxi'k txā'sa' kxtey yuuya'wa'. Nawa adxa's açasawe'sx kusete dukhsa' jseena' yuh nxuste khẽjena! Txāa piçthẽ'ja' naa kiwete wejx yuuwa upxmeewaçne' wejx ew yu' jĩte', 25 Judasa' pẽjxku:

—Meeçxa' ¿adxwá'ntkax? jĩte', Jesus pasçxa':

—Idxiig jĩk.

26 ũ'na u'pçxa', Jesusa' pana's jxpa'gana'wa Dxusa's weçxaçxa pe'ltedek, sa' txāa yakh u'jusawe'sxtxi ũsu'sku na'jĩna:

—Mẽ'we, naa pana' adx kakwe na'wẽsa' jĩçxa', 27 waso'swa jxpa'gana'wa Dxusa's weçxaçxa txāawe'sxtxi ũsku na'jĩna:

—Jxukaysa mtudxwe naa wasotewe'sxa's. ²⁸Naa wasotewe'sxa' adx ee na'wēsa'. Dxusa' maazkuēesa pkaltxiwa khūkhçxa nwe'wewa'ja's vxitku, nawa adx eea's pkawçxa yuuçxáak txā'wē nwe'wewa'ja's vxit. ²⁹Nawa na'jī'th na': āçxhūyā'ja' peena yu' tudxme'nja naa uwa yu'a's, naasáa adx Tata jxkaahwa'j enteçxáa yā'j ki' i'kwe'sx yakh pkhaakheçxa tudxi'nja jīk.

Pedro īsxiiwa'ja's Jesus pta'sxni
(*Mr 14.26-31; Lk 22.31-34; Jn 13.36-38*)

³⁰Txajū' Dxusna weçxana memna jxā'jçxa', u'jtx Oliwos thā'j vxiçna.

³¹Aça' kxtee pa'jçxa', Jesusa' na'jīnak we'we:

—Naa kuste' i'kwe'sx jxukaysa adxçxáana nvxihtçxa txuteene'kwe. Txāa pa'gatey txā'wē yūuwa'ja's Dxus librute na'jī'k: Piisxáa-thegsa's ikhte', piisxá' jxuka ūphuutxna jī'k. ³²Nawa adxa' uuçxawa ki' itxi yuuçxa' i'kwe'sx yaçte u'jwe'nja Galilean jīte', ³³Pedro' na'wēk pas:

—Makwe vxite yu' idxçxáana nvxihtçxa txuteetewa, adx yu' txā'wē yūume'nja jīte', ³⁴Jesus pasçxa':

—Isath we'we', naa kuste atalx we'wemeyna idxa' Jesusa's jiimeeth jīna tekhs us īsxijane'ga jīte', ³⁵Pedro' na'wēk we'we:

—Makwe idx yakh ja'datey uuwa'jma'k kaseh, nawa idxa's jiimeeth jīna yu' īsxiieme'nja.

Aça' txāa yakh u'jusawe'sx jxukaysa txā'wēçxaçxáatx we'we.

Jesusa' Geçemanite Dxus yakh puutx we'weni
(*Mr 14.32-42; Lk 22.39-46*)

³⁶Txajū' Jesusa' txāa yakh u'jusawe'sx yakh Geçemaní yaasesate pa'jçxa', na'wēk we'we:

—Ayte mkaaçxwe, naapkaçxha' adxa' Tata yakh puutx we'weya' u'jweçthu jīçxa', ³⁷Pedro vxite' Zebedeo nçxi'k e'zsatx pe'jçxak u'j. Sa' ūuste wala nxus ūusuthete', na'jīk:

³⁸—Txakwe wala pxthaa yuuçxa uuwa'ja's yajkxte', wala nxus yuja'. Aça' i'kwe'sxa' aytee neeyūuçxa dehmée jxpa'yakx me'pwe adx na'wēy jīçxa', ³⁹Jesusa' jxu'jmée u'jçxaçxáa txkaa pkipha weteçxa Dxus yakh puutx we'wek na'jīna:

—Tata, idxa's ewuweçxte', adxa's meen nwe'we txakwe wala pxthaa yuuwa'ja's jxpa'gakahmen. Nawa adx jxthāasni yu'sa' kxtey yuumeexawa, iidx jxthāasniçxá's kxtey meen yūu.

⁴⁰Txajū' Jesusa' ki' sxawedku Pedrowe'sx tasxtey, sa' dehna ūste uyçxa' na'wēk we'we Pedro's:

—Adx yakh jxpa'yakx dehmée ūsya' ājameewá'kwe teeçx oraçxáawa.

⁴¹Ewmeete weteya'mée jxpa'yakx dehmée me'pwe Dxus yakh puutx we'wena. I'kwe'sxa' ūusuh yu' çxhāçxhai'kwe yaaki', nawa i'kwe'sx kakwe yu' çxhāçxhaçme' kxtey yuuya'.

42 Txajü' Jesusa' ki'kin u'jçxa', na'jînak Dxus yakh puutx we'we:
 —Tata, txakwe wala pxthaa yuuwa'ja's yu'pthejxa' ewuweçxmeete',
 iidx jxthâasni kxtey yuuwaççxáa ewna jîçxa', 43 Pedrowe'sx tasxte ki'
 sxawedçxa', txâawe'sx yafx çxhâçxhameete ki' dehna ûstek uy. 44 Sa' nyafxii
 na'wëyçxáa we'weçxa tekx uswa ki' u'kh, Dxus yakh puutx we'weya'.
 45 Txã'wë yûuçxak Pedrowe'sx tasxna sxawedna kûhçxa', na'wë we'we:
 —Ãçxh yuuçxá' mdejxujíwe jxkaaseya'. Dxus Nçxi'k Nasa Yuusa's
 pkalsawe'sx kusete dukhwa'j en âjk. 46 Aça' kiiteçxa u'jwega. Adxa's
 açsawe'sx kusete dukhwa'jsa' yujxã'ja' jîk.

Jesusa's preesu'jni

(Mr 14.43-50; Lk 22.47-53; Jn 18.2-11)

47 Jesus kxtee we'wena nee üsiyna, Judasa' pa'kh. Txã'
 docesatewe'sxíçxáak yu'. Aça' txãa yakh nasa wala kuh pa'jtx kçxilx
 vxite' fxtü atçxa. Txâawe'sxa' sacerdote npiçthê'jwe'sx vxite' judiu
 nthê'jsawe'sx jxkaahnisatx yu'. 48 Judasa' na'jînaga yu'kxwe'weçxa pe'jna
 yuwé' Jesusa's tudkahn:

—Ma'sna dxi'pte adx weçxa'nja txã'sna tudçxa jxûna u'jwene'kwe
 jînaga we'we.

49 Txâasak Jesus tasxte utxaaçxa na'wë we'we:

—Kwe'sxtxi jxpe'jsa jîna'wa weçxak.

50 Aça' Jesusa' na'jîk:

—Namiku, çkîjxa' yuhga? jîçpkaçxha', tudtxi jxûna u'jya'.

51 Txã'wë tuduçpkaçxha', Jesus yakh pi'kxna u'jusa teeçxsa' kçxilxa's
 jxkuutxi'jçxa sacerdote npiçthê'ja's selpisáa thû'wë's spê'thku. 52 Aça'
 Jesusa' we'wek:

—Iidx kçxilxa's mjxaaw. Txã'wëme', jxukay maawa kçxilxuh puiisa',
 kçxilxteyçxáa uuwa'jsata'. 53 Adx Tata's maazkuêe angeleswe'sxwa adxna
 nwe'wewa'jsa pêjxte', kxtey yuuna süju'çmeewá'ga. 54 Txã'wë pêjxte',
 kxtey yuuyujuna, nawa Dxus librute' nyafxiiitey pta'sxni yã'kh yu' açxh
 na'wë tuduçta' txã' kxtey yuukahn, aça' nwe'wewa'jsa pêjxme'nja.

55 Txã'jîçxa' tudsatxku we'we:

—Adxa' pesweethas i'kwe adxa's tudxa' kçxilx petx fxtü atçxa pa'j.
 Adxa' kaapiya'jya' een isath dxuus yatte i'kwe'sx ksxavxyte nes yu'. Nawa
 txagaçxhíi yu' tudmeei'kwe. 56 Nawa Dxus yuwe pta'sxsawe'sx fxi'jçxa
 nvxiitni kxtey yuukahnçxáa txã'wë yuuça' jîk. Naapkaçxha' Jesus yakh
 u'jusawe'sxa' txã'sçxáana nvxihtçxa jxuka üphna u'jtx.

Kaifxas tasxte Jesusa's kuutxa'jni

(Mr 14.53-65; Lk 22.54-55, 63-71; Jn 18.12-14, 19-24)

57 Aça' Jesusa's tudçxa jxûna u'jtx sacerdote npiçthê'j Kaifxas
 tasxte. Kxteea' ley kaapiya'jsa vxite' judiu nthê'jsawe'sx txâawe'sxtxi

pkhaakheçxa ùs yu'. ⁵⁸Aça' Pedro' e'ste jxu'j neeyũuçxak yuhna ùsu', sacerdote npiçthê'j yat patxute u'kapkaçx, sa' kxtee policiawe'sx yakh kaçxçxa neeyũuk kîh yũutewa uyya'.

⁵⁹Naapkaçxha' sacerdotewe'sx, judiu nthê'jsawe'sx vxite' jxukay kxtee pkhaakheçxa ùssawe'sxa' Jesusa's kiikhe'jya' sũhçxa kîhçxáawa ïsxiiwa'jsa pakwe'tx. ⁶⁰Makwe nasa maazkuéesa kîhçxáawa pta'sxna kũhtewa, ïxiiñçxáak kaseje'. Nawa nmehte' e'z nasa ïxiiisa kũhçxa na'wêtx pta'sx:

⁶¹—Naa piçthê'ja' na'jî'k: Adxa' naa dxuus yata's pêtçxça tekh ente' ki' txaja'nja jî'k jîna pta'sxte', ⁶²sacerdote npiçthê'ja' kiiteçxa Jesusa's na'wêk we'we:

—¿Kîh yũuçxaga ma'wêçxáawa pasu'çmée? Meeçxa' çisa yuh txã'jîwá'nta? jítewa, ⁶³Jesusa' pasme'. Aça' sacerdote npiçthê'ja' na'wêk we'we:

—Dxus ïtxisa dxi'pte jurãychça isasaçxá's mpeeta'sx. Idxa' ¿Kristo Dxus Nçxi'k dxihgá'? jíte', ⁶⁴Jesus pasçxa':

—Idxa' isag we'we'. Adxa' i'kwe'stxxi na'jî'th na': Dxus Nçxi'k Nasa Yuusa's uyuune'kwe Dxus pukate kaçxçxa u'pte sa' cieluju táaph pxãhte kijaçtewa uyuune'kwe jíte', ⁶⁵sacerdote npiçthê'ja' úusaçxçxa peekx athni ropa's sudek na'jîna:

—Naa piçthê'ja' txajx yuweju yuu açewe'wek Dxusa's, açá' ¿kîjxa'çxáa testigo jwee pejiikxtha'w? Txajx açewe'weni's i'kwe'sxíwa wése'jî'kwe.

⁶⁶Sa' açxha' ¿maa súju'kwe? jíte', txáawe'sxa' na'wêtx pas:

—Txã' yuuwesa', txãa pa'ga ikhwa'j yuuna jîtx.

⁶⁷Txajü' Jesus dxi'pte fxne'sx avxythethçxa uyiitx, açá' vxite' dxi'ptetx uka'ka na'jîna:

⁶⁸—Idxa' Kristo dxihçxa', mjiyu kimga dxi'pte ujka.

Jesusa's jiimeeth jîna Pedro we'weni
(Mr 14.66-72; Lk 22.56-62; Jn 18.15-18, 25-27)

⁶⁹Txã'wê yuucpkaçxha', Pedro' ekaju patxutek kaçxçxa u'pu'. Aça' teeçx kna'sa selpisáa utxaana kũhçxa na'wêk we'we:

—Idxwa Jesus Galileajuwe'sx yakh u'jusag jíte', ⁷⁰Pedro' jxukaysa dxi'pte:

—I'kwe we'weni's jiimeeth jînak ïsxii.

⁷¹Txajü' Pedro' vxitxte kasehna u'jweçpkaçxha', vxite kna'sa selpisaawa uyçxa' kxtee ússatx na'wêk pta'sx:

—Naa piçthê'jwa Nasarettewe'sx Jesus yakh u'jute uythu jíte', ⁷²Pedro' ki' ïsxiiik jurãyna:

—Txãa piçthê'ja's adxa' jiimeeth jîk.

⁷³Txaçxmeynaçxáa kxtee ússawe'sx Pedro tasxte utxaaçxa na'wêtx we'we:

—Isa, ñsxiimée idxwa txãawe'sx yakh u'ljusag. Txã'wëçxafi iidx we'weni' peedame! jîte!, ⁷⁴ki' jurãýçxa na'wëk we'we:

—Txãa piçthê'ja's jiimeeth, isa Dxus uyte.

Txã'ljina ùspkaçxha', atalx we'wek. ⁷⁵Aça' Pedro' yajkxku Jesus na'ljina we'weni's: Atalx we'wemeyna, idxa' tekx us ñsxijane'ga jiimeeth jini's. Txã's yajkçxa', Pedro' eka kasehçxa seena' wala nxusna ù'nek.

Jesusa's Pilato kusete dukhni

(Mr 15.1; Lk 23.1-2; Jn 18.28-32)

27 ¹Txajü' khikhyna sêjeçte!, sacerdote npiichê'jwe'sx vxite! judiu nthê'jsawe'sx txãawe'sxa' puutx we'wetx Jesusa's kiikhe'jya!. ²Sa' tudçxa jxüna u'ljtx ne'jwe'sx Poncio Pilato tasxte kuutxa'jya!.

Judas uuníi

³Jesusna kuuwe'jsa Judasa' Jesusa's ikhwa'j vxitni's jiyuçxa', iiméh wala nxusku. Txã'wë yüumeewaça' ewne' yu' sühçxa treinta vxyutxi' kaaswedu'jya' u'kh sacerdotewe'sx vxite! judiu nthê'jsawe'sx tasxna na'ljina:

⁴—Adxa' ähmeeth yüu, txã'wë piçthê'j kïhtewa yuuwemeesa's ikhkahn kuuwe'pha'ga jîte!, txãawe'sxa' na'wëtx pas:

—Kwe'sxa' ¿jiitka'wá'? Txã'wë yüusa idx jiine'ga jïçxa jxpa'gameete',

⁵Judasa' txãa vxyu's dxuus yatte wäatahna'wa ul'çxa ya'jythujkku.

⁶Txã'wë yüute!, sacerdotewe'sxa' txãa vxyu's pkhakhçxa na'wëtx puutx we'we:

—Naa vxyu's ofxreda kajate akhya' äjame'nja'w. Txã'wëme!, nasa's kiikhe'jni vxyua' naa pa'ga jïçxa', ⁷txãa vxyuju mitxh umsáa kiwe'stxi wey, nasa ekajuwe'sx pa'l'çxa uusaatx pedaawa'lj. ⁸Txãa pa'ga açxpkaçx txãa kiwe' ee pkawnisa kiwe' jï'tx. ⁹Aça' Dxus yuwe pta'sxsa Jeremias we'weni kxtey yuuk. Txã' na'wëk we'we: Israelwe'sx makwetene'ta txweyya' puutx we'we txãa treinta vxyu's jxpa'gaçxatx ¹⁰mitxh umsáa kiwe's wey, Dxusa' adxa's jxkaakh kiwe weykahn txã'sa' kxtey yuutx jïnak fxi'lj.

Jesusa's Pilato pëyni

(Mr 15.2-5; Lk 23.3-5; Jn 18.33-38)

¹¹Jesusa' ne'jwe'sx tasxte jxüna u'ljnik yuu, açá' txã' na'ljïnak pëjx:

—Idx wáa txã'wë judiuwe'sxtxi jxkaahsane'ga jîte!, Jesus pasçxa':

—Idxa' isag we'we!. Adxa' txã'wësaíith jïk.

¹²Txajü' sacerdotewe'sx vxite! judiu nthê'jsa txãawe'sxa' Jesusa's ewmeesag jina we'wete!, Jesusa' pasu'çme!. ¹³Aça' Pilato' na'wëk we'we:

—Idxa's na'wëtx kïhtewa jxuka ewmeesa' jina yuwe üsu' açá' wëse'jeçmeewá'ga jítewa, ¹⁴Jesusa' kïhwa pasme!.

Jesusa's ikhwa'j vxitni
(Mr 15.6-20; Lk 23.13-25; Jn 18.38–19.16)

Txã'wẽ pasmeete', ne'jwe'sxa' ma'wẽ yũuya'çxáa yuhwa ãjameeçxa', na'wẽ yũuya'k yajkx. ¹⁵Fxiesta ensu' ne'jwe'sxa' teeçx preesu txhweete'k ma'sna nasa pẽyitxna txã'sna. ¹⁶Aça' txãa fxiesta ensu' teeçx preesu jxtuhthesa ũsu'k Barabas yaasesa. ¹⁷Kxajk Pilato' na'jĩna pẽjx txãawe'sx pkhaakheçxa ũsatsx:

—I'kwe'sxa' ¿kimnakwe txhweete jxthãasu'? ¿Barabasna', meeçxa' Kristo jĩ'i'kwe txã'sna wáa kaatxhweete'je'nja?

¹⁸Txã'wẽ Jesusa's ahçeeçxa txajx tasxte dukhtewa jiyuçxak txã'jĩ.

¹⁹Pilato' jxkaahna u'pnite u'pte', txajx nyua' na'jĩnaga yuwe kaah: Txãa piçthẽ'j yuwemeesa yakha' kuçx yuumeena. Txã'wẽme', açxh kus iimẽh seena' ũukhũukh ksxa'wthu txãa piçthẽ'j ma'wẽ yũuwa'jsatewa.

²⁰Txã'jĩna pta'sxtewa, sacerdotewe'sx vxite' judiu nthẽ'jsa txãawe'sxa' nasatx knaytxi yu'kxwe'weçxa, txã'wẽ Barabasa's txhweeteçxa Jesusa's kiikhe'jwa'ja's pẽykahn. ²¹Txã'wẽtewa, ne'jwe'sxa' ki' pẽjxku na'jĩna:

—Naa e'zsatsi' i'kwe'sxa' ¿ma'snakwe kaatxhweete'j jxthãasu'? jĩte', txãawe'sxa' na'wẽtx pas:

—Barabasna metxhwete jĩte', ²²Pilato we'weçxa':

—Barabasa's txhweeteçxa', naa Jesusa's Kristo jĩ'i'kwe txã'sa' ¿kĩh yũutka? jĩte', jxukaysa pasçxa':

—Kluuste mkaafxuçu'j jĩ'tx.

²³Aça' Pilato' na'wẽk pẽjx:

—¿Kĩhga ewmée yũu? jĩte', txãawe'sxa' ki' sus we'weçxa':

—Kluuste mkaafxuçu'j jĩ'tx.

²⁴Txajũ' Pilato' kĩhwa yũuya' ãjanimeeteçxáa nasa' jweeíçxáa seena' wala suste', yu' jxũukaahçxa nasaa dxi'pte txajx kusetx kweeçxak na'jĩna:

—Naa piçthẽ'j kĩhtewa yuwemeesa's ikhni's adxa' yuwemeesath. Txã'sa' i'kwe'sx pasune'kwe jĩte', ²⁵nasa jxukaysa we'weçxa':

—Txã'sa' kwe'sx luuçuç yã'jçxa jxuka paswa'jsatha'w jĩ'tx. ²⁶Txajũ' Pilato' kaatxhweete'kh Barabasa's, nawa Jesusa's kaapeçxukwe'jçxa kluuste fxuçuçahn dukhku.

²⁷Txã'wẽ yũute', soldauwe'sxa' ne'jwe'sx u'pnite ka'ga'jçxa, soldauwe'sx jxukaysatx pa'yaçxa Jesusa's jxuka kxtadçxatx yuju. ²⁸Txajũ' ksũupil'jçxa atxh behsatx kaathe'j. ²⁹Sa' çhũçha's korona na'wẽ vxitçxa dxikthete ki'ptxi. Paçu kuseju yu', fxtũu zuzkuẽtx kaatu'j. Txã'wẽ yũuçuçatx txajx tasxte peejxũkwe:

—Judiuwe'sxtxi jxkaahsath jĩ'ne'ga jĩna weeçxna. ³⁰Sa' fxne'sx avxythethna fxtũ's kusa'jçxa, dxikthegatx pekwe'kwe. ³¹Txã'wẽ Jesusa's weeçxna jxã'jçxa', txãa atxh behsa's ksũupil'jçxa Jesus ropa's ki' kaathe'jtx. Txã'wẽ yũuçuçatx kluuskhẽ fxuçuçya' jxũna u'j.

Jesusa's kluuste fxuçni

(Mr 15.21-32; Lk 23.26-43; Jn 19.17-27)

³² Txajü kasehna u'jweççxa', teeçx piçthêj Cirenejüwe'sx Simon yaasesa yakhtxi pu'jykhêw. Sa' Jesus yakhni kluusa's txã'snatx kxaakhej.

³³ Txã'wê yüuçxatx pa'j teeçx ahte Golgota yaasesate. Txãa yu' Uusá Dxi'kthé Dxi'thçxáasa jîni'. ³⁴ Kxteea' vxinote yaasa's awçxatx Jesusa's yus wêe. Nawa txã'sa' yuwete isaçxaçxáa tudxme'.

³⁵ Kluuskhê a'kççxa', soldauwe'sxa' swerte kaahtx Jesus athni ropa's maa soldau knaytewa jiyuya'. Dxus yuwe pta'sxsa' na'jînak we'we txã' kxtey yuuk: Swerte kaahçxa adx ropa's txudeedetx txãawe'sx pwe'sx jînak we'we. ³⁶ Txã'wê yüuçxatx kxtee thegna kaçx. ³⁷ Sa' txajx dxi'kthé kakwey fxi'jçxa ki'ptxi kîh yüusate ikhçxawa na'jîna pta'sxna: Naafi' Jesus Judiuwe'sxtxi Jxkaahsa' jînak fxi'jîni yu'.

³⁸ Sa' Jesus pukakhê pdxi'ptxi e'z pesweetx ki'pni yuu kluuskhê. ³⁹ Aça' kluus taxuy uykhêwsa' na'jînatx wêesxu' dxiktheetx kaawûhna:

⁴⁰—Dxuus yata's pêtççxa tekh ente' ki' kiissathêj, idxa' ya'menwe'we. Dxus Nçxi'k dxihçxa', kluusuh msa'j jî'tx.

⁴¹ Txã'wêy sacerdotewe'sx, ley kaapiya'jsawe'sx, fxariseowe'sx, vxite' judiu nthê'jsawe'sx txãawe'sx pwe'sx na'jînatx weeçx we'we':

⁴²—Vxite yuutxi' nwe'wek, nawa peekí yu' ya'nwe'weya' ájaçme'. Israelwe'sxtxi Jxkaahsa dxihçxa', kluusuh sa'jana aç yuuçxáa ísxiijaçmeega súju'nja'w. ⁴³ Dxus Nçxi'kthu jî'k na' Dxusnane' neewe'we', açá' txã'sa' áçxhíi Dxusa' nwe'wena, nwe'weya' ájaçxa yu' jî'tx. ⁴⁴ Aça' kluuskhê fxuçni ki'pnisa peswée yuhwa wêesxu pu'çxhi'tx.

Jesus uuní

(Mr 15.33-41; Lk 23.44-49; Jn 19.28-30)

⁴⁵ Txajü' êepxâh walajüjx çxhi'dxçxa kusuçte las trestepkaçxku çxhi'dx naa kiwete jxuka. ⁴⁶ Aça' las tres ájaçpkaçxha', Jesusa' na'jînak sus we'we: —Eli, Eli, çlama sabaktani?—txã' na'jîni': Adx Dxusgu sa' çmjîi pa'gaga adxa's thegmée nvxiht? jîni'.

⁴⁷ Aça' kxtee üssa' txã'jîni's wêse'jçxa', na'wêtx we'we:

—Dxus yuwe pta'sxsa' Elia'sa's pa'yaça' jî'tx.

⁴⁸ Naapkaçxha' teeçxsa' wuwuuna u'jçxa esponja's vxino puste akhçxa fxtüu vxiçte ki'pçxa yuwete utxak çxazxakahn. ⁴⁹ Nawa vxite yu' na'jî'tx: —Kuçx yuunu. Aan Elias pa'jana nwe'weya' jî'tx.

⁵⁰ Txajü' Jesusa' ki' seena' sus we'weçxa' uuk. ⁵¹ Naapkaçxha' dxuus yatte txudenisa liensu pesath a'kxnisa' puupxâjkhê sutek kute êeju kiwete kîh. Naapkaçxha' ehdwa çxhâçxha u'the', penxa yuhwa upetx, ⁵² açá' uusaawe'sx pedaní kafxwa phaate'te', Dxusna jxpa'gaçxa uusaawe'sxa' ki' îtxi yuutx. ⁵³ Aça' Jesus uuçxawa ki' îtxi yuunijü' txãawe'sxa' pedaní kafxu kasehçxa Jerusalemte u'kate', maazkuêesawa uytxi.

⁵⁴Txajü' kxtee Jesusna jxpa'yakx thegna ñssawe'sx vxite' soldau kpiitan txäawe'sxa' wala ñukhtxi ehd u'jna vxite' kñhwa seena' yũuni's uyçxa. Sa' na'wëtx we'we:

—Isa, naa piçthë'ja' Dxus Nçxi'k yuh yu'ga jĩ'tx.

⁵⁵Kxteea' kuh u'ytxi ñsu' jxu'ju thegna, txäawe'sxa' Jesusna selpiina u'jusatx yu' Galilea'jũx yuusa. ⁵⁶Txäawe'sx ksxavxyte' Maria Magdalena, vxite Maria Jakobo Jose nji'j, vxite' Zebedeo nyu txäawe'sxtxi yu'.

Jesusa's pedaní

(Mr 15.42-47; Lk 23.50-56; Jn 19.38-42)

⁵⁷Kusna kijaçte', teeçx piçthë'j wala ji'phsa Jose yaasesa Arimatea çxhabuwe'sxku pa'j. Txäawa Jesus yakh u'jusak yu'. ⁵⁸Txäa piçthë'ja' Pilato tasxte u'jçxa', Jesus kakwe's pejxku, aça' Pilato' yuwe kaakh tee dukh jina. ⁵⁹Txajü' Josea' Jesus kakwe's spajkçxa liensu fxinusatek yap. ⁶⁰Sa' kwet penxate u'se kafxi'jçxa ji'phu'k peekx kakwe's pedaawa'j txkaa khikhçxa', u'kani kafxte yu' kwet walasaju aphçxak u'j. ⁶¹Kxtee txä'wë yũuçte', pedaní kafx dxi'puh utxatx thegna u'pu' Maria Magdalena vxite Mariawa.

Jesusa's pedaní kafxte thegsa

⁶²Jxkaasena fxi'zeyä' jxuka pheu'jna jxä'jniñü kuskuskhë' sacerdote npiçthë'jwe'sx vxite' fxariseo txäawe'sxa' Pilato tasxte u'jçxa na'wëtx we'we:

⁶³—¿Wëse'gá!, ne'jwe'sx? Txäa ñsxihthë'ja' nee ñtxi u'juçxa', uuçxawa tekh ente' ki' ñtxi yu'nja jini'stha'w yajkx. ⁶⁴Txäa pa'ga mkaah pedaní kafxte wala ew aphkahn tekh entepkaçx. Txä'wë yũumeete', txäa yakh u'jusawe'sxa' kus pa'jçxa kakwe's pesweetxna, sa' e'suyä'ja' na'jina we'wetxna nasatx: Uuçxawa ki' ñtxi yuuga jĩtxna. Açä' txä'wë yũuçxa ñsxiini' nyafxii ñsxiinite thaakwesa yuuna jite', ⁶⁵Pilato' na'wëk we'we:

—Soldauwe'sx kxtee ñsta' txäatx pe'jçxa me'jwe, sa' pedaní kafxte wala ew maphwe. I'kwe'sxtxi ma'wë wejx ew thegte', txä'wë myũuwe.

⁶⁶Txä'jite', u'jçxa pedaní kafxte wala ew aphçxa txäa aphni kajkwete selxo ki'ptxi, sa' jxpa'yakx thegna ñswa'jsa soldauwe'sx txatx.

Jesus ki' ñtxi yuuni

(Mr 16.1-8; Lk 24.1-12; Jn 20.1-10)

28 ¹Jxkaase en skhëwniñü kuskuskhë mjiiwa'j en äanite wala kusítey Maria Magdalena vxite Maria yakh txäawe'sxa' u'jtx pedaní kafxte thegya'. ²Naapkaçxha' ehd seena' çxhäçxha u'kh, txä'wë Dxus angel cieluju kñçxa pedaní kafxte aphni kweta's kiispa'ga. Sa' txäa yu' txäa kwet kajkwete kaçxçxa ³kpi'sx kweneni na'wëk khikhyna u'p yu', açä' txajx athni ropa' seena' zhiçxkwe çxihme yu'tx. ⁴Açä'

soldauwe'sxa' txã'wësa's uyçxa', ùukhnite jxuka yayaçxa uuní na'wëtx wete. ⁵Aça' txãa u'ywe'sxtxi' Dxus angela' na'wëk we'we:

—Ûukhnuwe, adxa' jiith, Jesusna kluuste fxuçtxi txã'sna i'kwe'sxa' thegya' yuji'kwe. ⁶Nawa ayte' meeyã'ja'. Uuniijü ki' itxi yuuçxa u'kh ma'wëga pta'sx txã' kxtey yuuk. Mkaane'ta khikh txkaa myuhwe thegya'. ⁷Sa' wala dud me'jwe, txãa yakh u'jusawe'sxtxi na'wë pta'sxya': Uuçxawa ki' itxi yuuçxa Galilea kiwen u'jweça' i'kwe'sx yaçte. Kxtee puutx uyuune'kwe jina pta'sxine'kwe. Txã'wë pta'sxwa'th ji'pphu i'kwe'sxtxi jik Dxus angela'.

⁸Txajü' u'ywe'sxa' wala dud wuwuuna u'jtx Jesus yakh u'jusawe'sxtxi pta'sxya' ùukhnawa ùuste wët wët yajkxna. ⁹Naapkaçxha' Jesusa' txãawe'sx u'jweçte dxi'the vxyaaçxa weçxana küjk. Aça' txãawe'sxa' Jesus tasxte peejxükweçxa txajx çxidatx psxa'dçxa weçxatx. ¹⁰Aça' Jesusa' na'jik:

—Ûukhmée me'jwe, sa' adx yakhthë'jwe'sxtxi pta'sxine'kwe Galilea kiwen u'jçxa kxtee adxa's puutx uyuune'kwe jinak pta'sxkaah.

Jesus itxi yuuni's soldauwe'sx pta'sxni

¹¹U'ywe'sx txã'wë u'jweçpkaçxha', pedaniite thegna üssa soldauwe'sx maafi' yu' u'jtx Jerusalente sacerdotewe'sxtxi pta'sxya' kih yüuni'swa jxuka. ¹²Txajü' sacerdotewe'sxa' judiu nthë'jsave'sx tasxte u'jçxa puutx we'wetx. Txã'wë yuuçxa soldauwe'sxtxi' wala vxyu dukhtxi. ¹³Sa' na'wëtx we'wekaah: Kuspçãh kwe'sx deenite Jesus yakh u'jusawe'sx pa'jçxa uuní kakwe's pesweeta jine'kwe i'kwe'sxa'. ¹⁴Aça' txã'wë yuh dehne'ta sühçxa ne'jwe'sxa' i'kwe'sxtxi ewmeete nvxiit wëjewáana, nawa kwe'sx u'jçxa txãa yakh puutx we'we'nja'w i'kwe'sx ju'gu txã'wë yuukahmén.

¹⁵Txã'wë kwe'we'the', soldauwe'sxa' vxuyu's jxpa'gaçxa kxtey yuutx. Aça' txãasatx judiuwe'sxa' açxpkaçx txã'wëçxáa pta'sxi'.

Jesusa' txãa yakh u'jusawe'sxtxi neewe'weçxa nvxiitni

(Mr 16.14-18; Lk 24.36-49; Jn 20.19-23)

¹⁶Txã'wë yüuyã'the', Jesus yakh u'jusa oncesawe'sxa' Galilean u'jtx, thãlj vxiçte mteene' Jesus pta'sx kxtee. ¹⁷Sa' Jesusa's uyçxa', peejxükweçxa weçxatx, nawa vxitefi' yu' txãamée wána sühna kuhtx yaaki'. ¹⁸Txajü' Jesusa' txãawe'sx tasxte utxaaçxa na'wëk we'we:

—Cielute vxite' naa kiwetewa adxnaçxaçxáak neewe'weni yuu jxkaahwa'ja's. ¹⁹Txãasath i'kwe'sxtxi jxkaaja': Me'jwe Dxus yuwe's pta'sxya' maa kiwetewa nasa jxukaysatx. Txã'wë yuuçxa' yu'te bautisaïne'kwe, Dxus vxite' Dxus Nçxi'k vxite' Dxus Espiritu txãawe'sxtxi neewe'weçxa. ²⁰Sa' Dxusa's nwëese'jwa'ja's kaapiya'jane'kwe kihtewa jxuka, adx ma'wëtkã i'kwe'sxtxi jxkaah txã'wëy. Mjiyuwe, açxhüyã'ja' een isa bagaçxtewa i'kwe'sx yakh nes yuuya'wath naa kiwe pçuupkaçx jik.